

MPO NA NINI BISO TOZALI DENOMINATION TE?



Ezali litomba koya lisusu awa na eteyelo, sima na sanza soko, nabanzi, penepene misato, ya kozala awa te. Biséndé emoni mpasi, ná ngai pe lokola. Oh, kasi napémi mpenza, ata bongo, sikawa pe okoyoka mposa ya kozonga na mosala. Pe sikawa tozali kozela na mposi oyo ezali koya, na mpokwa ya mokolo ya misato oyo ezali koya, mpo na kobanda mayangani ya ko—kolamuka awa na tabernacle. Pe soki ezali mokano ya Nzambe, nazali na mwa. . . Nkolo alaki ngai mosala ya sika pe ya lolenge mosusu. Pe soki Asepeli kosala bongo, nazolikya kobanda mo—mosala yango ya sika ya lolenge mosusu mposi oyo ezali koya, awa na tabernacle, lokola esika ya liboso.

² Na sima, nabongisi mayangani te, kasi bobele na Australie pe na Nouvelle Zelande, na sanza ya liboso oyo ezali koya. Na sima Ndeko Osborn azali kobengisa ete tósala liyangani elongo moko ndenge oyo nalakaki ye awa, tóloba, eleki mwa ntango, na Tulsa, kasi, na mikolo ekoya, kasi toyebi mpenza naino te mpo na yango.

³ Ezalaki mpenza malamú, Ndeko Jeffreys, kozua libaku ya kopesa yo mbote ya loboko awa na sima, pe lisusu koyoka mwana na yo ya mobali koyemba loyembo wana, pe yo ozali kobeta nzenze. Nasepelaka na mwa likambo ya ndenge wana, tata ná mwana. Bino bosepelaka na yango te? “Bókóló mwana na nzela oyo asengeli kolanda.” Ya solo, Mesie Guenther, o—oyebi ete ezali ya solo, bino mibale. “Bókóló mwana na nzela oyo asengeli kolanda, pe ntango akokóla, akotangwa na yango te.” Pe ezali solo. Ekoki kosalema ete na ntango moko boye akoki kotangwa na yango, kasi yango ekotika ye te. Bomoni? Eko—ekozala na ye ntango nyonso. Koyekolisama ya ebandeli wana pe mosala nyonso oyo balakisaki ye kosala, na ntembe te, eko—ekozala na ye ntango nyonso. Sikoyo, oyo ezali. . .

⁴ Nakutanaki na Ndeko Jeffreys kuna libanda, pe nalobaki: “Ndeko Jeffreys. . .” Nakanisaki, boyebi, nazalaka ntango nyonso na esengo ya komona bandeko na ngai nyonso ya bapaya awa, kasi na mpokwa ya boye, ndeko mopaya áyá kotala biso! Mpokwa oyo, liboso na mayangani ya kolamuka oyo, ezalaka bobele bato oyo bayaka na tabernacle. Oyo ezali mpokwa oyo. . . Tolingi kozua mpokwa ya lelo, lobi na ntongo, pe lobi na mpokwa, bobele kolobela likolo na makambo oyo tondimaka awa na tabernacle, ko—kozongela yango lisusu. Tozali na mwa makambo tondimaka ya kokamwisa mpenza, ya ndenge mpenza,

kasi na lolenge moko to mosusu, tozuaka yango na Biblia oyo. Emonanaka lokola elongobani mpenza.

⁵ Sikawa, soki ndeko mobali to ndeko mwasi moko azali awa, ya mopaya, oyo asambelaka na denomination moko boye, to— to andimaka ndenge mosusu, pe azali awa na mpokwa oyo, tolingi óyeba ete totondi yo boyei malamumu mpenza. Bomoni, totondi bino boyei malamumu na ndenge oyo esengeli mpenza. Kasi sikawa, nakolikya . . . Pe tokomisaka yango mwa makasi mpenza. Na bongo, soki emonani lokola ete ondimi yango te, ee, na ntango wana, sálá ndenge ngai nasalaka na ntango nakolia gató batiá mbuma ya serize. Ntango naliaka gató batiá mbuma ya serize, yango nde nalingaka mingi, ntango nyonso, soki nazali . . . Ntango naliaka gató yango, soki mino na ngai etafuni mokókóli, nabwakaka gató yango te. Na—nabwakaka bobele mokókóli, pe nakóbaka kolia gató. Boye, to ndakisa, soki ozali kolia soso. Sikawa, bino nyonso bolingaka soso, bomoni. Soki okutani na mokúwa, okotika kolia te, okokende bobele zingazinga ya mokúwa yango pe okokoba kolia soso. Ee, bósala ndenge wana na mpokwa oyo, na oyo nazali koloba awa, bobele . . . na ntango okutani ná eloko moko, okoloba: “Ee, na—nazali te . . . náfanda kaka awa, wana bazali koteya mwa Mateyo ya lingomba oyo, na mayangani misato oyo ekoya. Bazali bobele kozongela makambo oyo bango—oyo bango bandimaka, pe bazali koyekola yango.”

⁶ Pe nzela bobele moko oyo okoki kosala ete moto ándima Yango, ezali ete óbete sete makasi mpenza kino ete bakosengela koyeba ete Yango nde eloko oyo elongobani. Yango nde nzela bobele moko oyo okoki kofandisa yango. Kaka lokola moninga na ngai, Misie Wood oyo nazalaka na ye elongo; soki obeti sete pe ekoti kino na katikati, pe libaya efandi malamumu te, ekoumela te, mopepe ekokweisa yango kala mingi te. Kasi osengeli kokótisa yango nyonso, kofandisa yango malamumu mpenza. Na bongo, sikawa, soki nalobi makambo ya makasi mpenza na mwa bisika moko, pe bino bapaya oyo bozali awa na mpokwa oyo, nazali te—nazali koluka kobulunganisa bino te. Nazali kaka koluka kososolisa losambo oyo makambo oyo tondimaka. Sikawa, baoyo nyonso basosoli malamumu báloba: “Amen.” [Losambo balobi: “Amen.”—N.D.E.] Malamumu. Ezali—ezali malamumu. Sikawa nasilisi likambo yango. Na sima—na sima . . . Bazali kotia yango na bande, pe bongo na bongo, mpo ete na mikolo ekoya, soki balingi koyeba mpenza makambo oyo biso tondimeli, pe esika oyo totelemi, ba-bande oyo ekoloba yango. Na bongo tosalaka boye mbala na mbala, mpo bato ya sika bayaka awa, bongo—bongo nde tokendeke liboso. Pe sikawa, tokokoka kozongela Mateyo nyonso ya losambo te, kasi bobele mwa ndambo na yango oyo tolingi ko—kolobela. Sikawa, mokolo ya misato na mpokwa, nde ekobanda . . .

⁷ Mokolo ya mosala moko pe ya mibale, nakokende, mpo na kobondela, komilengela mpo na mosala ya kobondela mpo na

babeli. Bokoki kozua ba-telefóne, to nyonso oyo bolingi, mpo na kobengisa bato nyonso oyo bolingi, mpo na kolamuka oyo ezali koya. Pe bóyebisa bango ete báyá na motema likolo-likolo te, báyá te, na koloba: “Ee, sikawa, na mpokwa ya lelo nakokende kuna noki-noki mpo bábondela mpo na ngai. Pe lobi na mpokwa, ekozala...” Bósala bongo te. Bóyá pe bóyoka mpo na mwa ntango, mpo tolingi kozua ntango na biso mpo na kotalisa Liloba yango polele mpenza na lolenge ete zabolo akozua ata mwa esika moko ya koningana ata moke te. Na bongo, soki otiki kondima na yo ékóma tee na suka na yango, kino ete óbanda kondima, na ntango wana, tika lisosoli na yo ya kati ébanda kosala, bongo kondima ya Nzambe ekosunga yango. Sima nde okoki kobima na yo. Bomoni?

Mpamba te, kondima na yo ekosala eloko moko te. Lisosoli na yo ya kati esengeli kolanda nzela oyo kondima na yo ezali kosala, na bongo nde kondima ya Nzambe ekolanda na sima pe ekotatola yango nyonso. Bomoni? Kasi, soki ezali kondima na yo, “Oh, iyo, nazui yango sikoyo!” Pe nzokande lisosoli na yo ya kati, ezotelemela yango, ezolobáká: “Nazali komituna soki ekosimba mpo na ngai.” Ekosimba te, na ntango wana. Bomoni? Boye tolingi ete oyo ézala mpenza liyangani mpo na lobiko na nzoto. Pe liboso ete nákotisa moto na ba-biró, pe bongo na bongo, mpo na lobiko na nzoto, to mpo na mayangani oyo ya sika, nalingi ete básosola mpenza ntina nini bazali kokota kuna. Boye, bóbosana te, bóyá kotala biso, pe tokozala na esengo ya koyamba bino.

⁸ Sikawa, bómikanisela sikoyo, ete na ntongo, tokokóba na Mateyo ya lingomba. Pe lobi na mpokwa, ndenge moko. Bongo, boyei bolamu, pe moto nyonso akoki koya. Tozalaka ntango nyonso na esengo ya komona moto nyonso. Kasi sikawa likambo oyo, na mpokwa oyo, ezali bobele mpo na bato ya tabernacle oyo, oyo—oyo bakóli na Mateyo oyo. Mpamba te, kuna kati na elanga, elanga ya kopalanganisa Nsango Malamu, tozuaka bobele Mateyo ya moboko, ya kopalanganisa Nsango Malamu ya Makomi. Kasi awa na tabernacle, tozali na makanisi na biso moko pe na makambo na biso moko oyo tondimaka, lokola—lokola—lokola lingomba, pe yango nde tokozongela, na mpokwa oyo.

⁹ Liboso ete tófungola Liloba na Ye oyo epambolámá, tokoki kogumba mitó mwa moke mpo na kobondela?

¹⁰ Nzambe ya bokonzi pe na nguya nyonso, Oyo, liboso kútu mokili ébanda kobaluka zonga-zonga na atóme ya liboso, Ozalaki Nzambe. Obongwani ata moke te. Pe ntango ba-atóme ekozala lisusu te mpo na kosimba yango, pe mokili ya kosimba ekozala lisusu te, Okozala kaka Nzambe. Ozali mpo na libela, na libela. Ozali Nzambe. Ozalá na ebandeli ya mikolo te, pe suka ya bomoi te. Okozala ntango nyonso. Pe, Tata, lokola Ozali na suka te, pe biso tozali na suka, boye tosengi mawa na Yo ya Bonzambe, e Nzambe, wana tososoli ete molimo oyo ya biso

esengeli kosangana kati na Seko na Seko, longwa na binama ya ntango oyo, kino na Seko na Seko. Yango wana, Nkolo, tozali awa mpo na koyeba lolenge ya lobiko na biso, koyeba lolenge tozali liboso na Liloba na Yo, pe komona lolenge nini tobelemi na makambo oyo tozali kobikela. Tozali kobika bomoi oyo ezali kosepelisa Yo? Molimo na biso ezali kotatola Molimo na Yo? Pe malakisi na biso ezali kotatola Biblia oyo? Pe, Tata, tika ete tómitala malamú moko pe mosusu, na bokebi mpenza, na mayangani misato oyo ezali kolanda. Kokisa yango, Nkolo.

¹¹ Pambola mokengeli awa, basungi, bayangeli misolo, pe bandimi nyonso, bato oyo bayaka na losambo oyo. Uta nabadá awa, Nkolo, bato mingi, mingi mpenza, nayebi ata bankombo na bango te, to epai baútá, kasi nandimisami ete Yo oyebi oyo nyonso etali bango. Pe tozali awa na mokano bobele moko wana, na mpokwa oyo, Nkolo, ya boyokani na bandeko zingazinga na Liloba oyo ekomámi. Pesa biso Molimo Mosantu na bomoi na biso, mpo tókoka kofanda na kimia, pe na kosókema, pe na kobanga Nzambe, pe kotala bomoi na biso malamú na nzela na Liloba na Ye. Kokisa yango, Nkolo.

¹² Pe na kati na ndako oyo, na mpokwa oyo, Nkolo, bandeko na ngai ya—ya lingomba ndenge na ndenge bazali awa. Pe, Nkolo, nazongisi matondi mingi ndenge bayei awa mpo na boyokani ya bandeko. Ntango mosusu tokoki kozanga koyokana na mwa mibeko mike mike ya Mateyo. Kasi mpo na mobeko monene ya moboko yango, totelemi lokola bandeko oyo basangani na liboso ya etumba. Na bongo, E Nzambe, tika ete élendisa ba—ba—bondeko na biso, pe biso . . . pe bikanganeli ya ngolu pe bolingo na Nzambe ézala likolo na biso na koluta nyonso. Sikawa, wana tososoli, Nkolo, ete mosala oyo eleki monene mpo na moto kozala, mpamba te oyo tozali koyekola, na mpokwa oyo, ezali esukeli ya milimo oyo ezali kokende na Seko na Seko. Na bongo, tobondeli ete Molimo Mosantu ákota sémba kati na Liloba, pe átalisa biso Yango pe álimbolela biso Yango na lolenge oyo ya Ye moko, makambo oyo Ye alingi ete tóyeba. Kokisa yango, Nkolo. Pe ntango misato yango . . . ntango ya mayangani yango ekosila, tika ete tókende lokola lingomba oyo ezui makasi, lokola baoyo basangani elongo, mpo na kosangisa mitema na biso pe bamposa na biso nyonso elongo, ná bandeko baí—mboka na biso ya Bokonzi na Nzambe, pe tókende liboso na ndenge esaléma liboso te.

¹³ Nalingi kotóndo Yo, Nkolo, awa, liboso ya losambo pe—pe ya bato oyo bazali awa, ndenge Outi kopesa ngai mpóso ebele oyo napemi malamú. Nazali komiyoka malamú mpenza na mpokwa oyo, mpo na Bozali na Yo pe lipamboli na Yo. E Nzambe, tobondeli mpo na ndeko mobali oyo, ndeko na biso oyo azali kokende mikili mosusu, kuna na bikólo oyo ya molili pe ya mawa, epai wapi bomoi na ye ezali na likama. E Nkolo, pambola Ndeko na biso Jeffreys ntango akokende, ná mwana na ye ya

mobali, ná mwasi na ye, pe bakisela ye mingi mpenza. Tika ete átobola madusú kati na molili kino ete Pole ya Nsango Malamu ekongenga mosika pe bisika nyonso. Yoka biso, Tata, mpo tosengi libondeli oyo na Nkombo ya Nkolo Yesu, Mwana na Yo. Amen.

¹⁴ Sikawa, na mpokwa oyo, wana nakotángá na Biblia na ngai moke ya Scofield. Nauti kolekisa mibu ntuku mibale na mitano, kala mingi te. Pe nazali naino na makoki ya kotángá yango, kasi ekómi na londende mingi. Na bongo, namizueli manéti ya kotángela mpo na ntango nayekolaka, pe nakotala ndenge ekosala na mpokwa oyo, mpo na mbala na ngai ya liboso.

Sikawa, nazali na mitó ya mateya, lokola oyo, ete: “Lingomba esengeli. . .” Oh, makambo ebele, soki tokoki koyekola yango. Moko na yango ezali: “Mpo na nini biso tobengami Lingomba? Mpo na nini biso tozali denomination te? Mpo na nini—mpo na nini tondimaka kimia ya Seko mpo na elimo ya mondimi? Mpo na nini biso tokweisaka basi batei? Mpo na nini biso tosalaka libatisi ya kozindisa moto na máí? Lingomba ekoleka na Monióko monene?” Pe ebele na mitó ya mateya awa, nabanzi nazali na yango zomi na mitano to zomi na mwambe, mpo na mwa ba-mpókwa oyo ekolanda.

¹⁵ Boye, nazali kokanisa, na mpokwa oyo, ya liboso, mpo na kobanda, emonani lokola ete Nkolo atii na motema na ngai motó ya liteya oyo, ya . . . *Mpo Na Nini Bisu Tozali Denomination Te?* Ntina oyo . . . Sikawa, tozali na eloko moko te ya kotelemela bato mosusu te, oyo bazali denomination. Tozali na eloko moko te ya kotelemela bango te, kasi nalingi kolimbola mpo na nini biso totikálá kokóta na denomination moko te. Nabúlisamaki na lingomba Batiste moko moke, ndenge boyebi. Pe lingomba Batiste ezali denomination te, ezalaki bongo te, kino kala mingi te awa, pe sikawa ezali kokóma bobele mpenza denomination lokola baoyo nyonso batikali. Kasi, ntina oyo biso totikálá kokóma denomination te. . .

¹⁶ Sikawa, biso tozali lisanga ná bobongisi. Tozali lisanga ná bobongisi, toyebani awa na—na letá, lokola lisanga ná bobongisi, etonga ya bato oyo bamibongisi elongo, mpo na kokumbamela Klisto, kasi tozali kati na denomination moko te. Moto moko te akozala na bokonzi likolo na biso, bomoni. Ezali denomination te. Ezali—ezali bobele bobongisi, boyokani ya bondeko kati na bandimi Baklisto. Bato bayaka kosambela awa. Pe oyo ekómi losambo na bango, soki basepeli koya awa, na ntango nyonso oyo bazali na bomoi.

¹⁷ Bakoki koya awa pe tozangi koyókana na nyonso oyo toteyaka. Ezali na yango mabe te. Ntango nyonso, lokola ozali Moklisto, ozali na bondeko, pe osémboli loboko, ndenge moko lokola baoyo mosusu batikali. Bomoni? Soki nalobi ete nandimaka libatisi ya kozindisa moto na mai, pe yo ondimaka oyo ya komwangisa mai, pe okangami na yango, tolingaki kozala

kaka ndenge tozalaki soki biso mibale tozalaki na boyókani. Tokoki ntango mosusu komona makambo ndenge moko te. Kasi na ntango nyonso oyo ozali Moklisto ndeko mobali to ndeko mwasi, totombeli yo mpenza boyei malamumu, bomoni, bino nyonso.

¹⁸ Na bongo, tozali na denomination moko te, mpo ngai nandimaka ete denomination ekabolaka bandeko. Bamosusu kati na bango bakoloba: “Ee, tozali na ntina ya mayangani ya kolamuka wana te. Wana ezali kolamuka ya ba-Methodiste.” “Ee, ezali ba-Batiste. Tozangi. . . Bisó tozali ba-Methodiste. Tozali na eloko ya kosala na yango te.” Ndeko, soki Klisto azali kati na yango, tozali—tozali na ntina na yango. Tosengeli kotia. . . E—ezali nde Nzoto ya Klisto oyo ezali—ezali konyokwama. Pe nazomona yango mingi mpenza na bikólo lelo, ndenge tozali na. . . Nzokande, Klisto atikálá kosala ebongiseli ya lingomba denomination moko te, ata mokolo moko te. Sikawa, tika ete yango eyebana malamumu mpenza.

¹⁹ Boye, sikawa, nakosenga bino lobi na mpokwa, soki olingi koyeba moko na makambo oyo, ndakisa makambo ya lisitwale oyo nakolobela, to eloko mosusu. Nakozala na ntango ya kosilisa yango mobimba te, soki te, nakokoka kolobela liteya mosusu te, mpo okoki kolekisa ba-mpóso bobele na liteya sé moko wana. Kasi soki olingi koyeba epai yango ekomámá, ézala eloko nini, túná ngai, pe tia yango awa, likolo na—likolo na eteyelo, pe nakoyanola yango mpo na yo.

²⁰ Sikawa, denomination ya kala mpenza koleka, pe lingomba denomination ya liboso oyo totikálá kozala na yango, ezali lingomba Katoliko. Pe ekómaki ebongiseli mibú nkama misato na ndambo sima na liwa ya ntóma ya suka. Pe ezali solo. Ekomami na búku ya Batata ya ebandeli na Nicée, pe okomona yango na makomi ya Josephus, pe, oh, ebele ya ba—ba-historien minene. Bomoni? Pe na oyo etali bi—bi. . . bileko nyonso ya lingomba, koya teee kino na ntango ya kufa ya ntóma ya suka, pe mibú nkama misato sima na bantóma, lingomba ya denomination moko ezalaki te. Pe lingomba Katoliko nde ezalaki denomination ya liboso.

²¹ Pe mangomba ya ba-Protestant ezali ba-denomination oyo euti na denomination. Mbongwana ya liboso oyo ekomaki, ezalaki ya Luther; na sima ya Luther, Zwingli ayaki, na sima ya Zwingli, Calvin ayaki, pe bongo na bongo. Pe kokita tééé na Kolamuka ya Wesley, pe kokoba tééé na Alexandre Campbell, John Smith, ná bamosusu, bomoni, bongo na bongo. Pe mangomba ya suka, oyo tozali komona tééé lelo, ezali bindimeli ndenge na ndenge ya eleko ya ba-Pantekotiste.

²² Nandimaka ete Nzambe nde asalaki na bileko nyonso. Kasi bosilá komona ete, na ntango nyonso lingomba moko ekweyaka, pe na ntango nyonso oyo bakómaka denomination

nde ebandaka kokweya na ngonga wana mpenza? Pe ntango nyonso bakweyaka, Nzambe atelemisaka lisusu lingomba yango ata moke te. Ebebaka pe esilaka mbala moko mpenza. Boye bosengeli bobele. . . Soki bolingi koyeba lisitwále na yango, to—tokoki kotalisa yango, ete—ete lingomba moko te, ata na lisitwále ya mangomba te, ete denomination moko ekwéyá bongo ételema lisusu. Ézala ba-Batiste, ba-Methodiste, ba-Presbiterien, ba-Luterien, to banani, ntango bakweyaki, esili mpo na bango. Sikawa, ezali solo. Sikawa, likambo oyo, na—nauti koyebisa bino, bókanga mokaba na bino, mpo tokofandisa likambo oyo mpenza. Bomoni? Etikálá kosalema te, na ntango moko te. Ntango moto moko abimi, ye moko, pe akómisi lingomba ebongiseli, nde wana ebandaki.

²³ Nzambe asalaka na moto moko moko, ná denomination te. Ata na eleko moko te Nzambe atikálá kosala na denomination moko. Asalaka ntango nyonso ná moto moko. Na Kondimana ya Kala, Asalaki ná moto moko moko. Na Kondimana ya Sika, Asalaki ná moto moko moko. Na bileko nyonso, Asalaka ntango nyonso na moto moko moko, kasi ná denomination te. Boye, na yango, soki Nzambe azali na kati ya denomination yango te, yango ekosunga ngai na eloko nini lokola denomination? Sikawa, nazali kolobela bato oyo bazali na denomination yango te, nazali kolobela denomination yango moko, mpo libota na Nzambe bazali na kati ya denomination nyonso wana.

²⁴ Sikawa, Nzambe atikaka ata moke te likambo moko ésalema soki Apesi likebisi na likambo yango te. Nandimi te ete likambo moko ezali oyo. . .

²⁵ Ndakisa, tozali na mituna oyo eyaka, na mangomba, lokola moko oyo touti kozua, na ntina na makila, mafuta, pe bongo na bongo. Pe boyebi mokanda oyo “Molingami Ndeko Branham”, pe bongo na bongo. Kasi ntina oyo natelemelaki yango, ezali mpo ete ezali kati na Liloba te. Pe yango nde ntina oyo natelemelaka ba-denomination, ezali mpo ezali kati na Liloba te. Pe esengeli kozala na eloko moko oyo tosengeli kofandisa kondima na biso likolo na yango. Pe soki tokoki kofandisa yango likolo na denomination te, tosengeli kofandisa yango likolo na Liloba na Nzambe. Mpamba te, Yango nde mobóko bobele moko, Liloba na Nzambe.

²⁶ Na bongo, soki Liloba na Nzambe elobi na ntina na denomination te, kasi elobi nde mpo na kotelemela denomination, na boye tosengeli koloba kokokana na Liloba. Etali te oyo évéke, oyo nani alobi, oyo moto nani akanisi, oyo moto malamumu moko alobi, oyo eloko nini elobi, soki yango elongobani na Liloba na Nzambe te, boye ezali lokuta. Bomoni? Yango esengeli kozala, Liloba esengeli kozala likambo ya suka. Liloba na Nzambe nde esengeli kozala amen ya suka.

27 Sikawa bómikanisela, nazolongola kiboklisto te (bósosola yango) na moto nyonso oyo azali kati na ba-denomination. Ezali na milimo ya motuya nkóto ntúku na ntúku na kati ya ba-denomination nyonso wana, baoyo bazali bana na Nzambe. Kasi kokabola bango pe kotiela bango ndelo, natelemelaka yango. Pe Liloba na Nzambe etelemelaka yango.

28 Pe nandimaka ete ezali na izme moko te na ekólo lelo, ezali na izme moko te oyo ezalá na ekólo, oyo Liloba na Nzambe esakolaki te ete ekoya. Nandimaka ete Liloba na Nzambe ekokisaka bosenga nyonso oyo tozalaka na yango, awa mpenza kati na Liloba. Longwa na . . . ebandeli na biso kino na suka, ezuami awa kati na Liloba na Nzambe. Na bongo, na—nandimaka ete soki ezuami na kati ya Liloba na Nzambe, boye tosendeli . . . Esakolaka liboso. Pe Liloba na Nzambe ezali likebisi.

29 Sikoyo, batángaka Liloba na Nzambe te ndenge batángaka zulunále. Batángaka Liloba na Nzambe na nzela na Molimo Mosantu, bomoni, mpo Molimo Mosantu Yango moko nde elobaka na nzela na Klisto. Klisto atóndoki Nzambe ndenge Abombáki makambo oyo na miso ya bato na bwanya pe ya mayele, pe akomonisa yango epai na bana mike oyo bakoyekola. Boye, bomoni, nzela ya koyekoláká yango na kelasi ezali te, nzela ya koyebáká yango na denomination ezali te. Nzela ya kotambola sémba ezali bobele moko, ezali ete, ókambama na Molimo na Nzambe. Pe lobiko oyo olekaki na yango esengeli kolongobana na Liloba oyo. Bomoni? Na ntango wana nde ozui yango. Bomoni?

30 Lokola ntango tokokóma wana sima na mwa miníti, tozali kosala elongo na bato oyo bazali—bazali . . . Bamosusu kati bango bazali ba-Calviniste ya nsuka solosolo, bamosusu bazali ba-Arminien ya nsuka solosolo, pe—pe ya ndenge na ndenge. Nzokande, ezalaka ntango nyonso, ata soki okati yango mike-mike ndenge nini, ezalaka kaka na ngámbo mibale. Ya solo mpenza. Pe bamoko ná bamosusu bazalaka na makambo oyo bawelanaka. Kasi, likambo ezali ete, Solo ya likambo ezali wapi? Nde epai wapi tozokóma, epai tokanisi ete, na ngolu na Nzambe, tokotalisa bino Solo na yango. Sikawa, tózua bobele . . . pe yango nde esalaki ete nákoma ndambo na mateyo ya lingomba yango.

31 Bózua ba-Biblia na bino, mpo na mwa miníti, bino nyonso sikawa. Pe tókende na Emoniseli, mokapo ya 1; to Emoniseli, mokapo ya 17, mpo na kobanda. Tóbanda kotángá mpo tóyeba sikawa epai wapi mangomba yango ebandá, pe eloko—eloko nini ebandisaki yango. Sikawa, Biblia ekebisaka makambo nyonso liboso. Ekebisi liboso mikolo oyo tozali—tozali kobika kati na yango. Sikawa, Emoniseli, mokapo ya 17, soki bokolinga. Nalobaki ya 13, nalingaki koloba bongo te, yango ezali . . . Tokozua yango pe sima na mwa ntango, wana ezali lisakoli oyo elobeli Etats-Unis. Kasi bóyoka na bokebi mpenza sikawa.

Pe moko na banje nsambo, oyo bazalaki na Mbeki nsambo ayaki kosolola na ngai, ete. . . Yaka awa; pe nakotalisa. . .yo ekateli ya mwasi ya ndumba monene oyo afandi likolo na mai mingi:

³² Sikawa, bómikanisela, oyo ezali koyokana lokola libombami. Sikawa, mwasi ya bomoi mabe oyo, sikoyo, soki tokopesa malakisi oyo, bosengeli liboso koyeba nini bilembo oyo elingi koloba. Sikawa, *mwasi*, na Biblia, atalisaka “lingomba.” Bato boni bayebi yango, ete tozali Mwasi na libala? Lingomba ezali Mwasi na libala.

³³ “Yaka awa, pe nakolakisa yo ekateli.” Na bongo, ekozala na kosambisama ya mwasi ya ndumba monene, mwasi ya mbindo oyo afandi likolo na máí ebele. Sikawa, *mwasi* atalisaka “lingomba”, pe *mái* etalisaka “bato.” Sikawa, soki botali yango malamumu, bótala pe molongo ya 15 wana bozali wana, molongo ya 15, moko yango.

Pe alobaki na ngai, Máí oyo omonaki, epai mwasi wana ya ndumba afandi, ezali bato, . . .mingi, . . . mabota, pe minoko. (Bomoni?)

³⁴ Sikawa, lingomba monene oyo, mwasi monene, sikawa bóbosana te, azali mwasi ya bomoi mabe. Pe soki mwasi azali kotalisa lingomba, (pe Lingomba ya Klisto ezali Mwasi na libala, Mwasi na bule), boye mwasi oyo azali bule te. Na bongo, esengeli kozala mwasi na libala moko ya maloba, oyo azali bule te. Bomoni? Bongo, asali nini? “Afandi likolo,” to kozala *likolo*, elingi koloba, “kozala na bokonzi likolo na ba-mái mingi.” Na elobeli mosusu, azali na nguya kati na bikólo, minoko pe mabota nyonso. Azali moto monene, mwasi oyo.

Sikawa, oyo bakonzi ya mokili basali na ye pité. . .

³⁵ “Mpamba te bakonzi ya mokili basali na ye pité,” bato ya bozwi, bato minene nde. Ndenge nini okoki kosala, ndenge nini mokonzi akoki kosala pité ná lingomba? Ezali pité ya molimo. Ya molimo! Pité ezali nini? Ezali, ee, ezali lokola mwasi oyo azangi bosembo epai na mobali na ye. Azali kobika na mobali mosusu, na ntango azali na mobali na ye. Pe lingomba oyo, na bongo, azali—azali koloba ete azali Mwasi na libala ya Klisto, na ntango azali kosala pité na bakonzi ya mokili, na bomoi na ye ya mbindo, misala na ye ya mbindo. Oh, Ezali na bozindo pe Ezali na motuya mingi. Nalingaka Liloba mpenza. Sikawa bótala.

. . . oyo bakonzi ya mokili basali na ye pité, pe bafandi na mokili balángwe vinyo ya pité na ye.

³⁶ “Vinyo” na ye, ezali nde oyo azalaki kokabola, nsái na ye, “Biso nde Lingomba! Biso nde tozali na eloko yango.” Bomoni? Sikawa, bómitalisela yango naino na makanisi na bino. Malamumu. “Bongo, amem- . . .”

³⁷ Sikawa, mwanje alobaki na Yoane: “Nakolakisa yo ekateli oyo ekokómela lingomba monene oyo.” Sikawa bótala malamamu.

Bongo amemaki ngai na molimo kino na biliki: pe namonaki mwasi moko afandi likolo na nyama ya motane, . . .

³⁸ *Motane*, na Biblia, etalisaka “bokonzi.” Langi ya *motane* elingi koloba “ngóla”. Pe *nyama* etalisaka “nguya.”

Bomoni yango, nyama yango autaki na mbu, ezalaki na Emoniseli 13. Pe ntango bomoni nyama kobima longwa na mbu, elingi koloba ete nguya oyo ezalaki kouta katikati na bato.

Kasi na Emoniseli 13, ntango mwana mpate abimaki, autaki na mabelé, bato bazalaki te, Etats-Unis. Kasi na sima, azalaki na maséké mibale ya mike, nguya ya bato pe ya lingomba. Na sima, bapesaki ye nguya, pe akómaki koloba lokola Dalagona azalaki kosala liboso na ye. Boye, bosengeli kokoma yango, tozali kopusana na monioko ya basámbeli na makambo ndenge moko oyo basalaki, na eleko ya Roma ya bapakano, eleki mibu ebele, mpamba te ezali YANGO ELOBI NKOLO.

Sikawa bótala yango malamamu. “Afandi likolo na nyama, nguya.”

³⁹ Bomonaki Rebeka? Ntango Eliezer amonaki ye, ezalaki na ntango na mpokwa, pe apesaki kaméla mái. Mpo, Eliezer alobaki: “Elenge mwasi oyo akoya, soki apesi kaméla oyo mai, yango ekozala e. . . pe apesi ngai mái ya komela, akozala ye oyo Yo oponi, Nkolo, mpo ázala mwasi na libala ya mosali na Yo, Isaka.” Pe wana azalaki naino kosambela, Rebeka ayaki, atókaki mái pe apesaki ye mpo ámela, apesaki pe mái na kaméla. Bótala, kaméla azalaki nyama. Pe nyama moko wana oyo ye azalaki kopesa mái, ezalaki yango nde ememaki ye epai na mwasi na ye ya libala, Isaka.

⁴⁰ Pe, lelo, nguya ya Molimo Mosantu, oyo Lingomba ezali kopesa mái pe kokumbamela, yango nde Eloko oyo ekomema Yango longwa na mabelé, mpo na kokutana na Mwasi na libala. Ya solo, Isaka azalaki libanda na elanga, na mpokwa. Tokokutana na Nkolo kuna na Nkembo te. Baefese, mokapo ya 5, elobi ete tokokutana na Ye na mipepe. Oh, oyo esalaka ete ba-Methodiste bábelema mpo na kogánga. Bókanisa naino! Bomoni? Nkolo. . .

Isaka abimaki na ndako ya tata na ye, pe azalaki libanda na elanga, ntango amonaki Rebeka azali koya likolo na kaméla. Pe ye mwasi alingaki ye, na mbala ya liboso amonaki ye, pe akitaki na kaméla pe akimaki mbangu kokutana na ye. Ya solo. Wana nde esika oyo tokokutana na Nkolo. Pe bobele kaméla oyo apesaki mái, nde ememaki ye epai na mobali na ye.

Pe bobele Nguya oyo Lingomba ezali kokumbamela, oyo mokili ezali kobenga bilandálanda, oyo Lingomba ezali

kokumbamela, ekozala bobele Nguya moko oyo ekonetola Lingomba na mipepe, “Mpo na kokutana na Nkolo na mipepe.” Molimo Mosantu! Bomoni? Ezali na . . .

Pe, bótala, Rebeka azalaki mongondo.

⁴¹ Pe mwasi oyo tozali kolobela awa, azali mwasi ya ndumba. Sikawa, bososoli sikawa eloko nini nguya ezali? Ngu—nguya, nde oyo yango elingi koloba, nyama. Ye mwasi yango alataki motane. Sikawa, ekokaki kozala nyama ya lolenge nini? *Motane*, wana ekokaki kozala nguya ya “bozui”. Sikawa, oyo ekozala lingomba ya lolenge nini? Azali lingomba ya bozui, azali lingomba monene, azali lingomba ya nguya, pe azali na boyebani likolo na bato ebele mpenza. Pe bakonzi ya mokili basali na ye píté ya molimo, elingi koloba bato minene ya mokili oyo. Sikawa, tokomona nani ye azali, sima na miníti moke, pe tokoyeba makambo ya denomination yango.

Pe mwasi yango alataki elamba ya motane (ya bokonzi), . . . alataki elamba ya balangi ya motane-bulé pe motane makasi, . . . akémbisi nzoto na wólo pe mabanga ya talo . . . paúni, na loboko na ye, asimbi kopo ya wólo etóndá na bosoto pe mbindo ya píté na ye;

⁴² Asimbaki nini na loboko na ye? Mateyo na ye, oyo azali kolakisa na bato: “Tozali Lingomba. Tozali oyo *boye*.” Pe asali ete bakonzi ya mokili bálángwa elongo ná ye, ndenge wana. “Tozali oyo *boye*. Tozali nguya monene! Tozali koyángela bikólo nyonso. Tozali lingomba ya monene koleka. Bóya, bómela oyo ya biso . . . Tala, sopá mwa ndambo. Yo mela yango. Yo mela yango.” Yango mpenza, bomoni. Pe na loboko na ye, asimbaki kopo. Bótala.

Pe mwasi yango alataki elamba ya balangi ya motane-bulé pe motane makasi, . . . akémbisi nzoto na wólo pe mabanga ya talo pe paúni, na loboko na ye, asimbi kopo ya wólo etóndá na bosoto pe mbindo ya píté na ye:

⁴³ Sikawa, baninga, tozali kotánga zulunále moko ya mokolo na mokolo te. Tozali kotánga nde Liloba na Nzambe ya Seko pe oyo epambolámá. Likolo na nse nyonso ekoleka, kasi Liloba yango ekotikala. Ya solo.

Pe na elongi na ye nkombo moko ekomámá, kútu, nkombo nde ekomámá, LIBOMBAMI, BABILONE MONENE, MAMA YA BANA BASI YA NDUMBA, MBINDO YA MOKILI.

⁴⁴ Sikawa, eleki mwa ntango awa, nandimi te ete ezalaki na losambo awa, kasi nateyaki liteya oyo, *Likomi Likolo Na Etutú*, pe natalisaki ngámbo ya istwáre ya Babilone. Sikawa, ba-izme nyonso oyo esilá koya, kosambela nyonso pe ba-izme nyonso oyo ezali na mokili lelo, ebandaki na Genese. Sikawa, soki ozui búku ya Hislop oyo *Babilone Mibale*, soki olingi kolandela yango na istwáre, to babúku mosusu oyo ya malamú wana, okoki ata komona izme nyonso oyo olingi. Nakozongisa bino kuna sima

na miníti moke, kolobela na ntina na basi batei, bomoni, pe nakotalisa bino epai yango ebandaki liboso, bomoni, kuna na Genese. Pe na ntina na makambo ndenge na ndenge oyo, ndenge ebandelaki na Genese. *Genese* elingi koloba “ebandeli.” Bato boni bayebi ete ezali ya solo? Genese ezali ebandeli. Na bongo, biloko nyonso oyo ezalaka, esengelaki kozala na ebandeli.

⁴⁵ Soki natali nzete. . . Nazalaki na zamba eleki sanza misato, soko mibale. Nakomona nzete, kotala kitoko na yango. Nakomona yango, ekwei; mosusu ebotami na esika na yango, kokóba ya bomoi. Pe nakobanda kokanisa likambo yango. Kasi na esika moko boye, nzete yango ezalaki na ebandeli. Esengelaki kozala na ebandeli. Pe nzela bobele moko oyo ekokaki koponama kozala nzete, to kozala nzete ya chéne, to ya hétre, to ya peuplier, to ya mbíla, to eloko soko nini yango ezalaki, Mayele moko ya monene mpenza esengelaki kozala na sima na yango. To, soki ezalaki bobele moko, ezalaki nzete ya chéne moko, mokili mobimba elingaki kotónda bobele na banzete ya chéne. Kasi Eloko moko, ya monene, Mayele ya monene mpenza, esengelaki kotia yango na alimá.

Nkombo na Ye Mosantu épambolama! Azali Ye Oyo atiáka sanza ná minzoto zonga-zonga na mói. Atiá biloko nyonso na alimá. Pe Akotia Lingomba na Ye na alimá. Ekobaluka bobele ndenge oyo Ye alingi ete Ábaluka; esti, westi, nordi, to sudi, to oyo nyonso Ye azali. Ntango tokoki kobimisa makanisi ya denomination na milimo na biso pe komibwaka mobimba na Kalvari. Akotia yango na alimá, soki tokoki bobele kotosa lokola ba-nzete ná bikelamu na Ye mosusu. Bomonaka ata moke te sanza koloba: “Na mpokwa ya lelo, nakongenga te. Minzoto mosusu na kati na bino bóngenga na esika na ngai.” Kasi biso, oh, tozali ndenge mosusu, bomoni.

⁴⁶ Sikawa, Babilone, bótala ndenge Babilone emonani. Emonani na ebandeli ya Biblia. Emonani na katikati ya Biblia. Pe emonani na suka ya Biblia. Sikawa, likambo moko ezali. Sikawa, ebandaki ná Nimrod. Nimrod moto atongaki Babilone na Lobwaku ya Shinear, mpenza pene na katikati ya Ebale ya Tigre ná ya Efrate. Pe Efrate elekanaki na kati na yango. Pe—pe banzela nyonso, na kati ya ekólo yango, ezalaki komema sémba kino na Babilone. Pe bikuke na yango nyonso ezalaki na monene ya métre ntuku motoba, bikuke yango esalemaki na motáko. Pe soki okoti na engumba ya Babilone, balabala nyonso ezalaki komema sémba kino na gwende.

⁴⁷ Sikawa, okoki kokende na Roma lelo, pe nzela nyonso ekomema sémba kino na Roma. Pe ngondo Maria moko ya moke ateleme na matákanelo nyonso, epai nzela ebaluki, ná bebé Klisto na maboko, azali kotalisa na ngámbo ya Roma. Bomoni? Emonani na ebandeli ya Biblia; emonani na katikati ya Biblia; pe yango oyo na suka ya Biblia.

Sikawa, nalingi kokoba kotánga, mpo na miníti moke, mpo bózua moboko ya likambo oyo. Bomoni? Malamu. “Pe namonaki mwasi yango,” sikawa bótala malamau, “lingomba.” Soki omoni *mwasi*, kanisa “lingomba.” Bomoni?

...namonaki mwasi yango alángwe makila ya basantu,...

48 Sikawa, liloba oyo *mosantu* euti wapi? Liloba oyo *mosantu* euti na “oyo asantisami,” to “oyo abulisami,” asantisami. Malamu.

...namonaki ye alángwe makila ya basantu,...

49 Sikawa, soki mwasi yango azali lingomba, anyokolaki basantu. Pe azali lingomba oyo eleki monene mpenza. Azali na bokonzi na mokili mobimba. Azali likolo na bibebe ya mái. Pe azali... Bakonzi ya mokili bazali kosala na ye pité. Ee, ezali nani? Ezali mwa libombami. Sikawa, Molimo ako... Boyebi, lingomba esengeli kozala na makabo ya molimo libwa; bwanya epai na moko, mosusu mpo na kososola, mosusu mpo na lobiko na nzoto, pe mosusu mpo na *bongo na bongo*.

...pe na makila ya batatoli ya Yesu:...

50 Ezali lokola bazalaki kotalela mpenza makambo Yesu alobaki te. Bazalaki nde kotalela makambo lingomba ezalaki koloba. Ya solo. Pe ezali na yango malamau, pe.

...pe ntango namonaki ye, nakamwaki mingi mpenza.

51 “Nakamwaki mingi mpenza. Na...Ezalaki na li—li—likambo moko ya kokamwa na ntina na ye, nakamwaki ndenge ye...” Sikawa, tika námitia na esika ya Yoane pe námeke kofungola yango mwa moke, bomoni. Yoane alobaki: “Afandi wana. Azali komibenga lingomba ya Baklisto. Azali na makoki ya kozua ba-mbongo nyonso ya mokili. Bakonzi ya mokili bazali na makolo na ye. Azali mozui, pe oyo ebetaka miso, kasi ndenge nini akoki kozala ya kolangwa na banyokwami ya Yesu? Ndenge nini akoki konyokola basantu? Ndenge nini akoki koboma banyokwami ya Klisto? Pe nzokande azali komibenga Moklisto, lingomba ya Baklisto.” Sikawa bótala malamau.

Pe mwanje yango alobaki na ngai, Mpo na nini okamwe? Nakoyebisa yo libombami ya mwasi yango, pe ya nyama oyo ememi ye, pe oyo ezalaki na...mitó nsambo pe maséké zomi.

52 Sikawa, oyo ezali na yango litánga ya pete mpenza. Bósosola yango. Ekozala mpenza pete.

Nyama oyo omonaki ezalaki, kasi ezali te; pe ekokita...ekobima na libulu mozindo, pe ekokende na libebi: pe bato oyo bafandi na mokili bakokamwa, baoyo bankombo na bango ekomamaki na búku na bomoi longwa na ebaneli ya mokili te, ntango bamoni...

ntango ba—ntango batalaki nyama oyo azalaki, oyo azali te, kasi azali.

⁵³ Sikawa, likambo oyo esengeli koswa solo, boye tala yango oyo. Alobaki, sikawa bótala, ete: “Ntango baoyo nyonso,” kaka ndambo ya bato te, kasi, “baoyo nyonso bafandi na mokili bakokamwa.” Bango nyonso bakokamwa. Mokili mobimba ekokamwa na ntina na mwasi yango. Ezali bobele na etonga moko oyo ekokamwa yango te, ezali baoyo bankombo na bango ekomámá na Búku na Bomoi ya Mwana Mpate.

⁵⁴ Sikawa, ekozala malamú nákotisa likambo oyo pe awa, mpo tokolobela yango na miníti moke. Bomoni? Bankombo na bango ekomamaki na Búku na Bomoi ya Mwana Mpate na ntango nini? Longwa na (Ntango nini?) mayangani ya kolamuka ya suka oyo bakendeke? na mpokwa oyo bakendeke na etumbelo? Na mpokwa oyo bakomaki bandimi ya lingomba? Nazali koluka kosala bino mpasi te. Kasi, nazali koyebisa bino, Biblia elobi: “Bankombo na bango ekomamaki na Búku na Bomoi ya Mwana Mpate longwa na bozalisi ya mokili.” Bongo mpenza! Na ntango Nzambe, na ebandeli, amonaki ete Akotinda Mwana na Ye, pe Akozua esika ya mosumuki, ntango Makila ya Mwana na Nzambe esopanaki. Biblia elobi ete Makila na Ye esopanaki liboso ete mokili ézalisama. Bato boni bayebi ete Biblia elobi yango, ete “Makila ya Klisto esopanaki liboso ya bozalisi ya mokili”? Ntango Makila yango esopanaki, enama nyonso ya Nzoto, baoyo bankombo na bango ekomamaki na Makila wana, na Búku na Bomoi ya Mwana Mpate, na kozalisama ya mokili. Eloko nini yango ókobanga boye? Oh, ndeko! Yango efungolaka bikuke, boye te?

⁵⁵ Ee, sikawa, tótánga oyo awa, mpo tómona soki oyo ekomami ezali ya solo. Bomoni? “Pe mwanje yango alobaki na ngai: ‘Mpo na nini. . .’” Nakanisi ezali molongo ya 8: “Pe nyama oyo omonaki. . .” Malamú. Ezali yango.

Nyama oyo omonaki ezali, kasi ezali te; pe ekobima na libulu mozindo, . . .

Sikawa, tokozonga wana, kasi nalingi kozua oyo mosusu, mpo tokolobela yango.

. . .pe ekokende na libebi: pe bato oyo bafandi na mokili bakokamwa, baoyo bankombo na bango ekomamaki na búku na bomoi longwa na ebandeli ya mokili te, . . .

⁵⁶ “Ekozala na bato mingi na mokili,” na elobeli mosusu, “oyo bakopengwisama,” mpamba te, apengwisaki bango. Pe ezalaki na etonga bobele moko oyo epengwisamaki te, pe wana ezalaki baoyo nkombo na bango ekomamaki na Búku na Bomoi longwa na ebandeli ya mokili. Tokolobela yango sima na mwa ntango.

⁵⁷ Sikawa bótala mwasi yango, lingomba, azalaki “*Libombami, Babilone*.” Tomoni ye komonana na nzela na Nimrod. Mwango

ya Nimrod ezalaki nini? Nimrod atongaki engumba moko pe asalaki ete bingumba mosusu nyonso ébanda kofuta mpáko na engumba yango. Tokoki komona likambo ya ndenge wana lelo? Esika ya ndenge wana ezali lelo? Lingomba moko ezali, oyo ezali na bokonzi likolo na bikólo nyonso ya mokili? Ezali. Ezali na esika moko lelo, oyo efutisaka bikólo nyonso mpáko epai na yango? Esika moko ezali?

Tókoba pe totánga oyo etikali, mwa moke, mpo bósosola mobimba na yango. Malamu.

. . . oyo bamonaki *nyama* oyo *azalaki*, . . . *azali te, kasi azali*.

Awa nde esengeli kozala na makanisi oyo ezali na bwanya.

⁵⁸ Sikawa, bato boni bayebi ete bwanya ezali moko na makabo ya Molimo? Sikawa, boye Azali koloba na etonga nini? Esengeli kozala ete Azali koloba na etonga oyo ezali na ma—makabo ya Molimo oyo esalaka kati na Losambo oyo.

. . . *awa nde esengeli kozala na makanisi oyo ezali na bwanya.*

⁵⁹ Sikawa, bótelema wana, bokomona yango na kati ya bileko nyonso ya lingomba awa. Azali kotalisa yango, Molimo Mosantu nde azali koloba yango, ndenge makabo yango ekosala na ntango ya suka. Sikawa, tozali na makabo ya kobikisa nzoto, oyo ezali kosala. Oh, ezali—ezali kotambola malamau. Ee, ndeko, makabo mosusu pe ezali. Oyo wana ezali bobele moko na yango. Oyo wana ezali bobele eloko moko ya moke. Ee, likabo ya monene, oyo eleki yango na mosika, yango oyo awa. Oyo wapi eleki malamau, likabo ya Molimo Mosantu ya bwanya, ya kosangisa Liloba na Nzambe pe ya kotalisa Lingomba esika totelemi, to bobele ya kosala ete moto ábikisama na nzoto? Biso nyonso tolingaka kozala na nzoto kolongonu. Kasi, nakolinga kutu molimo na ngai ézala na kolongonu, na esika nzoto na ngai ézala kolongonu, ntango nyonso. Oh! la la!

Bóyoka Molimo Mosantu koloba na nzela na Yoane, na esanga ya Patamo, alobaki: “Awa nde esengeli kozala na bwanya. Tika áyoka Likambo oyo.” Sikawa, tozali kotalisa likambo moko awa. “Awa nde . . .”

Awa nde esengeli kozala na makanisi oyo ezali na bwanya. Mitó wana nsambo ezali ngomba nsambo, epai mwasi yango afandi.

⁶⁰ Engumba ezali bobele moko, oyo ngai nayebi, na mokili . . . Bingumba ezali mibale, oyo ngai nayebi, oyo ezali na ba-ngomba nsambo to koleka na kati na yango. Cincinnati ezali moko na yango, epai oyo lisolo ya lisapo ya Cincinnati elobamá. Ezali ya mama mbua ya zamba, boyebi, oyo . . . pe bongo na bongo. Kasi

ezali na yango koleka sambo. Kasi lingomba moko te ezali na bokonzi likolo na Cincinnati.

Ezali na esika bobele moko na mokili mobimba, oyo ezali na lingomba oyo efandi likolo na ba-ngomba nsambo, oyo ezali na bokonzi likolo na mokili mobimba. Sikawa, nauti kuna. Makambo wana nyonso.

Pe namoni kuna esika elobi: “Awa nde makanisi ya bwanya.” Emoniseli 13. “Moto oyo azali na bwanya átánga motángo ya nyama yango, mpamba te ezali motángo ya moto.” Ya bato ebele te, ya etonga ya bato te, kasi ya moto “moko.” “Pe motángo na ye ezali nkama motoba na ntuku motoba na motoba.”

⁶¹ Nayokaka mbala mingi elobamaka, ete likolo na ngwende ya pápa wa Roma, bakomá “VICARIVS FILII DEI.” Namituná mbala mingi soki ezali ya solo. Tiá mokolóto, pe bóngola yango na mituya, na mituya ya ba-Roma, pe tálá soki ezali bongo. Ezali mpenza ya solo. Nazalaki mpenza pene na motóle misato ya pápa *boye*, ezalaki na kati ya talatála: “Bokonzi likolo na lifelo, lóla pe epóngelo.” Bomoni? Boye, makambo yango, nauti kuna, nauti na Roma pe nayebi ete ezali solo. Sikawa toyebi ete yango elimboli ye.

Pe bótala bakonzi nsambo: mitano basílá kokwea (baoyo bazaláká na eleko wana), *moko azali* (ezali oyo asengelaki koya, elingaki koloba Kaisala), *pe mosusu ayei* naino te (elingaki koloba Erode, oyo azalaki moto na nkanza); . . .

⁶² Sikawa, bótala malamumu. Bótala ndenge yango ebongi be.

. . . pe ntango akoya, asengeli koumela ntango moke.

⁶³ Moto moko ayebi soki bokonzi ya Herode eumelaki ntango boni? Sanza motoba. Abendaki mama na ye na mabelé, akangisaki ye na yenda ya mpunda. Atumbaki engumba; pe akoselaki Baklisto likambo yango. Pe azalaki kobeta nzenze likolo na ngomba, ntango bango bazalaki. . . wana engumba ezalaki kozika. Sanza mo—motoba. Pe, bomoni: “Pe nyama yango. . .” Sikawa bótala malamumu, bótala ndenge azalaki moto na yauli. Bomoni? Sikawa bótala malamumu.

Pe nyama oyo ezalaki, pe ezali te, ata. . . ezali ya mwambe, pe ezali ya nsambo (azali na lolenge ya oyo ya nsambo), *pe ezali kokende na libebi.*

⁶⁴ Moto nyonso ayebi soki *libebi* elingi koloba nini: ezali “lifelo.” Pe bótala epai autaki: na “lifelo.” Ezali nini? Libulu mozindo. Moboko moko ezali te mpo na Mateyo ya lingomba Katoliko. Ezali na Biblia moko te mpo na mateyo ya lingomba Katoliko. Eloko moko lokola Biblia mpo na mateyo ya lingomba Katoliko ezalaka te, ata moke te. Balobaka yango pe te. Sángó azalaki kuna, mwa sánzó oyo awa na losambo ya Sacré-Coeur ayaki wana. Alobaki: “Oh, ye. . .” Nazalaki kosolola na ye

na ntina na libatishi ya Mary Elisabeth Frazier. Alobaki: “Oh, obatisaki ye ndenge lingomba Katoliko ya ebandeli ezalaki kobatisha.”

Nalobaki: “Esalaki yango na eleko nini?”

Alobaki: “Na kati ya Biblia, Biblia na yo.”

⁶⁵ Nalobaki: “Lingomba Katoliko ezaláká kobatisha bongo? Oyo wana ezali malakisi ya lingomba Katoliko?”

“Iyo.”

⁶⁶ Nalobaki: “Lokola lingomba Katoliko esalaka libunga te, mpo na nini ebongwani mingi boye?” Bomoni?

⁶⁷ Alobaki: “Ee, omoni, bino nyonso bondimaka Biblia. Biso, tondimaka lingomba.” Bomoni? “Tolandaka oyo Biblia elobi te. Tolandaka nde oyo lingomba elobi.” Ya solo mpenza. Soki mokolo moko bokutani na likambo yango, bómeka yango kaka, bomoni. Balandaka oyo Biblia elobi te; etali yango na likambo moko te. Balandaka nde oyo lingomba elobi. Bomoni?

⁶⁸ Kasi biso tolandaka oyo lingomba elobi te. Tondimaka oyo Nzambe alobi. Amen. Mpamba te na Biblia, ekomami: “Tika ete liloba ya moto nyonso ézala lokuta, pe oyo ya Ngai ézala Solo.” Yango wana biso tozali denomination te.

⁶⁹ Sikawa bótala malamau. Bóyoka likambo oyo mwa moke. “Bakonzi mitano oyo bazalaki, basíla kokweya, bakonzi mitano.” Soki bolingi lisitwale oyo elobeli yango, nakolakisa bino yango. “Moko azali, pe moko akoya.”

Sikawa bótala malamau, “nyama.” Sikawa, nyama yango azalaki mokonzi te. Azalaki “oyo azali, azali lisusu te; nzokande azali, pe azali lisusu te; kasi azali, pe azali lisusu te.” Ezali nini? Bokitani ya ba-pápa, bokonzi moko, nyama moko nde azali kokonza. Na ntango wana nde Roma ya bopakano ebongwanaki pe ekómaki Roma ya bo-pápa. Roma ya bopakano ebongwanaki, na sima ekómaki bo-pápa, elingi koloba, bazuaki pápa na esika ya mokonzi moko, pe pápa azali mokonzi ya molimo. Ntina wana nde azalaka na motóle, mokonzi ya molimo, amibengi mokitani ya Yesu Klisto. Yango mpenza. Sikawa bótala.

⁷⁰ Tokomonisa polele mateyo ya ba-Katoliko yango pe kotalisa bino ndenge nini ekotaki na kati ya mangomba Protestant, bomoni, ndenge azali naino mpenza na kati ya lingomba Protestant, mingi kati na yango. Ekeseni mpenza na Biblia, ekeseni na yango na mobimba. Sikawa: “Nyama oyo azalaki, oyo azali lisusu te.” Sikawa bómikanisela: “Baoyo nyonso bafandi na mokili bakopengwisama, baoyo nkombo na bango ekomamaki te longwa na ebandeli ya mokili.” Tótala naino.

Pe nyama oyo ezalaki, pe ezali te, (molongo ya 11) kasi azali ya mwambe, pe . . . ya nsambo, pe azali kokende na libebi. (Akokoba kino akokóma na mabúlú mozindo, na suka ya nzela.)

Pe maséké zomi oyo omonaki ezali bakonzi zomi, . . .

Sikawa bótala malamau awa. Soki bolingi komona likambo moko ya kokamwisa, bótala malamau likambo oyo.

. . . ezali bakonzi zomi, oyo bazui naino bokonzi te; kasi bazali kozua bokonzi lokola bakonzi mpo na ngonga moko elongo na nyama.

⁷¹ Bazali bakonzi oyo balátisami mitóle te; bazali ba-diktatére. Bomoni, batikálá kolatisama mitóle te, kasi bazali kozua bokonzi lokola bakonzi, ngonga moko, na ntango ya bokonzi ya nyama yango. Wana ezali bobele na mwa ntango ya molili oyo tozali kobika kati na yango sikawa, nde ba-diktatére bazali kobima. Bomoni? “Bazali kozua bokonzi lokola mokonzi, ngonga moko elongo na nyama.” Sikawa, malamau.

Bango bazali na likanisi bobele moko, pe bakopesa bokonzi pe nguya na bango na nyama.

Bango bakobunda etumba na Mwana Mpate, pe Mwana Mpate akolonga bango: (Nkembo!) mpamba te azali Nkolo na nkolo, pe Mokonzi na bakonzi: pe baoyo bazali elongo na ye babengami, baponami, pe bato na bosembo.

⁷² Nakosepela kozala na makoki ya koteya liteya moko sikasikawa likolo na yango: “Baponami, liboso na kozalisama na mokili, oyo batikali na bosembo kati na mbélá na bango.” Aleluya! Ezali bongo. “Babengami baponami, pe bato na bosembo.” *Pe ezali likangisi, bomoni: “Baponami, pe bato na bosembo.”* Bakolónga ye. Ata bakomi monene ndenge nini.

⁷³ Pe communisme monene oyo, makambo ya communisme oyo tozali na yango lelo, bómitungisa na ntina na yango te. Yango ezali mpenza esalelo na maboko ya Nzambe. Nakoki kotalisa yango polele na nzela na Biblia oyo. Akonyokola mwasi yango mpo na banyokwami moko moko oyo asílá koboma. Iyo, misie. Bótala malamau, bakonzi nyonso oyo bakoyokana, pe bakoyina mwasi yango. Pe communisme ékopanzana na ekólo mobimba, na mokili mobimba. Ee, yango esengeli kozala Nzambe na kati ya likambo yango, mpo na kopesa ye etúmbu. Olobi: “Zela naino, Ndeko Branham. Communisme, Nzambe na kati ya likambo yango?” Ya solo, na ntembe te, ezali Nzambe na kati ya likambo yango. Biblia elobi bongo. Kasi ezali komema na kosakola kosambisama likolo na bayini na Nzambe pe babúki mibeko na ndenge ya nsóni. Eloko nini etikali na mokili oyo? Tozui eloko nini? Tala, mokolo mosusu. . .

⁷⁴ Nakotelema mwa moke na liteya na ngai, soki nakokoka. Nazalaki kotánga eteni moko ya Makomi epai wapi mwana makángo akokota na eyanganelo ya Nkolo te kati na mabota zomi na minei. Bato boni bayebi yango? Ezali solo, Dutelonome 23; mwana makángo. Soki mwasi azuami kati na elanga, elingi koloba mosika na kobatelama ya mobali, pe mobali moko azui

mwasi yango na makasi, mobali yango akosengela kobala ye. Ata soki akómi mwasi ya ndumba, asengeli kobika elongo na ye mwasi yango kino ye mobali ákufa. Pe soki mwasi yango abali ye, pe alobi ete azali mongondo, nzokande azali yango te, boye akoki kobomama mpo na yango. Pe soki mobali ná mwasi oyo babaláná, pe baboti mwana makángo, mwana yango akokota na eyanganelo ya Nkolo te, kino na libota ya zomi na minei. Pe mibu ntuku minei ezali libota moko. Ekozala mibu nkama minei liboso lisumu yango ébima na Yisraele.

⁷⁵ Nzambe ayiná lisumu! Ndenge nini okanisi ete okoki koniata Makila Mosantu ya Nkolo Yesu, kaka mpo osambelaka na denomination moko boye, okanisi okokóta? Ekosengela óyela na ndenge oyo Nzambe asengi, soki te, okokota ata moke te. Ya solo. Ózala mosungi, motei, to oyo nyonso oyo tokoki kozala, etali yango na eloko moko te. Okoyela na ndenge oyo Nzambe asengi.

⁷⁶ Mabota zomi na minei. Moto yango azali awa sikawa, oyo azalaki kotiana ntembe na ngai na ntina yango. Alobaki: “Na boye ndenge nini tokoyeba nani akobikisama?”

⁷⁷ Nalobaki: “Wana nde esika oyo osengeli kozala Calviniste ya malamú.” Nkombo na yo etiamaki na Búku yango liboso na kozalisama ya mokili. Nzambe andimaka molongo ya makila wana. Oyo wana etali Ye. Bomoni?

“Kasi yango etali yango . . .”

⁷⁸ Boyoka. Bino bilenge, lelo, nayebi te soki boyaka na losambo oyo, to soki bouti wapi, bino bilenge mibali pe bilenge basi. Bozali kososola: makambo oyo bozali kosala, soki libota mosusu ekoya sima, bana na bino bakosambisama mpo na makambo oyo bino bozali kosala? Bozali na limemia ya bomoto te? Bino bilenge basi oyo kuna bozolatáká mwa ba-kupe oyo ná biloko ya ndenge wana, boyebi, ekomonisama na mwana na yo ya mwasi. Oyebi ete nkóko na yo ya mwasi azalaki na mo—mobulu, pe ete mama na yo azalaki mobini na nganda, yango wana lelo oyo ozolaka bilamba ékolakisa nzoto na yo? Ya solo. Bana na yo bakozala ndenge nini? Iyo, misie. Nzambe alobaki ete akolandela etumbu ya lisumu ya nko ya baboti epai na bana pe bana na bango, kino na libota ya misato pe ya minei.

⁷⁹ Pe ozali kososola, ndeko na ngai ya mobali, ete ntango nyonso osalaka makambo oyo ezali malamú, yango ekolanda bana na yo?

⁸⁰ Bótala awa, tózua Baebete, mokapo ya 7. Biblia elobi, ntango—ntango Melekisedeke akutanaki na Abraham, wana autaki kolóngá mokonzi, pe apambolaki ye, pe Elobi sikawa: “Levi . . .” Azali kolobela likambo ya kofuta moko na zomi. Elobaki: “Yawe apesaki na Levi etinda ya kozua moko na zomi kouta na bandeko na ye. Pe Levi, oyo azalaki kozua moko na zomi, afutaki moko na zomi, mpamba te azalaki naino na mokongo ya Abraham ntango akutanaki na Melekisedeke.” Pe

Abraham azalaki tata ya nkoko na ye. Abraham abotaki Isaka, Isaka abotaki Yakobo, Yakobo abotaki Levi; Levi, tata, nkóko, tata ya nkóko. “Pe wana Levi azalaki na mokongo ya Abraham,” Biblia elobi: “afutaki moko na zomi epai na Melchisedek.” Aleluya!

⁸¹ Bótika moto moko te áyebisa bino ete likambo soko nini na mokili oyo ekoki kopekisa likálo monene ya Nzambe. Ezali kokoba kokende liboso! Ebongisamaki bongo kuna na ebandeli. Ezali na molimo mabe moko te, to milimo mabe ya kokoka oyo ekoki kopekisa Mwango na Ye.

⁸² Sikawa, Biblia elobi te ete afutaki yango “na mobimba mpenza te”. Biblia elobi: “Afutaki moko na zomi”, ntango azalaki na mokongo ya tata ya nkóko na ye. Nkembo! Wana nde Nkolo na ngai. Oh, Ayebaki yango, liboso kútu mokili ésalema. Ayebaki makambo nyonso. Pe na kati ya Abraham, afutaki moko na zomi.

⁸³ Pe ndeko mwasi, ndeko mobali, ndenge nini okoki kotambola awa, bato bazali kobika pe kotambola na basi ya bato, pe basi bazali koboma mabala, kobika bomoi oyo bozali kobika, eloko nini bókozela kozua na libota oyo ekolanda? Bótala oyo yango ezali. Ekomi sikawa eloko mosusu te bobele bana makángo, oyo babotami na bosoto, etóngá ya libebi. Pe etikali bobele eloko moko mpo na yango, ezali nde eleko atomik oyo tozali kobika kati na yango. Ya solo mpenza. Tokómi na ntango ya suka.

⁸⁴ Na ntongo oyo, kuna na bangomba ya Kentucky, elenge mobali moko kuna, okokaki kopusana métre misato pene na ye te, asalaka potopóto ya sukali ya sorgó. Ntango mosusu ayebaki mpenza te bokeseni kati na loboko ya mobali ná ya mwasi te. Ntango ayokaki. . . Nautaki kokota na esika moko oyo epekisámá kokota. Nayebaki esika nazalaki te. Nazuamaki kaka na kati ya mabwaku moko boye. Nazalaki kokende kuna mpo na bokila ya biséndé. Pe wana efandaki ngai kuna, nabandaki kosolola na ye. Pe mwana mobali yango alobaki ete azalaki kokende mosala ya sodá. Pe esalemaki ete, tokómaki kosolola na ntina na Nkolo, pe ye alobaki: “Motei, ondimi te ete tokómi na ntango ya suka?” Mosika mpenza sima kuna na ba-ngomba.

⁸⁵ Nalobaki: “Na ntembe te, ezali bongo. Na ntembe te, mwana, tokómi na ntango ya suka.”

⁸⁶ Tala tokómi. Nde ntango oyo tozali kobika kati na yango, ndeko. Tokómi na esika yango. Bozali komona te ndenge bamamá ya kala, ná batatá, ndenge bazalaki kobika, pe bankóko ya mibali ná bankóko ya basi? Bozali komona te ndenge tatá ná mamá babikaki? Ékokamwisa te, ndenge tokómi na makambo ya kopola lelo. Ékokamwisa te, okoki koteya makasi ata ndenge nini; bakolata ba-kupe kaka ndenge moko, pe bakobwakela yo nsoi na elongi. Bakomela makaya pe kobwakela yo milinga, pe koloba: “Kipé makambo na yo moko.” Mpo na nini? Mpo

yango nde ekolo oyo babimeli. Nakolobela yango, na mbala moko: *Momboto Na Nyoka*. Tokomona epai oyo ye azali kokótela, komona mpo na nini basalaka bongo. Bazali bana ya zabolo longwa na kozalisama ya mokili. Ya solo. Pe tozali na eloko moko te, oyo etikali, boye, kosambisama nde eloko bobele moko oyo etikali. Tokoki kozua eloko mosusu te, bobele kosambisama. Nzambe akosasa eloko yango mobimba. Pe bato basali likambo yango bango moko. Nzambe moto akánaki te ézala ndenge wana, kasi Ayebaki ete ekokóma ndenge wana. Yango nde ntina oyo Alobaki ete “Akopengwisa baoyo nyonso bafandi na mokili, longola bobele baoyo ba-nkombo na bango etiámá na Búku na Bomoi ya Mwana Mpate liboso na kozalisama ya mokili.”

⁸⁷ Tótala yango malamú. Tótánga mwa mosika koleka sikawa. Sikawa, boye nakanisi tokómi na molongo ya 12.

Pe maséké zomi oyo omonaki ezali bakonzi zomi, oyo bazui naino bokonzi te; kasi bazali kozua bokonzi lokola bakonzi mpo na ngonga moko elongo na nyama.

Bango bakozala na likanisi bobele moko, pe bakopesa bokonzi pe nguya na bango na nyama.

Pe bango bakobunda etumba na Mwana-mpate, pe Mwana-mpate akolonga bango: mpamba te azali Nkolo na nkolo, pe Mokonzi na bakonzi: pe baoyo bazali elongo na ye ba—babengami, baponami, pe bato na bosembo.

Pe alobaki na ngai, Mai oyo omonaki, epai mwasi ya ndumba afandi, ezali bato, . . . mingi, . . . mabota, pe minoko.

. . . maséké zomi oyo omonaki, ná nyama, ekoyina mwasi ya ndumba, . . .

⁸⁸ Bótala yango malamú sikawa, “maséké zomi,” yango, bokonzi zomi yango. Bomoni, wana nde makambo nyonso ékozua esika, ndenge oyo ba-diktatére bazalaka. Bótala lolenge oyo ba-diktatére bamemelaka makambo. Bamemaka yango epai wapi? Bó—bótangela ngai diktatére bobele moko, oyo amemaka makambo ngambo ya komunisme te. Bomoni? Pe bakosala (nini?) bakoyina “mwasi ya ndumba yango,” mwasi, lingomba. Kasi nini? Bótala eloko oyo yango ekosala.

. . . ekoyina mwasi wana ya ndumba pe ekobebisa ye, ekolia misuni na ye pe ekozikisa ye na móto.

⁸⁹ Bakopanza mpenza eloko yango, ya solo mpenza, kaka ndenge natelempi awa. Soki bobele tozalaki na ntango ya kolobela likambo yango, ya lingomba yango, pe kolandela yango mpenza na kati ya Makomi, epai Elobi, bótánga: “Bakonzi nyonso ya mokili, pe bakúmbi masuwa nyonso, pe bango nyonso, bakolela, mpo Babilone monene ebebisami na ngonga moko mpamba.” Na ngonga moko, ntango na ye ekokaki! Pe, oh, ndenge Elobi: “Bósepela, bino basantu, pe bino nyonso

basakoli ya búle, mpamba te Nzambe apesi ye etúmbu mpo na makila ya basantu pe ya bandeko na bino.” Bomoni, ya solo. Na ntembe te, communisme ezali mpenza esalelo na maboko ya Nzambe. Bobele ndenge Mokonzi Nebukadenezare azalaki esalelo na maboko, mpo na koya komema Bayuda wana, ntango batangwaki! . . . ? . . .

⁹⁰ Lisumu ekoki kokoba kobebisa, momboto ya boyengebene ekoki koumela wana pe momboto ekoki kokoba kobeba, kobeba, kobeba, kino, sima na mwa ntango, ezali lisusu te. Ekomaka na esika moko boye, lokola bamamá ná batatá na bango pe bongo na bongo, oyo babikaki bomoi bongo liboso na biso, pe na lolenge wana, kino eloko moko te etikali mpo na biso. Pe boyebi likambo nini Yesu alobaki? Ete soki Áyeisaka mikolo mokuse te, mosuni ata moko te elingaki kobika.

⁹¹ Bozomona? Bozomona mpo na nini tozali na makambo yango (Nazali kopamela te.) Lokola ba-Arthur Godfrey, ná bamosusu, boyebi, bomoni, pe ba- Elvis Presley, ná—ná koningisa lokéto, ba-salopéte, ná suki ekitá tééé na kingo, ná makambo nyonso wana, ndenge bilenge yango basalaka? Eloko nini esalaka yango? Ezali nini? [Ndeko Branham abeti eteyelo mbala zomi na moko—N.D.E.] Ezali mpo euti na etonga moko ya bana makango oyo babikaki liboso. Eloko moko etikali te! Oh, bakotelema pe bakoyemba: “Nzambe na ngai, pene na Yo,” lokola Ernie mobúki nkúnde, ná bamosusu nyonso, ndenge wana, bakoyemba loyembo moko boye, pe bongo na bongo, ndenge wana. Ndeko, oyebe nini? Oyo wana ezali mpenza bokosi. Iyo, misie.

⁹² Moto oyo alandaka rock-and-roll, boogie-woogie ná makambo ya ndenge wana azali na mosala moko te na eteyelo oyo. Azali na mosala ata moke te sima na eteyelo awa. Oyo ezali mpo na banganzambe, baoyo babengami na Nzambe. Batei oyo babengami na Nzambe nde bazalaka sima na eteyelo awa. Pe awa na sima epesami mpo na bato ya ndenge wana te. Yango nde likambo ná yango lelo, bakomisi losambo eloko mosusu te bobele moziki moko boye. Moziki ezali na yango mabe te, soki olingi kosala yango, etali yo. Kasi tika náyebisa yo, bokeseni ezali monene na komeka . . . kati na moziki pe losambo. Iyo, misie. Soki olingi kosala makambo wana na moziki moko, kosala ba-féti ya ndenge na ndenge pe bongo na bongo, etali yo. Kasi, ndeko, lingomba esengeli kokómbolama longwa na eteyelo kino na eteni ya nse. Ya solo. Nalingi koloba te kokómbola ya kotia maninísa ya sika pe bongo na bongo. Nalingi koloba nde kolamuka ya lolenge ya kala, oyo Nzambe atindi, oyo ekobwaka biloko wana ngámbo na ngámbo. Iyo, misie. Ezali lokola kopelisa mwinda, mwinda ya lotilíki likolo na liboke ya ba-mpese basangani zonga-zonga na eteni ya póme moko. Iyo, misie, bakopalangana soki mwinda epeli.

⁹³ Sikawa bótala malamú: “Bango bazali na likanisi moko, kopesa nguya na bango.” Nakómi na nse na yango sikawa. “Maséké zomi.” Iyo, sikawa.

Mpo Nzambe atii yango na mitema na bango mpo na kokokisa likanisi na ye (yango wana), pe mpo na kokokisa likanisi na bango bobele moko ya kopesa nyama ba-bokonzi na bango, kino ntango maloba na Nzambe ekokokisama.

Sikawa, *pe mwasi oyo omonaki azali engumba monene, oyo ezali na bokonzi likolo na bakonzi nyonso ya mokili.*

⁹⁴ Sikawa, ntina ya kotia mai na monoko ezali te, toyebi ete ezali bokitani ya ba-Katoliko. Ntina moko ezali te ya moto moko. . . Na-nandimaka yango na makasi nyonso ndenge nandimaka ete nayambá Molimo Mosantu. Nandimaka yango mpenza kaka ndenge nandimaka ete nazali Moklisto ndenge natelempi awa lelo, ete bokitani wana ya ba-Katoliko nde—nde ezali. . . Engumba ya Vatican nde ezali e—engumba oyo efandi likolo na ngomba nsambo. Bokitani ya lingomba ezali nyama oyo azalaki, pe azali te. Azali Babilone. Nyonso wana etalisami malamú mpenza, polele mpenza, na kati ya Makomi mobimba. Ezali lingomba Katoliko.

⁹⁵ Sikawa, oyo nde likambo oyo ekosala bino mpasi. Okoloba: “Ee, ókozua ngai te, Ndeko Branham.” Kasi tika natuna yo bobele likambo moko. Tózonga sikawa na molongo ya 5.

Pe na motó na ye. . . ekomámáki, LIBOMBAMI, BABILONE MONENE, MAMA YA BOSOTO. . . MAMA YA BASI YA PITE PE YA BOSOTO YA MOKILI.

⁹⁶ Azalaki nini? Mwasi ya n-d-u-m-b-a. Pe azalaki m-a-m-a. Nini? M-a-m-a. Abotaki eloko moko. Azali mama ya bana mibali? Ya basi ya pité! Mwasi ya pité azali nini? Ndenge moko na—na mwasi ya ndumba: mwasi ya bomoi mabe. Eloko nini epesaki ye bomoi mabe? Mateyo na ye. Azalaki komibenga lingomba ya ba-Klisto, kasi azalaki kokabola biyámbweli ya bato. Pe awa alobi ete azalaki na. . . Soki ye azalaki ebongiseli ya liboso, na bongo emonani lokola bibongiseli mosusu euti nde na ye. Ye nde azalaki mama ya basi ya pité. Boye te? Mama ya basi ya pité. Na bongo, akokaki kozala mama ya bana mibali te. Akokaki te kozala mama ya. . . Asengelaki kozala mama ya basi nde. Pe, soki bazalaki basi, bazalaki mangomba. Sikawa tótala naino. Eloko nini ebimaki na. . .

⁹⁷ Ebongiseli ya liboso ezalaki nini? Lingomba Katoliko. Ebongiseli ya mibale ezalaki nini? Luther. Ebongiseli ya misato ezalaki nini? Zwingli. Yango ebimisaki nini? Calvin. Na sima ba-Anglican bayaki, pe sima na ba-Anglican, ba-Methodiste bayaki. Ba-Methodiste, ba-Methodiste babotaki nini? Alexandre Campbell autaki kuna. Uta na Alexandre Campbell, John Smith abimaki.

Uta... Alexandre Campbell, ye, ezali lingomba ya Baklisto; na sima, elandanaki minei to mitano, lingomba ya Klisto ná masangá mosusu ya mike-mike oyo ebimaki kuna. Na sima, lingomba Batiste eyaki, bitápe ya mike-mike ebele ebimaki uta na yango. Pe uta na lingomba Metodiste... uta na lingomba Metodiste, liboso, ba-Metodiste Wesleyen bayaki, na sima, bakabwanaki mbala minei to mitano. Na sima ba-Metodiste ya lolenge mosusu bayaki, bongo na sima bakabwanaki lisusu, pe ba-Metodistes Libre bayaki. Na—na sima, ba-Nazareen babimaki longwa na oyo wana. Pe longwa na ba-Nazareen kino na ba-Pelerin de la Sainteté, sima na ba-Pelerin de la Sainteté, bakobaki. Masangá ya mike-mike ezalaki kobima ndenge wana, ezalaki kokoba kobima, moko na moko ya ma—masangá mike ya ebandeli wana ekobaki. Pe bango nyonso basalaki nini? Nyonso wana esukaki na lingomba Pantekotiste.

⁹⁸ Bongo lingomba Pantekotiste esalaki nini? Kaka ndenge mama na bango asalaki, bazongaki sima pe bamisalelaki ebongiseli. Pe ekómaki nini? De—denomination. Soki okoti na moko na yango, eloko ya liboso: “Mateyo na yo ezali nini?” Oh, bakolandela yo na nyonso mpenza, bomoni, mpo báyebe oyo yo ozali, oyo yo ondimaka. Pe soki olingi kotambola elongo ná bango mpenza te, ndeko, babengani yo na mbala moko. Pe ezali ya solo.

⁹⁹ Pe kokanisa te ete mpo kaka olobi ozali Pantekotiste nde obatelami. Ndeko, ba-Pantekotiste mingi bakozala libanda na nzela, ndenge moko na baoyo bazali na kati ya nzela, nazondima bongo. Bomoni?

¹⁰⁰ Sikawa, bibongiseli nyonso wana, soki batikaki bobele ete lipamboli ya Pantekote ésala, kozanga kokómisa yango ebongiseli, bobele kobatela yango na bondeko pe kotika Molimo Mosantu nde ákabola. Molimo Mosantu akabolaka. Mokolo moko, Anania ná Safira bayaki, balobaki makambo *boye na boye*; pe Molimo Mosantu alobaki: “Mpo na nini bokosi?”

¹⁰¹ Kasi biso tolobaka: “Tala, oyo wana nde Ndeko Jones, sikawa komeka koloba mabe moko te na ntina na ye, ye moto apesaka mbongo mingi koleka, na lingomba. Nayebi ete azali na Molimo Mosantu; nayóká ye koloba minoko na sika, pe namóná ye kogángá na Molimo.” Etali yango ata moke te, be ndenge moko lokola kosopa nkúnde likolo na loposo ya ngombe, oyo ekaúká. Bomoni? Etali yango ata moke te. Nzambe nde azali na oyo ya koloba. Ye nde akoloba soki ezali bongo to te. Na ntembe te mpenza. Kasi biso totalelaka nde denomination na biso. “Ee, tobengani ye na—na ba-Assemblé, ba-Unitaire balokoti ye. Ba-Unitaire bayambi ye mpo na mwa ntango, pe na sima babengani ye. Mpamba te, bayambi ye kuna, pe ba-Jésus Seul balokoti ye. Ba-Jésus Seul bayambi ye mwa ntango moke, bongo, eloko ekolanda na sima, oyo ekamati ye ezali eglise de Dieu, nde ekamati ye. Eglise de Dieu ya Prophetie balokoti ye, na

sima lisangá ya Tomlinson bazui ye.” Oh! la la! Ndeko, eloko nini lisusu ekoya na sima! Wana nde epai na ba-Pantektotiste, kolamuka ya suka. Pe sikawa, bazali na Móto ya Bleu, pe bazali na basambeli ya mafuta, pe—pe makila na elongi. Pe, oh, mawa, nayebi te esika bakómi sikawa.

¹⁰² Likambo bobele moko, ezali ete eloko yango mobimba esílí kopola. Boyebaki ete Biblia elobaki ete ekopola? Boyebaki ete—ete Biblia elobeli eleko oyo, ekoya, ntango ata bamésá ya Nkolo ekotónda na bisánzi? Pe elobami: “Nani oyo Nakoki koteya malakisi? Nani oyo Nakoki kososolisa ye Ngai? Mpo ezali mobeko likolo na mobeko, likolo na mobeko, molongó likolo na molongó.” Nani Ye akoki koteya malakisi? Baoyo balongolami na mabéle, ya mama. Bomoni?

¹⁰³ Sikawa, ezali na mwasi moko te—moko te, mwasi oyo abébá mpenza na engumba oyo, oyo akokoka te kobota mwana mwasi mongondo. Sikawa, azali bongo na ntango abotami, pe akoki kotambola malamumu. Kasi soki okebi te, lokola mama na ye azalaki ya lolenge wana, mwana mwasi yango, mbala libwa likolo na zomi, akosala mpenza ndenge mama na ye asalaka. Sikawa, boyebi ete ezali ya solo. Mama oyo azali kokamba ndako ekenda nsango mabe, akoki kobota mwana mwasi. Akoki kozala na mibu zomi na motoba, obe péto pe malamumu lokola folólo ya lísi, kasi bobele soki atikali ndenge wana. Kasi, likambo ezali ete, akozonga pe akosala makambo lokola mama na ye.

¹⁰⁴ Boye, lingomba Katoliko ezalaki mwasi ya ndumba ya liboso, ya kala, oyo ayaki ná mateyo oyo ye moko amisalelaki, kisoloka, oyo, Biblia elobi: “Autaki na libulu mozindo pe akozonga na libebi.” Biblia elobi yango. Sikawa, soki batei yango, ezali lokuta. Ezali lokuta, kokokana na Liloba na Nzambe. Na sima, tala lingomba Metodiste eyei, oyo ebotamaki uta na ye, elenge mwasi kitoko, kasi asalaki nini? Abalukaki pe asali makambo yango moko oyo mama na ye asalaka. Atikaka ete bandimi ya losambo na ye balata ba-kupé. Atikaka bango bámela makaya. Atikaka bango básala bisalela, pe basala ndenge balingaki na bango kosala. Eloko moko elobamaka te na ntina na yango. Mwa mokengeli yango, oyo abelá mpenza te kuna na sima, sima na eteyelo kuna, azali kobanga ete ázanga lifúti na ye mokolo moko, to mwa sani na ye ya bisikiti.

¹⁰⁵ Tika náyebisa yo, ndeko, malamumu kutu náteya Nsango Malamumu, pe nália lipa ya kokauka ná mai ya mpamba, kasi náloba Solo na likambo yango. Soki bandimi nyonso ya losambo na ngai batelemi pe babimi na bango, nakoyebisa bango Solo na likambo yango. Iyo, ya solo mpenza.

¹⁰⁶ Likambo nini? Oh, ezali nde lipa na ye. “Ee, boyebi, nazali mokengeli ya losambo oyo eleki monene na engumba.” Bino ba-Batiste ná ba-Metodiste, boyokaka mosakoli ya lokuta. Sikawa, ezali makasi mpenza, kasi eloko nyonso oyo eteyaka makambo

ya kokesene na Biblia oyo ezali mosakoli ya lokuta. Etali ngai te ata soki bangengisi yango ndenge nini, ezali lisakoli ya lokuta. Ya solo.

¹⁰⁷ “Oh, mabe ezali na yango te na ntango nyonso oyo nkombo na yo ezali na buku.” Nkombo na yo ekoki na yango kozala na ba-buku zomi na mibale. Soki ekomami na Buku ya Bomoi te, obungi! Okoki kozala moto malamumu mpenza, okoki kozala sémbó, peto pe na bomoto nyonso oyo okoki kozala, yango ekozala na eloko moko te ya kosala ná yango.

¹⁰⁸ Esau alekaki Yakobo mbala mibale, na oyo etali kozala moto, azalaki kosunga mobange ya papa na ye oyo miso ekufá pe nyonso mosusu wana. Kasi Yakobo azalaki mwa mokosi moko oyo azalaki kotelengana zongazonga na mama na ye, mwa mwana mobali lokola mwasi. Kasi Nzambe alobaki: “Ngai nalingi Yakobo pe naboi Esau,” liboso ete mwana moko to mosusu ábotama. Baroma 8 nde elobi bongo. Ezali mpenza ya solo.

¹⁰⁹ Nzambe ayebi oyo ezali na kati ya moto. Pe, Ayebi oyo ezali na kati ya lingomba, pe. Tozali kobika na Lipa ya Bomoi, Lipa ya Liloba na Nzambe. Sikawa, yango wana tozali denomination te.

¹¹⁰ Sikawa, nalingi kopesa bino lisusu mwa . . . Nalingi kopesa bino mwa ndakisa oyo nakomaki awa. “Monene . . .” Sikawa na Emoniseli, na 19:2. Nazali na likambo moko ekomami awa. Nalingi kotala mpo náyeba soki ezali nini.

Mpo ekateli na yo ezali solo pe sembo: mpo apesi etumbu na mwasi ya ndumba monene, oyo abebisaki mokili na pité na ye, pe azongiseli loboko na ye mabe mpo na makila ya baombo na ye. (Wana nde suka ya lingomba Katoliko.)

¹¹¹ Sikawa, tolingi lisusu bótala malamumu, awa pe, ete denomination—ete denomination ezuami lisusu na kati ya Makomi awa, ete . . . Biblia elobelaka denomination ata moke te. Denomination eutaki na lingomba Katoliko. Ye nde mama ya liboso ya denomination, pe denomination nyonso elandanaki nde bongo. Sikawa, likambo oyo ekoswa mwa moke. Ekokoba koswa moke-moke koleka ntango nyonso, bomoni. Kasi na—nalingi bómóna ete denomination ebótamaki pe ebandisamaki na Nzambe te. Ebandisámaki na zabolo.

¹¹² Lingomba ya Nzambe ezali . . . Tozali ya kokabwana te, biso nyonso tozali nzoto moko; elikya pe malakisi moko, moko na bolingo. Yango nde Lingomba ya Nzambe na bomoi. Etali te oyo bango, makambo wana, tozali elongo moko! Ya solo. Ázala Metodiste to Batiste, ndeko, soki abotami mbala ya mibale pe atondisami na Molimo Mosantu, azali ndeko na ngai. Tozali kotambola tosimbani. Ya solo. Iyo, misie. Yango esali bokeseni moko te.

113 Mose. Mbala mingi natalaka zingazinga pe balobaka: “Oyebi etonga ya bilandálanda ya ba-Pantekotiste wana, Ndeko Branham, mpo na nini okendaka ná bato ya ndenge wana?” Boyebi nini? Mose atalaki bana ya Yisraele. Atalaki bango longwa na lininisa yango moko oyo Fálo atalaki. Fálo atalaki bango lokola etonga moko ya banyati-potopóto, kasi Mose atalaki bango lokola baponami ya Nzambe. Ayebaki ete bazalaki na elaka. Mpo na nini? Ayebaki yango na nzela na Liloba. Pe na kondima. . . Ná ngwende pene na ye, mpo na kozala Fálo, ná mokili mobimba na nse ya makolo na ye, afandi wana, bazali kosopela ye vinyo na monoko, pe basi kitoko bazali kopepa ye mopepe, lokola empereur, to diktatére, to mokonzi ya mokili mobimba, elenge Mose, na mibu ntuku minei, azalaki na yango na loboko na ye. Atalaki etonga ya bapoti ya potopóto wana, kasi ayebaki ete azalaki moko na bango. Aleluya! Ezali bongo. Ayebaki ete azalaki moko na bango. Pe bobele na kondima, aponaki!

114 Moto nyonso asengeli kopona. Osengeli kopona. Okopona sikawa. Okopona na ntongo. Okopona lobi na mpokwa, soki okozala na bomoi. Na ntango moko boye, osengeli kopona. Ndeko, ngai nasíla kopona eleki ntango molai. Biblia oyo esila kozala diksionére na ngai. Biblia oyo esila kozala Buku na ngai ya Bomoi. Biblia oyo esila kozala Liloba na Nzambe. Nabikaka nde na nzela na Biblia. Natingámá nde na Biblia oyo.

115 Yango wana, Mose atalaki bana ya Yisraele. Pe asukaki kaka te na koloba: “Oh, bazali bato malamú mpenza. Nazali na likambo ná bango te. Oh, te, nakolinga koloba mabe na bango moko te.” Nde ndenge wana nde bato mingi basalaka lelo. “Oh, ba-Pantekotiste wana pe bato wana oyo bazali na Molimo Mosantu, ná bato wana oyo bandimaka lobiko na nzoto kouta na Nzambe, oh, ngai na—na—natelemeli yango na likambo moko te.” Kasi wana ezalaki Mose te. Asundolaki Ezipito pe akomaki moko na bango. Akendeki epai na bandeko na ye. Azalaki moko na bango.

116 Ndeko, kuna nde nakamati nzela na ngai. Nakokamata nzela elongo ná etonga moke ya batiolami na Nkolo, ata soki ezali na yango moke, ézala ata nini. Bazali na elaka, pe namoni bankombo na bango na kati ya Buku ya Bomoi ya Mwana Mpate. Bango nde bandeko na ngai. Ya solo. Poná pe zua ngámbo na bango. Malamú to mabe, zalá kaka wana ata bongo. Soki bazali na libunga, sungá bango mpo bázonga na solo. Ya solo. Okosungáká bango te na kobundisáká bango. Bomoni, meká nde kobimisa bango na mobulu.

117 Charlie, ndenge balobaki mpo na Ndeko Allen, na ntina na móto oyo bango. . . makila na maboko. Nalobaki: “Ata moke te, nazángá komemia A. A. Allen ata moke te.” Nalobaki: “Soki nakokaki koteya lokola A. A. Allen, nalingaki kutu kosala mayangani ya lobiko na nzoto ata moke te.” Sikawa, mpo na

oyo etali kozanga kondima likambo ya makila na maboko na yo lokola ndanga ya Molimo Mosantu, wana nakondima yango te. Kasi mpo na oyo etali bondeko, azali ndeko na ngai. Na kati ya etumba, totelemi elongo pe tosimbani makasi. Ya solo. Soki azali na libunga, nakomeka kosunga ye. Pe soki ye azali na libunga te, soki ngai nde nazali na libunga, nalingi ye ásunga ngai. Pe lolenge wana nde—nde totámbolaka na boyokani. Sikawa bótala malamau awa.

...azalaki *LIBOMBAMI, BABILONE...MAMA YA BASI YA NDUMBA...*

¹¹⁸ Sikawa, bozali komona ndenge ya lingomba lelo, baninga, bozali komona ndenge mangomba oyo ya lelo bakómi kobika na bango ndenge balingi kobika? “Ezali na yango mabe te, kende na yo liboso,” ngulu azali kolia ngulu, kotalela yango ata moke te. “Ee, mabe moko ezali te na kosaláká bongo. Ee, ozali bobele koluka kosala makambo motindo ya kala.” Sikawa bótala mateyo na bango. Sikawa nalingi...Sikawa bótala malamau. Wana ezali ezaleli na bango. Bomoni, eleki mwa mibu, bobele lingomba Katoliko nde apesamaki ndingisa ya kokende kotala filme na cinema? Lingomba Metodiste bakokaki kokanisa likambo ya bongo te. Ba-denomination nyonso wana: “Te! Oyo wana ezali misala ya zabolo.” Nazali komituna eloko nini esalemi? Iyo, misie.

¹¹⁹ Pe boyebi, ndakisa, bilenge basi ya Katoliko, babimaka na mwa bi... (Sikawa, bamosusu kati na bino mibange mibale, baoyo bakóli lokola ngai)... bakobima pe kotala mwa bilamba oyo esuká likolo na mabólóngó. Mobali wana, nakanisi, azali na lífelo, na mpokwa oyo. Nayebi te. Nazali zúzi na ye te. Kasi ntango ayembaki mwa loyembo wana ya salité, ya liboso, oyo elekaki na radio, kozanga épekisama na mibeko, ete: “Bólinga yango, bilenge basi, bólinga yango; bókítisa yango pe bólakisa mabólóngó na bino ya kitoko.” Bato boni bayebi lisusu yango, ntango ebimaki mbala ya liboso, eleki mibú? Oyo wana ezalaki mbeba ya liboso mpenza. Ya solo. Bongo ntango bazuaki mobali wana ya Texas, babimisaki basi wana kuna pe basalelaki bango bilamba ya nse mpo bápesa bango lolenge oyo ekokanaki na lolenge na bango te, ná biloko ya ndenge wana, pe balandelaki bango na likambo yango te. Bongo sikawa, esalaki nini? Emikotisaki na ndenge ya mayele. Ezali molimo.

¹²⁰ Mobali moko azalaki kosolola, mokolo mosusu. Alobaki: “Nayebi te eloko nini nakosala. Nazali na mwana mobali ya malamau pe ya sembo, kasi mwana yango akómi kozua eloko nyonso oyo ekokweya na maboko na ye.”

Nalobaki: “Mpo na nini?”

“Akómi kokangama ná moyibi moko.”

¹²¹ Zálázalá elongo ná moto moko oyo azali moyibi, yo moko pe okozala moyibi. Mobange ya mama na ngai, oyo aútá na

Kentucky, azaláká koloba: “Soki olali elongo na mbwa oyo azali na nsili, okotelema pe ná nsili.” Zuá mwa—zuá mwasi oyo azali malamú te, pe tika . . . elenge mwasi moko, pe tiá ye elongo ná e—elenge mobali moko ya malamú, pe eloko ya liboso boyebi, ye mwana mobali yango akokóma mabe lokola mwana mbwa. Ézala mpo na mobali to mwasi. Bato bakoyeba yo na lolenge ya baninga na yo. Kábwaná yo moko! “Bimá kati na bango,” elobi Biblia, “bókabwana!” Ya solo.

¹²² Soki ba-denominations na bango ezongi na libebi ya kopesa nzela na bandimi na bango. . . Ee, mokolo mosusu awa, na losambo Batiste moko ya monene pe ya kitoko, esengelaki bátika bato bábima. Akoki koteya bobele minítí ntuku mibale, mobali yango, mpamba te mokengeli yango esengelaki ámela likaya. Losambo mobimba ebimaki libanda. Bango nyonso batelemaki libanda basali milongo ya komela likaya, na sima bazongaki na kati, mokengeli ná bato nyonso. Nakendeki na losambo ya ba-Congregationaliste, mobali moko atelemaki wana, alataki zambala ya molai, atelemaki wana, alobaki, ayékamaki na eteyelo *boye*, azalaki koteya likolo na folólo moko boye oyo amonaki kuna likolo na ngomba. Yango nde ezalaki liteya mobimba, pe abimaki lisusu na libanda. Pe misapi na ye ekómaki motane ná mólinga ya makaya. Iyo. Pe azalaki kolobela na ntina na basi, ete mibali oyo balingaki kobeta lisano. . . Lisano nini ya ba-Allemand oyo babetaka yango mingi, oyo ba—bakabolaka bakálati, boyebi? Nazalaki na . . . Oh, nakanisaki nakoyeba yango lisusu. Belóte, balingaki kobeta lisano ya belóte. Nakanisi ezali bongo. Iyo, ezali wana nde efandisami. Ezali bobele lokola lisano ya bakálati nyonso. Lisano ya belóte, na cave ya ndako! Mawa mpenza! Kuna nde esika moboko na yango ezalaka. Ékokamwisa te! Mpo na nini basalaka bongo? Bongo na sima bakómi kozomela lingomba Katoliko ndenge bakendeke na bisika ya Rotary mpo na kobeta loterí. Ee, bino ba-Protestá, bozali pe bobele na mbindo lokola bango, sikawa bokoloba nini mpo na yango? Nzungu ekoki koloba te ete mbilíka ezali na “bosoto.” Ekoki koloba yango ata moke te. Bosalaka bongo, na sima bolobi: “Ee, nazali Presbiterien. Nazali Metodiste.” Ozali eloko moko te kino óbotama mbala ya mibale. Ya solo. Pe na ntango bosali bongo, boyebi, eloko moko ezali na kati na bino oyo eyebisaka bino ete makambo wana ezali mabe, pe bokolóngá yango mpenza, na ntembe ata moke te. Boyebi ete ezali Solo. Na ntembe te. Iyo, misie. Makambo yango etambolaka elongo ná yango. Mpo na nini?

. . . MAMA YA BASI YA NDUMBA. . .

¹²³ Moko na mikolo oyo, mobange ya mama wana akoloba: “Boyebi nini? Na sima na nyonso, molingami, biso nyonso mibale tozali kaka ndenge moko.” Pe boyebi likambo nini ekosalama na ntango wana? Lisanga ya Mangomba, bango nyonso bakosangana ndenge bazali kosala sikawa. Pe boyebi

eloko nini ekokómela etonga moke lokola oyo? Bokofuta yango, bandeko. Ezali mpenza ya solo.

¹²⁴ Kasi bómitungisa te, Mwana Mpate akolonga ye. Mpamba te Ye azali Nkolo na nkolo, pe Mokonzi na bakonzi, pe Nzambe akokamba Lingomba na Ye, na esika ya denomination. Akosopa Mafuta ya wólo wana ya Molimo Mosantu likolo na Lingomba yango. Ndeko, Móto ekokita longwa na Likolo, bilembo pe bikamwa ekosalema, lokola botikálá komóna liboso ata mokolo moko te. Iyo, misie. “Kobánga te, etonga moke, Tata na bino aseveli kopesa bino Bokonzi.” Iyo, misie. “Ye oyo akoyika mpiko kino na suka!” Yango mpenza. Bókoba kotambola na nzela. Mitó na bino étala bobele na Kalvari. Biblia oyo ezali solo. Bómitungisa te.

¹²⁵ Sikawa bótala malamumu. Ezali na mwa mimesano oyo bazali na yango. Mwa bizaleli mosusu oyo bazali na yango. Tokokaki pe kokóba. Eloko ya liboso boyebi, emikitisaki na mangomba Protestá. Na sima, basi ya Katoliko babandaki ko . . . Ee, kolata kupe ya mokuse ezalaki na yango mabe te, na ntango nyonso oyo bazalaki na bango kokende na losambo pe kolata mwa kitambala na motó. Mwa momesano moko boye: “Kolia mosuni mokolo ya mitano te.” Pe, oh, esika nini botikálá komona likambo ya kolata kitambala na motó mpo na kokota na ndakonzambe? Nalingi ete bólakisa ngai Likomi yango. Ezali lisakoli ya lokuta. Ezali wapi ete na ndakonzambe, osengeli kolata ekoti na ndakonzambe? Ntango olati ekoti na motó na yo, ozali koyokisa Klisto nsóni, ya solo; nazali kolobela nde mibali. Bino basi, bozali na kitambala, kasi nakobeta móndengé na moto nyonso ete álakisa ngai esika ekomami ekoti to kitambala. Ezali nde suki na bino! Kasi bokati yango nyonso. Sikawa, bolobi nini mpo na yango? Oh, balobaka: “Ezali makambo ya kala.” Soki ezali bongo, ezali Biblia! Pe Liloba na Nzambe ezali solo.

¹²⁶ Eleki kala mingi te, nazalaki kolobela mwasi oyo asukolaki makolo ya Yesu, pe azuaki suki na ye, boyebi, pe—pe apangusaki yango ná yango. Nalobaki: “Nzela bobele moko oyo mwasi akokoka kosala yango, ezali ete átelema na motó na ye mpo na kokitisa mpenza suki na ye na nse mpo ázukola makolo na Ye, mpo na kopangusa yango.” Ya solo. Oh, ezali, ezali nsóni komona lolenge oyo . . . Bótala, na ntango ya malili makasi, bango bazali kotámbola ná mwa kazaka ya moke ndenge wana, mpo na kotálisa nzoto na bango polele.

¹²⁷ Sikawa bokoloba: “Mpo na nini otelemelaka basi?” Esengeli bátelemela bino.

¹²⁸ Bongo bino mibali oyo botikaka basi na bino básala bongo, ndeko, na—nayebi te soki nákanisa nini mpo na bino. Wana, ya solo.

¹²⁹ Bongo bino bakengeli, nabanzi te bozali awa. Kasi soki bomoni mobali yango, bóyebisa ye áyá, bóyebisa ye, áyá komona

ngai. Bomoni? Soki azali lisusu na limemia te mpo na Klisto na lolenge ete akómi kotika lingomba na ye básala makambo wana kozanga. . . Sikawa ye. . . Bakoki kosala yango kuna na libanda, na sima na ye, kasi soki ayebisi bango ntina na yango te, abongi te mpo na kozala mosali ya Yesu Klisto. Ezali mpenza ya solo. Abongi te mpo na kozala mosali ya Klisto. Mosali ya Klisto asengeli kozala na bobangi te, soki ntina yango euti na Biblia. Na ntembe te. Kasi, tala bango wana, bákobima kuna pe bazosala yango ata ndenge nini.

¹³⁰ Na sima, kala mingi te, ba-Protestá basengelaki kosala ndenge moko. Bino ba-Methodiste ya malamú, bino ba-Batiste, pe bino ba-Presbiterien, to ba-Nazareen, ba-Pelerin de la Saintete, kaka ndenge moko, bobimaki kuna, bomibwakaki na kati na yango, bokeseni ezali ata moke te. Yango mpenza: “Mama ya basi ya ndumba.” Denomination na bino: “Na ntango nyonso oyo babandaki yango na quartier generale, bokeseni nini yango esalaki?” Bomoni? Ékosala bokeseni monene mpenza. Etikálá kobanda na Quartier Generale *wana* te. Ntango mosusu ebandaki na quartier generale na bino na oyo ya nsé awa, kasi na Oyo ya kuna Likolo te. Etalelaka esika oúti. Ya solo.

¹³¹ Sikawa, nandimi te ete tozali na ntango ya kolobela likambo mosusu oyo, ntango mosusu ekozala malamú nátika yango mpo na lobi na ntongo. Malamú, tózua bobele oyo ya mwa mokuse oyo. Awa, tozali na “libatisi na máí.” Tozali pe na “kobongisama liboso,” pe, oh, makambo ebele. Boye tika tózua kaka oyo, mwa likambo ya mwa mokuse oyo, ná “basi batei,” tólobela yango.

¹³² Sikawa, boye, yo mwasi motei, naboi koyokisa yo mpasi, kasi nalingi koyebisa yo likambo moko. Ozali ata na mwa Likomi moko te, ata moko te na kati ya Biblia. Iyo, nayebi epai bozoyékema, pe nasílá koyoka makambo na bino nyonso, iyo: “Pe bana na bino ya mibali pe ya basi bakosakola.” Sikawa, soki mokengeli na bino ayebi te ndimbola ya liloba oyo “kosakola”, a—ayebi eloko moko te. Azali mpenza na mosala ya kosala sima na eteyelo te, ntango azali koluka koyebisa yo ete ókóma motei. Bomoni? Mpamba te yango, na ntembe te, ekweisami longwa na Genese kino na Emoniseli. Sikawa, tika nayebisa bino likambo oyo, bomoni.

¹³³ Sikawa nalingi bózua elongo na ngai Timoté ya Liboso 2:11. Bózua awa pe tokomona yango sikawa, yango pe tokolobela yango awa, ná likambo na bino ya Misala 2. Iyo. Pe bó—bóyoka malamú oyo Likomi ezali koloba awa na ntina na likambo oyo.

¹³⁴ Sikawa, moto moko azalaki ntango nyonso koloba: “Ee, Ndeko Branham, ozali bobele mobange oyo ayinaka basi.” Ngai nayinaka basi te. Nazali. . . Nalingaka nde te komona basi oyo balukaka kozua esika oyo ezali ya bango te.

Boyebi lisusu Howard Shipyard awa, moko na bisika oyo basalaka masúwa, oyo efúlúká koleka na Ebale ya Ohio? Batiaki mwasi moko mokonzi na yango. Bótala eloko oyo esalemaki.

Bapesi basi makoki ya kovoté. Bótala eloko oyo esalemaki.

¹³⁵ Botika náyebisa bino sasaipi. Nazolobela kaka basi te. Nalingi ete mibali bósosola ete bino pe bozuami na kati ya likambo yango. Kasi nakoyebisa yo likambo moko, ndeko. Ekólo oyo ezali ekólo ya mwasi. Nakotalisa bino yango, na nzela na Likomi, na nzela na nyonso oyo bolingi ete étalisama. Oyo ezali . . . Eloko nini ezomonana likolo na mbongo na biso? Mwasi. Azuami wapi? Na Emoniseli awa, nde okomona ye. Motángo na ye ezali pe zomi na misato, ná biloko nyonso oyo abandísá; minzoto zomi na misato, mikoloto zomi na misato, ba-koloní zomi na misato. Zomi na misato, nyonso ezalaki zomi na misato, mpo na kobanda. Amonani na mokapo ya 13 ya Emoniseli. Mwasi: zomi na misato!

¹³⁶ Pe na 1933, ntango Nkolo . . . Ntango tozaláká koyangana awa, na esika église du Christ ezali sikawa, ndako ya kala ya ba-Franc-macons, emononeli ya Nkolo eyelaki ngai kuna pe elobaki liboso ete “Allemagne ekotelema pe ekotonga Etutú oyo ya Maginot.” Bato mingi kati na bino bazali koyeba yango lisusu. Pe ndenge bakobátama na kati na yango, pe ba-Americanin bakobétama makasi na esika wana, na etutú yango. Pe lisusu elobamaki oyo elingaki kosalema, pe na ntina na Roosevelt ná makambo yango, ndenge akoponama mpo na mbala ya minei. Ekokisamaki mpenza kaka na ndenge ya kobonga be nyonso. Pe elobamaki lisusu ete mítuka ekokóba kokóma lokola líki, kino ete na mikolo ya suka ekozala komonana mpenza na lolenge ya líki. Pe nalobaki: “Ekosalema ete mítuka yango ekotámbwisama na yenda te. Ekotámbwisama nde na eloko mosusu.” Ezali mítuka oyo bakómi kobimisa sikawa, oyo etambwisami na mosika, mpo na bokengi. Bongo mpenza. Bokokoka kokota na engumba te . . . Boye, na esika ya kilometre ntuku misato na ngonga, okosuka bobele na ntuku misato. Okoki kotúta mótuka mosusu te, mpamba te etambuisami na mosika. Bomoni, ezali kotambola ndenge wana, pe na ngonga oyo sikoyo. Pe nalobaki: “Bómikanisela, na mokolo wana, liboso ete ntango ya suka ékoma, liboso ete ntango ya suka ékoma, mwasi moko . . . Sikawa, bino nyonso bókoma pe bósimba likambo oyo. Mwasi moko ya nguya monene mpenza akotelema, akozala to Prezidá, to diktatére, to mwasi moko ya nguya monene mpenza awa na Etats-Unis. Pe yango ekokwea, mpo na makambo ya basi. Sikawa, bóbosana te ete ezali YANGÓ ELOBI NKOLO.” Bomoni?

¹³⁷ Ezali na libunga. Pe epesi nzela na nini? Bótika náyebisa bino. Bózala bato ya molimo. Tika . . . Bófungola matoi. Bótala. Mpo na nini ezali bongo? Mpo na kobongisela lingomba Katoliko nzela ya kokóta. Bomoni? Bokúmbamelaka ba-vedéte ya cinema

ná biloko mosusu ya ndenge na ndenge awa. Bozoyeba lisusu liteya oyo nateyaki? Margie, oyebi yango lisusu, eleki mibu ebele, na—na ntina na kobotolama ya États-Unis, mpo na kokweisa guvernemá ya Amerika. Pe ndenge nalobaki ete atelemaki na Paris sima na biso kobikisa bango kuna, na basi, vinyo ná ba-feti. Na sima, akitaki na Hollywood. Sikawa, na esika ete tókende kozua midéle na Paris, bango nde bakómi koya kozua midéle awa. Esalaki nini? Ekómi. . . Tozalaki kolinga te ete bana bákende na cinemá, kasi akoti na televizió, akobi kuna pe abebisi eloko yango mobimba, apolisi yango nyonso mpenza. Pe tokómi wana lelo, bana basi pe bana mibali nyonso, bango nyonso bakómi lokola basani oyo ya televizió. Ezali nini? Ezali kobongisa nde nzela. Elombe, mwasi ya bomoi mabe moko mpamba akoki kotinda bato mingi na lífelo koleka ba-nganda nyonso ya lotoko oyo bokoki kosangisa na engumba. Ya solo. Bótala ndenge azali kotambola na balabala na bilamba nyonso esili kolongwa ye, etali te mobali nani ozali, soki azali mobali na nzoto kolongonwa, soki atali mwasi yango asengeli koyoka eloko moko na nzoto na ye. Tala bózala kaka semba. Etali te. . .

¹³⁸ Nazuá Molimo Mosantu eleki mibu ebele. Okoki kotala mwasi te pe ye azali pene na kozala bolumbu. . . Na—natiá mwa ekulusu moko ya moke na mótuka na ngai, bato mingi na kati na bino bamóná yango. Moto moko alobaki na ngai: “Ozali mo-Katoliko?” Epai wapi ekulusu ekómá likambo ya ba-Katoliko? Ekulusu elingi koloba “Moklisto”.

¹³⁹ Ba-Santu Cecile ná bamosusu wana nde bazali bilembo ya bo-Katoliko. Bisu tondimaka makambo ya ndenge wana te. Tondimaka nde Klisto. Bango bazali na bato bakufa ya ndenge nyonso oyo bango basambelaka. Ezali kisolóka ya mosánda moko ya likolo. Nde nyonso oyo yango ezali, kosambela bakúfi. Eloko ya ndenge wana ezalaka te, te.

¹⁴⁰ Natunaki sángo yango. Nalobaki: “Mpo na nini, kasi, soki. . . Petelo azalaki papa ya liboso?”

alobaki: “Ezali bongo.”

¹⁴¹ Nalobaki: “Boye mpo na nini Petelo alobaki: ‘Molobeli mosusu azali te kati-kati ya Nzambe ná bato, bobele Yesu Klisto Moto?’ Pe bino bozali na basi bakúfá nkoto mitano, ná biloko mosusu, oyo bokómisi bango balobeli. Sikawa, eloko nini esalemaki?” Yango mpenza. Bazali na eyano te mpo na yango. Ya solo.

¹⁴² Sikawa mateyo na bango mosusu, mateyo na bango ya lokuta, etonga moko ya basakoli ya lokuta ya ba-Protestant bayaki pe bazali koteya yango, pe bino ba-Protestant bozali komela yango. Ezali mpenza ya solo. Ba-denomination ná ba-lolenge ya mabátisi, pe mibeko ya ndenge na ndenge ná makambo nyonso oyo bosalaka, oyo ezuami na Likomi ata moke

te. Etelemeli yango, kati na Makomi, kasi bino bozali mpenza kotosa yango. Ezali bosolo.

¹⁴³ Sikawa bóyoka likambo oyo, na ntina na basi batei. Malamu. Timoté ya Liboso, nalingi kozua Timoté ya Liboso 2:11. Sikawa bóyoka oyo Yango elobi awa.

Tika ete basi na bino báyekola na kimia pe na botosi nyonso.

Nazali kopesa mwasi nzela ya koteya te, to ya kozala na bokonzi likolo na mobali, kasi áfanda kimia.

¹⁴⁴ Ngai moto natiaki yango awa te. Kasi nazali na mokumba ya koyebisa bino ete ezali na kati kuna. Bomoni? Bomoni?

Tika ete basi na bino báyekola na kimia pe na botosi nyonso. (Soki bosilá kokende na lingomba Ortodóxe pe kotala bango malamú, bomoni. Bomoni?)

Nazali kopesa mwasi nzela ya koteya te, to ya kozala na bokonzi (kozala mokengeli, mosungi, to eloko moko ya ndenge wana) *likolo na mobali, bomoni, kozala na bokonzi likolo na mobali, kasi áfanda kimia.*

Mpo Adama asalemaki liboso, pe Eva na sima.

¹⁴⁵ Boyebaki yango? Sikawa bóyoka, bino basi. Bino basi Baklisto ya malamú, bayengebene, bozali eloko ya malamú mpenza koleka oyo Nzambe akokaki kopesa na mobali, soki te, Alingaki kopesa ye eloko mosusu. Iyo, misie. Bomoni? Mwasi azalaki ata na bokeli ya ebandeli te. Mwasi azali eloko oyo Nzambe akelaki te. Azali eloko oyo eutaki na mobali. Nzambe asalaki mobali, mobali pe mwasi na mbala moko. Bongo Akabolaki bango. Pe sima na ye mobali yango kosila kobika na mokili, kopesa nkombo na ba-nyama, pe kobika awa ntango molai, Ye alongolaki mokúwa moko na mopanzi ya Adama, lokola eloko oyo euti na eloko mosusu, pe asalaki na yango mwasi. “Adama asalemaki liboso, Eva na sima.” Sikawa bótala malamú.

Lisusu, Adama apengwisamaki te, kasi mwasi, ntango apengwisamaki, abukaki mobeko.

¹⁴⁶ Nzambe azuaki mobali. Zabolo azuaki mwasi. Bótala likambo yango polele mpenza, oyo yango ezali kosala lelo. Bótala Lingomba ya solosolo ya Nzambe, ekoloba: “Yesu!” Motemeli na Klisto akoloba: “Maria!” Bótala milimo yango malamú. Bomoni? Bango wana. “Maria losako, mama wa Nzambe, abenísi yo yambo ya basi banso, sambela mpo ya biso basumuki, sikawa pe o ntango ya liwa lya biso. Amen. Maria, sambela!” Oh, mawa! Bomoni, yango mpenza, “mwasi,” eloko ya zabolo. Klisto, eloko ya kokúmbamela, pe bobele Moko! Yango mpenza. Yango mpenza.

¹⁴⁷ “Adama asalemaki liboso, Eva na sima.” Adama apengwisamaki te. Bongo ndenge nini bokoki kozala na

mokengeli ya mwasi, mosungi? Adama apengwisamaki te, kasi mwasi nde apengwisamaki. Ye azalaki mpenza. . . Akanisaki te ete azalaki na libunga, kasi azalaki na libunga. “Mwasi wana apengwisamaki, nde abukaki mobeko.” Mpo na ye, ntango nyonso oyo ku—kundá—ebembe elekaka na balabala, mwasi nde aluká likambo yango. Ntango nyonso oyo bebé moko agangaki, mwasi nde aluká likambo yango. Ntango nyonso oyo moto akufá, mwasi nde aluká likambo yango. Suki nyonso ya pembe, mwasi nde aluká likambo yango. Nyonso, kufa, mwasi nde moto aluká likambo yango. Eloko nyonso ya mabe, mwasi nde moto aluká likambo yango. Bongo bátia ye mokonzi ya lingomba, mokengeli, oh, ntango mosusu evéke. Nsóni na ye.

¹⁴⁸ Sikawa, tika nákende na bino na likambo oyo mosusu, na mwa miniti. Bomoni? Sikawa tóbalola kuna na Bakolinti ya Liboso 14:32, mpo tómona likambo oyo Polo alobi awa, pe na sima tokokende kotala mwa mosusu, kaka na mwa ngonga moke. Boye tolingi koumisa bino ntango molai mingi te, mpo bokokóma ya kolemba mpenza na ntongo na lolenge ete bokokoka lisusu koya te. Malamu. Nalingi kotánga. Bato boni bandimi ete Polo azalaki molakisi oyo apemelamá? Sikawa, bómikanisela, Polo akomelaki pe Timoté likambo oyo. Bomoni? Na bongo, tózua Bakolinti ya Liboso 14:32. Sikawa tóbanda awa, tóbanda kotánga awa, 14:34, nabanzi.

Basi báfanda kimia na ba-ndakonzambe: . . .

¹⁴⁹ Boyoki likambo oyo ye alobaki?

Basi báfanda kimia na ba-ndakonzambe: mpo bapesi bango nzela ya koloba te; kasi basengeli kozala na botosi, . . .

¹⁵⁰ Bakomi likambo moko pembeni na lokasa mpo na yango? Soki bakomi, tánga yango mpo ómona soki ememi bino na Genese 3:16 te. Ntango Nzambe alobaki na Eva ete, lokola ayokaki nyoka na esika ya mobali na ye, mobali akokonza ye na bomoi na ye mobimba. Ndenge nini mwasi akoki koya pe ákonza mobali, ákóma mokengeli to mosungi, na ntango Biblia elobi ete asengeli “kotosa,” kaka ndenge ezalaki na ebandeli? Ntango A . . . Nzambe—Nzambe akoki kobongwana te. Okoki kosala te ete Liloba éloba eloko moko *awa*, bongo éloba eloko mosusu *kuna*. Esalaka yango te. Ezalaka ndenge moko ntango nyonso.

¹⁵¹ Na bongo, na ebandeli, wana nde esika, liboso ete likambo oyo ésila, soki nazui libaku malamau, nalingi kosembola likambo ya *Libala Pe Koboma Libala* mpo na bino. Naino nasálá yango te na losambo oyo. Kasi bótala malamau boyokani mibale oyo. Moko elobi ete mwasi akoki kobala; mosusu elobi ete bakoki kobala te; pe oyo alobi *oyo* boye, *wana* boye, to *mosusu* boye. Bózela moke, bokomona oyo Biblia elobi, ntango tokokóma wana. Bomoni? Malamu. Sikawa bótala malamau awa.

Basi báfanda kimia na ba-ndakonzambe: . . . bapesi bango nzela ya koloba te; kasi basengeli kozala na botosi, ndenge mibeko pe elobi.

¹⁵² Bongo, na Kondimana ya Kala, bazalaki na ndingisa ya koloba te, mpamba te Polo alobaki awa ete bazalaki na yango te. Boye te? “Basi báfanda kimia. Bázala na botosi.” Sikawa, soki botángi eteni oyo ekomami pembeni na lokasa, ekozongisa bino na Genese 3:16. Bomoni? Malamumu. “Na nse, lokola na nse ya mobeko.”

Soki ba . . . koyeba likambo, tika ya bango . . . bátuna — bátuna mibali na bango . . . na ndako: mpo ezali nsóni mpo na mwasi áloba na ndakonzambe.

Nini? . . .

¹⁵³ Sikawa bótala elembo ya motuna wana na ba-Biblia na bino moko moko, sima na “Nini?” Eloko nini esalaki ete Polo áloba bongo pe ásala bongo? Sikawa, soki bokoki kozua mikanda oyo Bakolinti bakomelaki Polo. Boye, bokoki komona yango na bibliotéke nyonso ya malamumu, bomoni, oyo Bakolinti bakomelaki Polo. Bakomelaki ye mpo na koyebisa ye, ntango basi yango báoyo babongwanaki . . . Bazalaki na—na nzambe moko ya mwasi kuna, na nkombo “Diane.” Azalaki pe nzambe ya Efese. Bakolinti pe bazalaki kokumbamela ye, mpo ezalaki kokumbamela ya bapakanu. Pe mokolo moko balokotaki libanga moko na elanga, ezalaki na lolenge ya mwasi. Balobaki: “Nzambe azali mwasi, pe abwakeli biso elilingi na ye.” Pe tempelo na bango ezalaki kitoko koleka tempelo ya Salomo, ndenge ba-istorien balobá. Oh, etongamaki mobimba na marbre oyo batii biteni ya wolo, wana tempelo ya Salomo etongamaki na mabaya ya cédre oyo batii biteni ya wolo. Bomoni? Elekaki yango na mosika. Na yango, boye, soki Nzambe azalaki mwa—mwasi, ee, na ntembe te, akokaki kozala na banganganzambe ya basi. Na ntembe te, soki Nzambe azali mwasi, boye mwasi motei ezali malamumu. Kasi, Nzambe azali Mobali. Biblia elobá ete Azali Mobali, pe Ye azali Mobali. Bomoni? Pe soki Nzambe azali Mobali, na bongo esengeli kozala mobali.

Sikawa, bótala awa: “Nini?”

¹⁵⁴ Nzokande, bayike ya banganganzambe yango ya basi, ntango babongwanaki longwa na bopakano kino na Boklisto, bakanisaki ete bakokaki kobatela mosala na bango lokola batei, báyá bobele na ngámbo mosusu. Soki kuna bazalaki koteya Diane, bayei na ngámbo oyo pe bakómi koteya Klisto.

¹⁵⁵ Alobaki: “Nini? Liloba na Nzambe eutaki nde epai na . . .” Bóyoka naino Likambo oyo. Ndeko, ndenge nini batei bakoki kosala bongo? Molongo ya 36.

Nini? Liloba na Nzambe eutaki nde epai na bino? to eyaki bobele epai na bino?

Soki moto akanisi ete azali mosakoli, to soki azali na molimo (ntina kútu ya kozala mosakoli ezali te; bobele moto ya makanisi ya molimo), ándima ete makambo oyo nakomeli bino ezali mitíndo ya Nkolo. (Bondimi yango?)

Kasi soki ye, soki moto atioli yango, tika ye átiola.

156 Sikawa, wana ezali mpenza ndenge nakoki koloba yango polele. Bomoni? Alobaki: “Soki moto azali moto na molimo, to mosakoli, akondima ete likambo oyo nakomi awa ezali Mitíndo ya Nkolo.” Kasi, alobaki: “Soki a—soki akotiola yango, bótika ye átiola.” Bomoni? Nde eloko moko kaka oyo bokoki kosala. Soki balingi kokoba na yango, bótika bango bákoba, mpamba te, amonaki likambo yango ndenge ebandaki kuna.

157 Mwasi moko ayebisaki ngai, alobaki: “Oh, Polo azalaki na ye bobele moyini ya basi.”

158 Azalaki moyini ya basi te. Boyebi, Polo azalaki ntóma, mpo na Lingomba ya Mabota. Bótala. Boyebaki ete Polo. . . Bato boni bandimi ete yango nde Polo ateyaki? Yango nde likambo oyo a—alobaki awa? Pe Polo alobaki. . .

159 Bolobi: “Ee, zela moke, Ndeko Branham. Zela moke! Sikawa, évéke na biso alobaka ete ezali na yango mabe te. Mokengeli mokonzi, ba-Assemblée alobaka ete ezali na yango mabe te. Évéke ya ba-Unitére alobaka ete ezali na yango mabe te.”

160 Etali ngai te oyo bango balobi. Ezali lokuta! Pe nayebisaki bino ete tokokotisa yango mpenza. Pe basakoli ya lokuta balobaka bongo. Mpamba te Biblia elobi: “Soki moto akanisi ete azali na molimo, to mosakoli, ándima ete oyo nalobi ezali Mitíndo ya Nkolo.” Pe soki molimo na ye etatoli Liloba yango te, mpo na kobanda, azali mosakoli ya lokuta. Malamu názala moyini ya basi na esika ya kozala molingi ya basi, mpo na kopesa nzela na makambo ya ndenge wana, mpo na kondima makambo ya ndenge wana na Lingomba ya Nzambe, oyo ekeseni na mibeko ya Nzambe. Pe Polo alobaki. . . Bózua Bagalatia 1:8. Polo alobaki: “Soki Mwanje ya Likolo atei nsango mosusu na esika ya oyo ngai natei bino, álakelama mabe.” Sikawa, bokosala na Yango nini?

161 Sikawa bokoloba: “Bongo esika oyo Elobaki: ‘Bana na bino ya mibali pe ya basi bakosakola,’ na Yoele pe—pe esika oyo Petelo atángaki na Mokolo ya Pantekote?” Ezali mpenza ya solo.

162 Boyebaki ete, na Kondimana ya Kala, nzela bobele moko, pe nzela bobele moko sikawa, oyo moto akoki kokóta na boyokani, na nzela na, na nzela na. . . Abraham azalaki moto oyo elaka epesamelaki ye, pe e—elembo ya elaka ezalaki na nzela na kokatama ngenga. Bato boni bayebi yango? Yango nde ezalaki Nzambe kotatola.

163 Lokola ndeko moko ya Batiste, alobaki: “Ndeko Branham, ee, biso ba-Batiste tosila kozua Molimo Mosantu.”

Nalobaki: “Ntango nini bozuaki Yango?”

Alobaki: “Na ngongo oyo tondimaki.”

164 Nalobaki: “Polo alobaki: ‘Bozuaki Molimo Mosantu utá bondimaki?’” Bomoni? Nalobaki: “Sikawa, bino ba-Batiste, bóya kozua ndambo na Yango, bongo tósolola ná bino na ntina na kobatelama ya Seko.” Nalobaki: “Kasi, ee, bozuaka Yango wapi ndenge wana?” Bomoni?

165 Alobaki: “Bozuaki Yango *utá* bondimá?” Bango bazalaki bandimi, bazalaki kogánga, kosepela pe nyonso mosusu. Bazuaki naino Molimo Mosantu te. Polo alobaki ete bazuaki te. Bomoni? “Bozuaki Molimo Mosantu utá bondimaki?”

Balobaki: “Toyebi te soki Molimo Mosantu moko ezalaka.”

Alobaki: “Bongo bozuaki libatisi ndenge nini?”

166 Balobaki: “Tozuá libatisi.” Kasi, na libunga, bomoni. Na bongo asengelaki kobatisama, lisusu. Malamu.

167 Sikawa, bótala likambo oyo, ete basi batei yango, ntango bayaki, bakanisaki ete bakosalela bokonzi na bango. Kasi Nzambe apesi nzela ya kosala bongo ata moke te. Pe tika. . . wana tozali kolobela likambo yango, ya basi oyo, bomoni. Boye mpo na yango, alobaki: “Soki moto moko na kati na bino, oyo azali moto ya molimo, to mosakoli, ándima ete likambo oyo nakomi ezali Mitíndo ya Nkolo. Kasi soki atioli yango, bótika ye átiola.” Yango wana lo. . . losambo oyo endimaka pe ebúisaka basi batei te, basi basungi te, to epesaka mwasi mosala moko te na losambo oyo, ezali mpo Likomi oyo ezali awa pe ezali polele.

168 Sikawa Biblia mpenza elobi: “Bana na bino ya mibali pe ya basi bakosakola.” Sikawa, liloba oyo *kosakola* elingi koloba nini? Bóluka ndimbola na yango. Ezali nde “koloba likambo, na nse ya mpemela,” to “koloba likambo liboso ete ésalema.” Ezali liloba moko esangisi maloba ebele.

169 Kaka lokola *kobulisama* elingi koloba “epetolami, pe etiami pembeni mpo na mosala”. Bomoni? To, ezali liloba moko esangisi maloba ebele, elingi koloba likambo moko kaka te, ndenge tozali na ndakisa ebele awa, na Anglais.

170 Ndakisa, tózua liloba oyo “board” [na Anglais—N.D.T.]. Ee, *board* elingi koloba nini? Bolobaka: “Ee, alingi koloba ete afutaki *mbongo* na ye [na Anglais: board].” “Te, ata moke te. Alingaki koloba ete *atobolaki* [na Anglais: bored] lidusú.” “Te, bongo te. Alingaki koloba *atungisaki* [na Anglais: bored] ye.” To, bomoni, bobele liloba moko, osengeli koyeba likambo oyo ozali kolobela. Bomoni?

171 Ezali pe bongo ná liloba oyo esangisi maloba ebele oyo, epai elobami: “Bana na bino ya mibali pe ya basi bakosakola.” Sikawa, nzela bobele moko oyo Nzambe. . .

¹⁷² Mo-Batiste oyo alobaki: “Ee, biso tozuaki Molimo Mosantu.” Nalobaki. . . “Kaka na ntango tondimaki yango.” Nalobaki. . . Sikawa, bomoni, alobaki: “Nzambe apesaki Abraham. . .” Alobaki: “Abraham andimelaki Nzambe.” Ndenge wana nde alobaki yango. Alobaki: “Abraham andimelaki Nzambe, pe atángamaki moyengebene.” Bato boni bayebi ete ezali solo? Sikawa, bótala malamumu ndenge—ndenge Satana akoki kokotisa yango na ndenge ya mayele na kati ya ndeko moko. Bomoni, na ndenge ya pete. Sikawa, wana ezali Makomi.

¹⁷³ Ndeko, nalobi na yo, na likolo oyo awa, osengeli kopakolama liboso ete ómata awa. Osengeli kokota na esika moko ya nkukú mpo na kobondela. Bato balobaka: “Mpo na nini obimaka te mpo na kotala bato?” Ndeko, soki okosolola na bato to kopesa bango malakisi, ekozala malamumu ófanda yo moko, ná Nzambe, mwa moke, liboso ete ómata na eteyelo. Ya solo, bomoni, mpo Satana azali na mayele mabe, mayele mabe mpenza.

¹⁷⁴ Bongo, alobaki, bótala malamumu, alobaki: “Abraham andimelaki Nzambe, pe atángamaki moyengebene.” Ya solo. Alobaki: “Sikawa, likambo nini Abraham akokaki lisusu kosala libanda ya ye kondima?”

Nalobaki: “Yango nde nyonso oyo akokaki kosala.”

¹⁷⁵ Alobaki: “Boni yo okoki kosala koleka, to moto mosusu akoki kosala, libanda na kondima?”

¹⁷⁶ Nalobaki: “Yango nde nyonso oyo tokoki kosala. Kasi tala, ndeko, na sima Nzambe azongisaki bondeko, to andimaki kondima ya Abraham. Apesaki ye elémbeteli, elembo ya kokatama ngenga, lokola elémbeteli ya boyokani. Omoni? Apesaki ye. Alobaki: ‘Sikawa, Abraham, Nakondima kondima na yo, boye Nakopesa yo elembo moko sasaipi kotalisa ete Nasili koyamba yo.’”

¹⁷⁷ Bongo, Akataki Abraham ngenga, pe wana ezalaki elémbeteli ya boyokani. Pe sikawa, na mokolo oyo. . . Boye, mwasi akokaki kozala na kati ya boyokani yango te; bobele mwasi oyo abálá. Bóluka yango: bakokaki kokata mwasi ngenga te; na yango, basengelaki kokota, boye, ye ná mobali na ye bazali moko. Bazali lisusu mibale te; bakómi moko. Bato boni bayebi yango? Makomi elobi yango. Na bongo, ntango ye mwasi abali, a—akómi moko. Bókende awa, pe bótala yango awa, na Timoté. elobami ndenge moko, elobi: “Mwasi akoki kobikisama na nzela na kobota bana, soki akoumela na kondima, na bosantu elongo ná makanisi malamumu nyonso.”

¹⁷⁸ Sikawa, kasi boye, kokatama ngenga ya Kondimana ya Kala ezalaki na mosuni, kasi na Kondimana ya Sika oyo, Jowele alobaki: “Nakosopa Molimo na Ngai likolo na bato nyonso, pe bana na bino ya mibale pe ya basi bakosakola.” Nzokande, liloba oyo *kosakola* elingi koloba te koteya. *Kosakola* elingi koloba, “koloba likambo oyo moto abikelaki, na nse ya mpémélá,” to

“koloba liboso likambo oyo elingi kosalema”. Pe toyebi ete basakoli ya basi bazalaki na Kondimana ya Kala. Bakokaki ata moke te koloba na kati ya ndako, koloba na kati ya losambo, na kati ya eyanganelo, lokola motei. Kasi ye, Ana, ná bamosusu mingi kati na bango na tempelo, bazalaki basakoli ya basi, pe bazalaki. . . Miriami azalaki mosakoli, to eloko moko ya ndenge wana. Molimo ezalaki likolo na ye, ezali solo, kasi azalaki na ba-ndelo, na esika na ye. Basi bakoki kozala basakoli lelo, na ntembe te; kasi batei te, pe bongo na bongo, awa, na etumbelo. Soki bosali bongo, bosali—bosali ete Biblia Émitelemela. Biblia ekoki koloba likambo moko *awa* te, bongo éloba likambo mosusu *kuna*. Esengeli koloba ndenge moko ntango nyonso, soki te, Ezali Liloba na Nzambe te. Bomoni? Boye: “Bana na bino ya mibali pe ya basi bakosakola,” elingi koloba ete “bakoloba liboso” to “bakotatola.” Sikawa, bóluka ndimbola na yango, bózua dikisionére ya Biblia pe bómona soki ezali bongo te. “Bana na bino ya mibali pe ya basi bakosakola.”

¹⁷⁹ Sikawa, Biblia elobeli pe na ntina na mwasi moko oyo amibengaki bongo, to alobaki ete azali. . . Ezali bongo na lingomba Katoliko, pe ezali bongo pe ná. . . ná likambo oyo tokolobela sikawa. Tókende na Buku ya—ya Emoniseli, pe tózua na mokapo ya—ya 2, molongo ya 20, wana tozali pembeni na yango, mpo bókokota kotala malamumu awa, komona ndenge eloko yango ekoki kozala ya zabolo mpenza, na kolobeláká makambo oyo ekosalema na ntango oyo ya suka, ndenge ba. . . oyo mwasi oyo akozala. Bóbosana te, lingomba Katoliko ezali mwasi. Touti kotánga yango, boye te? Sikawa, bóyoka likambo oyo, ndenge Yango elobi. Emoniseli 2:20: “Nzokande. . .” Azali koloba na lingomba oyo ya Twatila, bomoni: “Nzokande. . .” Yango ezali lingomba ya moyen âge, oyo elekaki na Bileko ya Molili.

Sikawa Nzokande, *nazui yo mabe na likambo oyo: opesi nzela na mwasi yango Yezabele, oyo amibengaka mosakoli, pe azali koteya pe. . . kozimbisa basali na ngai mpo básala pité, pe bália biloko oyo epesami mbeka na bikeko.* (Bomoni?)

¹⁸⁰ Sikawa, soki botali kutu malamumu, bó тала bileko ya lingomba oyo malamumu, bongo tokosilisa. Bongo, na ntongo tokokamata makambo oyo mosusu. Bótala malamumu. Na. . . Na nse ya bi—bitemelo na mwinda ya wolo ya mongombo ya Bayuda, na kati, epai mápa ya kolakisa ezalaki mpe bongo na bongo, bitemelo na mwinda nsambo ya wolo ezalaki wana. Bino nyonso boyebi yango. Bomoni? Bileko ya lingomba ezali nsambo. Yango ezolobela bileko nsambo ya lingomba, pole moko. Sikawa, soki botali malamumu na Emoniseli 1, tomoni Yesu ateleme na kati ya bileko nsambo ya lingomba, bitemelo na mwinda nsambo ya wolo, ntango abalukaki, amonaki Moto moko lokola Mwana na moto, ateleme, alati na ndenge elobami wana. Ezalaki kotalisa Mwasi na libala ateleme, na kati ya bitemelo na mwinda.

¹⁸¹ Sikawa, na Kondimana na Kala, bazalaki kozua . . . mwinda moko, pe bakopelisa yango, bazui mwinda mosusu pe bapelisi yango na oyo wana, bapelisi oyo wana, moko na mosusu, ndenge wana, kino bápelisa bitemelo mwinda nsambo nyonso.

¹⁸² Soki botali malamumu, na ebandeli, ntango Nzambe abandaki kosala na Bayuda, balekaki kati na eleko ya wolo. Na sima, eleko ya molili koleka ya kosala ná Bayuda, oyo Nzambe azalaki na yango elongo na Bayuda, ezalaki na ntango ya bokonzi ya Akaba. Pe soki botali malamumu, kotángáká bileko ya lingomba yango, Azongeli yango lisusu. Sikawa, Alobi: “Mwa makambo elekaki,” pe Alobi . . . Sikawa, na kati ya Eleko ya Molili yango mpenza, mibu nkóto moko na nkama mitano, to na eleko ya Akaba, liboso, ná Bayuda. Eleko ya molili koleka oyo bazalaki na yango, ntango Akaba abalaki Yezabele pe amemaki losambo ya bikeko na Yisraele, pe asalaki ete libota mobimba bákumbamela Akaba . . . bákumbamela nzambe ya Yezabele. Boyebi lisusu, bazuaki, batongaki bikeko, pe babukaki bitumbelo ya Nzambe. Bongo Elisa agángaki, atikalaki “bobebe ye moko,” kasi Nzambe azalaki na bato nkama nsambo oyo bafukamelaki Baala ata moke te. Boyebi yango lisusu? Ezali elilingi ya Lingomba moponami oyo ezali kobima. Bomoni yango wana? Bomoni ndenge ezali?

¹⁸³ Sikoyo, na lingomba oyo, soki botali lingomba ya liboso malamumu, lingomba ya liboso, lingomba ya Efese, ezalaki lingomba moko monene. Alobaki: “Ozali naino na pole.” Pe soki botali malamumu, lingomba moko na moko, pole ezali kokita, kokita, kokita kino na Twatila. Na sima, mibu nkóto moko na nkama mitano wana. Na sima, Abimi na ngámbo mosusu: “Pe ozali bobele na pole ya moke. Kembisa oyo ozali na yango, soki te, mwinda na yo ekolongolama.” Na sima, ekiti na eleko ya lingomba ya Filadelfia, na bongo, na eleko ya lingomba ya Laodikia.

¹⁸⁴ Sikawa, eloko ya kitoko yango oyo. Oh! la la! Nalingi likambo oyo mpenza, Ndeko Smith. Bomoni, bótala oyo. Sikawa, na eleko ya lingomba *oyo*, na ndenge totalelaki yango . . . Sikawa bótala likambo oyo malamumu. Eleko ya lingomba ya liboso ezalaki ya Efese, eleko ya lingomba ya Efese. Sikawa, na moko na moko ya bileko ya lingomba yango, kino ékoma na mibu nkóto moko na nkama mitano, soki botali malamumu . . . Bótanga yango ntango bokozonga na ndako na mpokwa, soki bozui ntango, to lobi na ntongo-ntongo, liboso ete bóya na losambo, mokapo ya 1, ya 2, pe ya 3 ya Emoniseli. Bokomona, na moko na moko na bileko ya lingomba yango, Alobaki: “Ozali na makasi moke, pe owángani Nkombo na Ngai te,” kino ntango Akómaki na mibu nkóto moko na nkama mitano oyo ya Twatila, Eleko ya Molili. Na sima, Abimi na ngámbo mosusu, pe alobaki:

. . .ozali na *nkombo ete* ozali na bomoi, kasi osili *kokufa*.

¹⁸⁵ Pe, baoyo, moko te na bileko na lingomba mosusu oyo, ete, to eleko ya lingomba ya Filadelfia, etikálá te kokamata lisusu Nkombo yango. Etikálá kozua Nkombo wana te, mpo elimwaki na ntango yango. Sikawa, oh, tokoki mpenza kotánga yango lokola moko na malakisi ya lokuta, mpenza wana, kotalisa bino ete lingomba Katoliko ezali mama, mama ya nyonso wana, ndenge azali “mama, libombami, Babilone.” Pe ezali, bótala, eleko ya lingomba oyo, ntango abandaki, azalaki na mwa pole, na sima pole na ye ekómaki kokita, kokita, na sima akotaki na kati ya ebongiseli awa, na mibu nkóto moko na nkama mitano oyo. Pe amonani lisusu sikoyo, lokola Lingomba ya Nkolo Yesu Klisto te, kasi lokola lingomba Katoliko. Luther akómaki nini? Lingomba Lutherien. Ba-Batiste bakómaki nini? Lingomba Batiste. Nkombo na Ye te, Nkombo na Ye te; nkombo mosusu, “ozali na nkombo moko.” “Mpo nkombo mosusu ezali te, oyo epesami na nse na Lola, oyo bokoki kobikisama na yango, bobele Nkombo na Yesu Klisto.” “Ozali na nkombo ete ozali na bomoi, kasi osili kokufa,” bongo ná denomination wana.

¹⁸⁶ “Oh, nazali mo-Presbiterien,” pe osili kokufa! “Oh, nazali mo-Batiste,” pe okúfá! Ozali na bomoi bobele soki ozui bomoi na kati na Klisto Yesu. Ya solo. Ba-libatisi na bino ya lokuta, libatisi ya lokuta na mai; komwangisa, kosopa, na esika ya kozindisa moto na mai; kosalela “Tata, Mwana pe Molimo Mosantu,” na esika ya Nkombo na Nkolo Yesu Klisto. Makambo nyonso wana ya lokuta ezali kokoba, na ntango oyo Biblia ezali koloba, kotalisa yango na ndenge nyonso oyo ekoki. Kasi awa tozali kopesa nzela na makambo yango: “Ee, lingomba na biso endimaka Yango na lolenge *oyo* boye.” Kasi Biblia elobi *Oyo*. Bomoni? Makambo ya ndenge wana te. Makambo ya ndenge wana ezalaka te.

¹⁸⁷ Pe esika ata moko te na Biblia batikálá kobimisa lolémo na libanda mpo na kolia Ukarístia esantu, pe sángó ameli vinyo pe abengi yango Molimo Mosantu. Na Biblia, batikálá kopesa mbote ya loboko pe kopesana loboko ya boyokani kati na bondeko ata mokolo moko te, bongo babengi yango Molimo Mosantu. Ata mokolo moko te moto moko atelemaki pe alobaki: “Sikawa nakómi mondimi,” pe azui Molimo Mosantu. Soki ezalaki bongo, boye tala ndenge tolingaki kotánga Misala 2: “Ntango Mokolo ya Pantekote ekokaki, sángó moko ya Roma ayaki, na kíngo ya elamba na ye ebaluká. Apusanaki pe alobaki: “Bino nyonso bóbimisa lolémo sikawa mpó na kolia Ukarístia esantu, komúnio ya yambo.” Elingaki kozala ndenge moko boye ya kotánga Misala 2, boye te?

¹⁸⁸ Ee, bino ba-Protestant bozali mabe pe ndenge moko. Bozongaka kuna pe bolobaka: “Sikawa, tokoya epai na bino ba-Metodiste; tokokotisa bango na nzela na mbote ya loboko, to, kopesa bango loboko ya boyokani kati na bondeko, pe tokomeka

bango sanza motoba.” Epai wapi botángaka yango na Misala 2? Bomoni? Bozuaka yango wapi? Bomoni?

¹⁸⁹ Elobaki: “Ntango bango nyonso bazalaki na esika moko, na motema moko!” Evéke ata moko te ayaki pe asalaki likambo *oyo* boye, pe sángo ata moko te ayaki pe asalaki likambo *oyo* boye. “Kasi lokito moko eutaki na Likolo lokola oyo ya mopepe ya makasi mpenza, pe Etondisaki ndako mobimba epai bafandaki.” Ezali ndenge wana nde bazuaki Yango, iyo, misie, lokola mopepe ya makasi mpenza kouta na Nkembo. Na nzela moko te to longwa na denomination moko te.

...ozali na *nkombo ete* ozali na bomoi, kasi osili *kokufa*.

¹⁹⁰ Bomoni, bindimeli ná ba-denomintion na bino esili kokangela Nzambe ekuke ndenge wana, na lolenge ete: “Biso tondimaka *oyo*, pe tondimaka ete mikolo ya bikamwa eleká.” Mosakoli ya lokuta nde alobaka bongo. Mosakoli ya lokuta nde alobaka na bino, ete: “Okoki kopesa mbote ya loboko mpo na kozua Molimo Mosantu.” Mosakoli ya lokuta nde alobaka na bino: “Ozuaka Molimo Mosantu ntango ondimi.” Mosakoli ya lokuta nde alobaka na bino: “Basengeli kosopela yo mai pe komwangisela yo mai na esika ya libatisi.” Mosakoli ya lokuta nde alobaka na bino ete “zua libatisi na nkombo ya Tata, Mwana pe Molimo Mosantu,” na ntango oyo Likomi ata moko te ezali na Biblia na ntina yango. Ya solo. Ezali na Likomi ata moko te na Biblia oyo elobi na bino ete bóbatisama, epai oyo moto moko atikálá kozua libatisi ndenge mosusu, bobele na Nkombo na Yesu Klisto. Bobele bayekoli ya Yoane; pe basengelaki koya kobatisama lisusu, na Nkombo ya Nkolo Yesu Klisto, mpo na kozua Molimo Mosantu. Ya solo. Sikawa, oyo wana ezali mateyo ya ba-Jesus Seul te. Nayebi mateyo ya ba-Jesus Seul. Wana ezali yango te. Wana ezali bobele Mateyo ya Biblia. Ya solo.

¹⁹¹ Kasi nde yango mpenza. Bosalaka na yango nini? Mama na bino ye wana. Mama ya bindimeli yango ye wana.

¹⁹² Sikawa, bó тала lisusu na Biblia pe bóyebisa ngai esika oyo batikálá komwangisela moto mai. Ba-Methodiste, ba-Presbiterien, ba-Katoliko, bóyebisa ngai esika oyo batikálá komwangisela moto ata moko mai, na Biblia. Bóyebisa ngai esika oyo batikálá kosopela moto moko mai, na Biblia, mpo na bolimbisi ya masumu. Bólakisa yango. Bokoki komona yango? Soki bomoni yango, bóya komona ngai, pe ngai nakotámbola na balabala oyo, ná likomí na mokongo na ngai, pe elobi: “Mosakoli ya lokuta! Nasalaki libunga.” To, bóluka esika bobele moko na Biblia mobimba, epai wapi moto moko azuaki libatisi na nkombo ya Tata, Mwana pe Molimo Mosantu, ndenge bato ntuku mwambe likolo na mokámá kati na bino basila kobátisáma. Bólukela ngai Likomi bobele moko epai oyo moto moko abatisamá ndenge wana, pe ngai nakotia likomí na

mokongo na ngai: “mosakoli ya lokuta,” pe nakotámbole ná yango na nzela *boye*. Pe bólakisa ngai epai oyo moto moko asila kobatisama, na Lingomba ya sika, oyo asengelaki te koya pe kobatisama lisusu, na . . . bobele na nkombo na “Yesu” te, kasi na Nkombo ya Nkolo na biso Yesu Klisto. Ya solo. Bótala soki ezali ya solo te.

¹⁹³ Pe, awa, ezali likambo nini? Azalaki mama ya basi ya pité. Eloko nini ekómisaki ye mwasi ya pité? Eloko nini ekómisaki ye mwasi ya ndumba? Mateyo na ye! Eloko nini ekómisaki bango basi ya ndumba? Mateyo na ye!

¹⁹⁴ Pe ntina wana nde biso tondimaka ba-denomination na bango pe biyambweli na bango te. Totikali peto ná Biblia oyo. Nayebi te soki obikelaka Yango malamú ndenge nini, kasi ata bongo, batei yo Yango. Ya solo. Etali bobele yo. Ngai nakoki kosala te ete óbikela Yango. Nakoki bobele koyebisa yo oyo ezali Solo. Ntina wana nde biso tozali denomination te. Nakolinga te—nakolinga te tómiyeisa mbindo na komikotisa na likambo ya ndenge wana, pe kondima biyambweli ya ndenge moko boye. Malamú kutu nátámbole elongo na bato moke ya Nkolo, oyo batiolámá. Malamú kutu nátíkala peto pe motema pémbé liboso na Liloba pe Nzambe, kotelema wana pe koloba: “Makila ya moto moko te ezali na elamba na ngai.” Yango wana totikalaka na Branham Tabernacle. Yango wana tozali ba-Assemblée te. Yango wana tozali ba-Unitaire te. Yango wana tozali ba-Jesus Seul te. Yango wana tozali ba-Methodiste te. Yango wana tozali ba-Batiste te. Bobele mwa—mwa tabernacle awa. Tozali na denomination ata moko te. Tozali nsomi, kati na Klisto. Yango wana totikalaka ndenge tozali. Pe Nzambe asili kompabola biso, Nzambe azali kosunga biso.

¹⁹⁵ Sikawa, tokoki koyebisa bino mpo na nini toliaka elambo, tokoyebisa bino mpo na nini tosukulaka makolo, mpo na nini totikaka te ete bandimi bália yango soki toyebi ete bazali na kati ya masumu. Yango wana, na mpóso mibale to misato oyo eleki, nazalaki kokende epai na mondimi moko kino na mosusu, epai oyo bino bozalaki pe na mwa kowelana kati na bino. Nakendeki epai na epai, moko azalaki lisusu kolobisa moninga te, pe bakómaki kolekana na nzela, wana babaloli elongi epai mosusu. Nsóni na bino, baoyo bomelaki kopo ya Nzambe oyo epambolámá, awa na etumbelo oyo, pe bozalaki komibénga bandeko mibali pe bandeko basi, na sima, bozui telefóne mpo na kotóngana bamoko na bamosusu. Bolóngóbani te kobengama Baklisto ntango bozali ndenge wana. Ya solo. Bózala mosika na ba-telefóne yango; soki okoki koloba bolamu ya moto te, koloba pe eloko moko te. Bóbosana te, Nzambe akotángela bino yango. Na ntango nyonso oyo molimo ya ndenge wana ezali na kati na yo, oyebi ete ozali na alimá te na miso ya Nzambe. Soki omiyoki te . . .

¹⁹⁶ Soki moto moko azali na libunga, kende epai na ye pe bózongana na bondeko. Soki bokoki kozonga na bondeko te, memá moto moko elongo ná yo. Ékokamwisa te ete Nzambe ákosémbola Lingomba na Ye te, mpo bozosala yango malamú te. Na esika ya kozua telefóne mpo na kosolola na ntina na oyo boye, na likambo oyo esalemaki, pe kosala mwa bitonga mike-mike, pe makambo ya ndenge wana. Na esika ya kosala bongo, mpo na nini bosalaka te oyo Biblia elobi? Soki ndeko moko azuami na libunga, kende epai na ye pe tala soki okoki kozonga na bondeko ná ye te. “Ee, tala, ye moto asalaki ngai mabe!” Etali ngai te nini ye asalaki, kende epai na ye, ata bongo! Elobaki te ete ye áya epai na yo. Yo nde kende epai na ye, soki azali na libunga. Okoloba: “Ee, ye moto asalaki libunga. Ye moto asengeli koya epai na ngai.” Wana ezali likambo oyo Biblia elobi te. Biblia elobi na yo ókende epai na ye. Soki azali na libunga, yo kende epai na ye.

¹⁹⁷ Na bongo soki aboyi koyoka yo, na ntango wana, memá moto moko elongo ná yo, lokola nzeneneke.

¹⁹⁸ Na sima, soki aboyi kokutana na nzeneneke wana, na bongo, lobá: “Sikawa, nakoloba yango na mokengeli na yo.” Bongo yebisa ye, lobá: “Nakoyebisa yango na lingomba, na mikolo ntuku misato kobanda na ngonga oyo, soki bino bandeko bobongisi likambo yango te. . . Ndeko oyo azali koluka kozonga na bondeko. Yo olingi te. Soki bobongisi likambo yango te, na kati ya mikolo ntuku misato, boye, eloko nini ekosalema? Okozala lisusu moko na biso te.”

¹⁹⁹ Biblia elobi: “Soki aboyi koyoka lingomba, boye mpo na bino, ákóma lokola mopakano pe mokongoli mpako.” Bomoni, na ntango nyonso oyo ndeko azali na nse na kobatelama ya lingomba, Makila ya Klisto ezali kobatela ye. Ntina wana nde tozali kokoka kotambusa lingomba te na lolenge yango etambolaka. Sikawa, malamú, *Oyo* nde Mateyo ya ba-Ba-. . . ya lingomba Batiste, to, ya Branham Tabernacle awa, soki bokosala yango. Bomoni, mpo na nini te. . .

²⁰⁰ Soki ozui awa, ndakisa, bato mibale, tóloba ngai ná Leo. Bokotinda ngai. . . Pe ngai nalobi: “Ee, ye—ye moto asalaki ngai mabe.” Yango esali bokeseni moko te. Ngai nde nasengeli kokende epai na ye. Ee, azali mondimi ya lingomba oyo. Azali—akómá Moklisto. Aliaka elambo elongo ná ngai awa na etumbelo. Tozuá libatisi na Nkombo na Nkolo Yesu. Totámbolaki malamú, lokola bandeko, moko liboso na mosusu, na sima, likambo moko esalemi.

²⁰¹ Ezali moto yango te. Na makambo ntuku libwa likolo na mokáma, zabolo nde akotaka na katikati ya bato. Ezali bato te. Ezali nde zabolo. Pe na ntango nyonso oyo bokotika zabolo ásala bongo, ozali kosala ndeko na yo mabe. Ya solo.

202 Ee, soki likambo moko ezali kotambola te kati na ngai ná Leo; tókende kobongisa likambo yango. Pe soki yo omoni ete likambo moko ezali, ezali mokumba na yo ya koya epai na biso, pe koloba: “Bandeko, bino mibale bóya awa pe bókutana elongo. Tokobongisa likambo oyo.” Na bongo, soki akómi na esika yango, pe eyei komonana bongo, na boye, biso ye yo. Nakoloba: “Ee, likambo ya liboso, soki to—tokoki koyokana te, bongo bókoya na losambo ndenge wana.”

203 Boye na—na ntango nyonso oyo yo bozosala eloko moko te na ntina na yango, Makila ya Yesu Klisto ezali kobatela biso mibale. Bomoni? Kasi na boye kansére ya—ya kala wana ekobota kansére mosusu, pe kansére wana ekobota kansére mosusu, pe etonga yango mobimba ekozua bokono, bisika nyonso, lingomba mobimba. Bongo bokokóma na esika moko boye na ntango bokoya na losambo, makambo nionso ekomi malili, na lolenge ete ekosenga ete sínzili áya kobuka mabanga ya malili, liboso ete bandimbi bákoka kokóta. Boyebi malamumu ete likambo yango ezali ya solo. Malili mpenza! Okomona moto afandi wana, boyebi, akoloba ata liloba moko te. “Ee, tozaláká bato ya molimo mpenza.” Kasi, likambo nini ekómi? Ya solo, bozaláká kotambola malamumu, likambo nini yango esalemi? Bomoni, lisumu na bino ekaboli bino. Bokomema ngambo epai na Nzambe mpo na likambo yango, bandeko. Sikawa, nakobongisa likambo yango.

204 Mabe moko te ezali ná ngai, mabe moko te ezali ná Leo; zabolo nde akoti na katikati na biso. Ya solo. Bóbongisa likambo yango. Kende epai na ye. Boye soki aboyi koyoka, to ngai naboyi koyoka, na ndenge moko to mosusu, boye bóloba yango na lingomba. Soki ayei kozongisa bondeko ná lingomba wana te na kati ya mikolo ntuku misato yango, boye azali lisusu na nse ya kobatelama na Yesu te. Tokangoli ye. Ezali mpenza ya solo. Bongo bótala malamumu likambo oyo ekosalema. Na ntango wana bótika Nzambe ásembola yango. Bosukoli maboko na bino. Bosali nyonso oyo bokokaki kosala. Na ntango wana, bótika Nzambe ásimba ye mwa moke; Akopesa ye na maboko ya zabolo. Na ntango wana nde akozonga. Soki azongi te, bomoi na ye ekumela te.

205 Bozoyeba lisusu, na Biblia, epai oyo ndeko moko aboyaki kobongisa likambo na ye ná Nzambe? Bato boni bayebi lisusu likambo yango? Atambolaki ná mama mobokoli na ye, pe bazalaki kokoka kosembola ye te. Polo alobaki: “Bókaba ye na maboko ya zabolo, mpo na kobebisama.” Bokomona, na Bakolinti ya Mibale, ete asembolamaki.

206 Nazali na ndeko moko, moninga moko malamumu, nasepeli kotánga nkombo na ye awa, ndeko motei moko. Ndeko motei oyo, nkombo na ye Ndeko Rasmussen. Mingi kati na bino batei oyo bozali awa, na mpokwa oyo, nkombo na ye ebimá na bazulunále na bino. Azali inter-denominationel kuna na Chicago. Pe bótala. Azalaki na mwana mobali moko, ye motei, pe akendeki kobala

mwana mwasi mo-Katoliko, pe abandaki kotangwa ndenge wana. Balingaki kosala makambo *boye* na *boye to boye*, pe—pe nyonso wana; akotaki kati na mobulu. Pe papa na ye akendeki epai na ye, alobaki: “Sikawa yoka, mwana na ngai, ondimi kozonga na bondeko?”

Alobaki: “Papa . . .”

Afingaki lingomba na bango ete bazali etonga moko ya batúntuki, papa na ye. Alobaki: “Sikawa, yoka, okobongisa likambo yango ná lingomba?”

²⁰⁷ Alobaki: “Papa, yoka, ozali papa na ngai, pe nalingi kozala na likambo ná yo te.” Malamu.

²⁰⁸ Akendeki kozua moko na basungi pe bakendeki na ndako na ye. Alobaki—alobaki: “Wesley, nalingi kosolola na yo.” Alobaki: “Okobongisa likambo yango ná lingomba?” Kasi ye akatelaki ye eyano ya mokuse ndenge wana. Alobaki: “Kobosana te, Wesley, ngai nazali mokengeli ya lingomba wana. Nazali papa na yo, kasi nakosala oyo Nzambe alobi násala. Napesi yo mikolo ntuku misato mpo na kobongisa likambo yango ná lingomba wana, soki te, tokobengana yo libanda na Bozali ya Nzambe. Ozali mwana na ngai moko; Ye azali Mobikisi na ngai.” Alobaki: “Nalingi yo. Pe oyebi ete nalingaka yo, Wesley. Nakoki ata kokufa sikawa mpo na yo. Kasi osengeli koya komitia na molongo ná Liloba na Nzambe. Omoni?” Alobaki: “Nazali mokengeli. Nazali mobateli ya bampate wana. Soki ozali mwana na ngai, to nani nyonso oyo ozali, osengeli komitia na molongo ná Liloba na Nzambe. Soki osali yango te, boye ngai nabongi kozala mobateli ya bampate na Ye te.”

²⁰⁹ Oh, wana nde mokengeli mpenza. Wana nde mobali. Bokanisi bongo te? Wana nde mobali. Ayebisaki yango mwana na ye. “Pe esalaki ye mpasi,” alobaki. Kasi alobaki: “Nini? Nani yo okolinga kosala mpasi, moto, to kosala mpasi na Mobikisi na yo? Boye,” alobaki, “na sima tokobaki.” Pe alobaki: “Alingaki kosala yango te. Pe to . . . nayebisaki lingomba.”

²¹⁰ Alobaki: “Mwana na ngai moko, Wesley, aboyi koyoka ngai na likambo oyo. Aboyi koyoka mosungi. Pe yo ozali nzeneneke na yango, Ndeko *Songolo*?”

“Iyo, ezali bongo.”

“Malamu. Na ngonga ya mwambe ya mpokwa, na mokolo ya lomingo ekoya, mpóso minei kobanda na ngonga oyo, soki abongisi yango ná lingomba oyo te, tokopesa Wesley, mwana na ngai, na maboko ya zabolo, mpo na kobebisama ya nzoto na ye. Makila na Ye, Makila ya . . . ya Yesu Klisto, ná lingomba oyo, ekobatela ye lisusu te.”

²¹¹ Mpokwa yango pe ekómaki. Atelemaki na eteyelo, alobaki: “Atikali na miníti mibale.” Ngonga yango ekomaki. Alobaki: “Sikawa, ndenge mwana na ngai, Wesley Rasmussen . . . alobaki

na eyanganelo oyo, pe na Yo, Nzambe na Nguya-nyonso: Tosali nyonso oyo tokoki kosala, kokokana na Liloba na Yo pe na mitindo oyo Mwana na Yo—na Yo, Mobikisi na biso, atikélá biso. Bisó sikawa, napesi mwana na ngai, pe lingomba oyo elongo ná ngai, na kobeb-. . . na maboko ya zabolo, mpo na kobebisama ya nzoto na ye, mpo molimo na ye ébikisama.” Yango nde nyonso oyo elobamaki. Eloko moko te esalemaki, na kati ya mpóso moko to mibale, ntango mosusu sanza mobimba to mibale.

²¹² Na butu moko, Wesley abandi kobela. Ntango abandaki kobela, bokono na ye ekobaki bebele kokóma makasi. Abengaki monganga. Monganga ayaki pe asalaki ye ba-examen. Mótó ya nzoto na ye ezalaki ntuku minei na ndambo. Azalaki koyeba ntina ya likambo yango te. Bokono ekobaki kaka kokóma makasi. Monganga alobaki: “Mwana, nayebi te likambo oyo ekómeli yo.” Ayebaki te eloko nini ya kosala. Alobaki: “Tokobenga spesialíste moko.” Babengaki spesialíste, pe spesialíste yango ayaki wana. Bamemaki ye na lopitalo, basalaki ye ba-examen, pe nyonso wana. Pe alobaki: “Namoni te nini ya koyebisa yo. Mwana oyo ákomonana kaka—kaka lokola ebembe.” Mwasi na ye azalaki wana, azolela, pe nyonso wana. Bana na ye pe bazalaki zonga-zonga na mbeto pe bisika nyonso wana. Alobaki: “Azali kokende. Esíli.” Alobaki: “Kobetabeta ya motema pe kopéma na ye ezali bebele kokoba kokita ntango nyonso.”

²¹³ Alobaki: “Bóbenga papa.” Oh, iyo. Nde ndenge ya kosala likambo yango. Yango mpenza. “Bóbenga papa.” Pe papa na ye akimaki mbangu kuna na lopitalo, mbangu mpenza, mpo na kotala ye. Alobaki: “Papa, nazokoka te sikawa, kasi Nzambe azoyoka maloba na ngai. Nakobongisa makambo nyonso. Nakobongisa yango. Iyo, nakosala yango.” Oh, iyo, ndeko. Kaka na ngonga wana kopéma na ye ebandi kozonga malamú.

²¹⁴ Pe na mokolo ya lomingo oyo elandaki, atelemaki liboso na losambo. Alobaki: “Nasalaki lisumu liboso na Nzambe, na miso ya losambo oyo. Naboyaki koyoka maloba ya mokengeli. Na—naboyaki koyokela mosungi oyo.” Pe alobaki: “Nasengi na losambo oyo bólimbisa ngai mpo na mabe oyo nasalaki ndenge wana.” Alobaki: “Nzambe abateli bomoi na ngai.” Nalobi na bino, amitiaki na molongo na ndenge esengeli. Iyo. Yango nde likambo bosengeli kosala, bomoni. Bomoni? Bino, soki bebele bokosala yango na ndenge ya Nzambe! Bomoni?

²¹⁵ Sikawa, bomoni, biso tosalaka boye, toyanganaka na likita, pe tolobaka: “Ee, sikawa, esengeli na biso kobatela. . .” Nalobi losambo oyo te, kasi nalingi nde koloba biso ba-Protestant. Toyanganaka na likita ya bakambi, pe: “Bolobi nini mpo na Jones? Bokanisi ete tosengeli kosala nini ná ye? Nabanzi akozala mondimi ya malamú ya Metodiste koleka epai na biso.” Yango wana. Oyo wana, ezali libunga. Yango wana biso totindami kolanda mimesano na bango te. Pe évéke moko boye tosengeli

kobenga ye (ata mo. . . babengaka ye nini? mokonzi ya etúka, na lingomba Pantekotiste? “mokengeli ya etúka”)—bakobengisa ye mpo bámona ezaleli ya moto yango.

²¹⁶ Biblia eyebisi biso eloko nini kosala. Wana nde ntina oyo biso tosakanaka ná ba-denominations na bango te. Totikalaka na bonsomi mosika na likambo wana. Amen. Bosilíkeli ngai te, boye te? Bósala yango te. Malamu. Ntango mosusu nakozua mituna ya kitoko mingi mpenza lobi na mpokwa. Kasi, ee, ya solo. Bomoni? Bóbosana te. Bóyeba. . .

²¹⁷ Nakoloba boye sikawa. Bino bato oyo bozali awa sikawa, baoyo bauti na ba-denomination ya mangomba ndenge na ndenge, denomination na bino, pe, ndeko, nalobi te ete ozali Moklisto te. Nalobi te ete denomination na yo ezangi nkoto na nkoto ya Baklisto ya malamuna kuna. Nazali nde komeka koloba ntina oyo biso tozali denomination te. Mpamba te, nakondima kozua ngambo na yango te. Te, misie. Nakolinga kutu te. Balukaka koyebisa nini oyo osengeli kosala. Soki Nzambe abéngá ngai koteya Nsango Malamu, boye nakoteya Yango ndenge Nzambe ayebisi ngai násala yango. Ya solo mpenza, ndenge ekomami awa na kati ya Biblia oyo. Soki elongobani na Oyo te, na bongo ezali. . . Nzambe akosambisa ngai mpo na yango. Kasi soki na—soki na—soki namoni mbwa ya zamba ezali koya, to monguna azali koya, pe nazangi kokebisa bango, boye Nzambe akotuna ngai. Kasi soki nakebisi bino, boye na ntango wana, etali nde bino. Bomoni?

²¹⁸ Bómikanisela, “Na mikolo ya suka, ntango ya mpasi ekoya, bato bakokóma balingi na bango moko mpenza, bato na lolendo, bato na ngambo, batúki.” Bomoni, batúki: “Oh, etonga ya bazoba wana. Mikolo ya bikamwa esílá koleka. Eloko ya ndenge wana ezalaka te.” Azali mosakoli ya lokuta. “Tala, toyebi ete basi na biso bazali na mayele lokola mibali na biso pe.” Naboi yango ata moke te, kasi Biblia ya Nzambe elobi ete ázala mosika ya eteyelo. Yango—yango ekoki mpo na ngai, bomoni. Ya solo. Malamu. Bomoni?

Pe balobaka: “Ee, sikawa, na ba-denominations na biso, tozali na bato malamuna ebele lokola bino kuna na Tabernacle.” Nalobi bongo ata moke te, kasi Biblia ekweisi ba-denominations. Ya solo. Na bongo, nalobi te ete bozali na bandimi ya malamuna te na lingomba na bino. Ezali malamuna mingi. Bazali bato malamuna mpenza. Bato mosusu ya malamuna koleka, nakutanaka na bango na kati na bango nyonso, ba-Katoliko pe bango nyonso. Bango nyonso, nakutanaka na bandimi ya malamuna.

²¹⁹ Sikawa, lolenge oyo tokotalisa likambo yango, balinga, soki Nkolo alingi, na malakisi mibale to misato oyo ekolanda, ntango mosusu. . . nakoyebisa bino lobi na ntongo soki tosengeli kokoba lobi sima na nzanga to te, bomoni, mpo na kotalisa yango na mobimba. Ntina oyo tozali komeka kosala bongo ezali

ete, nalingi mpenza kotalisa likambo yango sikawa. Sikawa, soki olingi koya elongo ná moto moko, okoki na yo mpenza kosala yango. Kasi kobosana te, ko—kokende te bobele mpo ozali koluka komona libunga. Yaka awa . . . Nazoloba bobele na e—eyanganelo na ngai, bomoni. Nateyaka makambo oyo libanda na eyanganelo na ngai oyo te, mpo oyo wana ezali mosala ya moto mosusu. Ye nde azali mobateli ya etonga wana. Pe—pe ngai nazali bobele . . . [Maloba mazangi na eteni oyo ya bande—N.D.E.]

²²⁰ Kozonga kino na Genese, okoki kobimisa yango, mpo na koyeba esika yango ezali. Sikawa, tozali kozonga na Genese, mpo na komona mpo na nini mwana makango akokaki kokota na eyanganelo ya Yawe te, na bikeke zomi na minei. Ndenge ezuaka . . . Ezalaki kozua mibu nkama minei mpo lisumu yango élongwa. Tokomona ndenge nini ma—mabe ya baboti elandaka bana pe bana ya bana, pe ndenge yango ebandaki na Genese, pe bongo na bongo.

²²¹ Pe bino . . . bongo bokomona ndenge yango, wana tokozonga kino na ebandeli, ete Nzambe, liboso ya kozalisama ya mokili, liboso ete atóme moko épasuka, kuna mpenza liboso ete libanga ya pole moko étikala ata kozalisama, Nzambe ayebaki bikelamu nyonso pe biloko nyonso oyo elingaki kozala na mokili. Moto moko akoki kozala awa . . . Bokoki kolimbola liloba oyo te, kokabola yango pe koloba nini liloba oyo “kozanga suka” elingi koloba. Ezali lokola ko-reglé masíni ya fotó na yo na—na kozanga suka. Ezali mpenza oyo ezali kolanda sima na yango, nde yango mpenza. Bomoni? Kozanga suka! Pe, na likanisi oyo ezali na suka, biso tokoki te kososola eloko oyo Likanisi ezángá suka ekoki kokanisa. Bomoni, tokokoka kosala yango te. Yo, okoki kosala yango te. Bomoni? Kasi soki botali malamau, pe botikalí kati na Molimo, bokoki koyoka yango na mosika. Pe—pe, bózonga awa na Makomi pe bokomona sikawa, bomoni, mosika liboso ete mobokó ya mokili étikala kotiamá.

²²² Nzokande, Biblia elobi ete Yesu Klisto azali Mwana Mpate ya Nzambe. Sikawa, bóyoka na bokebi mpenza, boye, soki bamosusu na kati na bino bakozala te awa lobi, mpo na koyoka suka na yango. Biblia elobi ete Yesu Klisto azalaki Mwana Mpate ya Nzambe, oyo abomamaki longwa na kozalisama ya mokili. Ezali bongo? Ntango nini Ye abomamaki? Longwa na kozalisama. Yango nde mokili, soki esalemi na biteni ya ba-atóme oyo ekabwanaki pe elongolamaki na mói, kuna, liboso ézala yango. Na bongo, liboso ete atóme ya liboso ékabwana ná mói, soki oyo ezali libanga oyo ekabwanaki na moi, elingi koloba, eleki mibu nkama ya ba-milliard na ba-billions ya ba-billions ya ba-billions liboso kútu libanga moko ya pole ézala, Klisto asilaki kobomama. Ntango likanisi monene ya Nzambe ekáni eloko moko, eloko yango esili kosalema. Soki Nzambe alobi: “Eloko boye ézala,” esili kosalema. Ata soki eleki mibu billion nkama liboso ete ékokisama, esili kosalema, kaka na ntango

Alobaki yango. “Pe ntango Mwana Mpate abomamaki longwa na kozalisama ya mokili,” Biblia moko yango, Molimo moko yango ekomaki pe elobaki, “Ba-nkombo na biso ekomamaki na Buku ya Bomoi ya Mwana Mpate liboso ya kozalisama ya mokili.”

²²³ Boye, moto oyo akomaki loyembo oyo “Ezali Na Nkombo Moko Ya Sika Oyo Ekomámi Na Nkembo,” ozalaki na makanisi malamú, kasi azalaki libanda na Makomi. Bomoni? Nkombo yango ekomamaki na Nkembo ntango mokili. . . liboso mokili ébanda. Ntango Mwana Mpate abomamaki, ba-nkombo na biso ekomamaki na Buku ya Bomoi ya Mwana Mpate.

²²⁴ Bó—bótika nápesa bino mwa Likomi moko. Bokoki kozela kaka mwa miniti moko? Eyeli ngai kaka na likanisi sikawa. Nabanzi nakoki kozua yango noki. Nayebi mpenza te. Sikawa, bólimbisa ngai ndenge naúmisi bino boye, kasi nalobaki na bino ekozala na minwí; naino ekomi mpenza te. Kasi na—nalingi bobele ko—kozua oyo, bobele Likomi moko mpo na yango.

Sikawa, bóbalola elongo na ngai na Buku ya Baroma, pe nalingi bótánga oyo elongo na ngai. Sikawa, tótala naino, Baroma, soki nakoki komona yango, ezali kaka pembeni awa. Sikawa, tózua Baroma 8, pe—pe tóbanda na molongo ya 28 ya mokapo ya 8 ya Baroma. Pe nalingi ete bótánga yango na kati ya libondeli elongo na ngai sikawa. Bóyoka sikawa oyo Nzambe alobi awa:

Nzokande toyebi ete makambo nyonso esalaka elongo mpo na bolamu ya baoyo balingi Nzambe, baoyo . . . babengami kokokana na mokano na ye.

Mpo baoyo ayebaki liboso, . . .

²²⁵ Yango epesi bino. . . Bokoki kotánga elongo na ngai? “Mpo ye. . .”

Mpo baoyo ayebaki liboso, aponaki pe bango liboso (malamu) ete bákokana na elilingi ya Mwana na ye, mpo ázala mwana ya liboso kati na bandeko ebele.

Lisusu, baoyo aponaki liboso, abengaki pe bango; pe baoyo abengaki, alongisaki pe bango; pe baoyo alongisaki, apesaki pe bango nkembo.

²²⁶ Longwa na kozalisama ya mokili! Ntango Nzambe akitisaki miso. . . Sikawa, Nzambe atambusaka mosala na Ye te na koloba: “Ee, sikawa, Nako. . . Oh, tokosala nini sikawa?” Bomoni? Ezali na eloko moko te. . .

²²⁷ Bómikanisela, kozanga boyengebene, lisumu, ezali boyengebene oyo ebebisami. Zabolo akoki kokela te. Moto nyonso, bato nyonso bazali kososola yango? Ezali moko na Mateyo ya losambo oyo. Zabolo akoki kokela te. Akoki kobebisa oyo Nzambe asili kokela. Sikawa, kobebisa ezali nini? Tala, emonani lokola ete bino nyonso bozali mikóló, mingi kati na bino. Bóyoka likambo oyo. Tozali bato oyo babálá. Bino mibali

oyo bobálá pe bino basi oyo bobálá bokoki kobika elongo lokola mwasi ná mobali, pe basi yango bazali bobele lokola batikálá kozala te. . . Bazali bangondo, na ntango nyonso oyo ofandi ná mobali na yo. Ya solo. Sikawa, oyo wana elandi mobeko pe elongobani na mobeko, pe ezali malamú. Ebongisamá na Nzambe ete ésalema bongo. Mwasi mosusu akoki kosala likambo yango moko ya mwasi na yo; moko na yango, ozali moyengebene na miso na Nzambe; pe likambo yango moko ná mwasi mosusu, okweisami na kufa na miso ya Nzambe. Ezali nini? Boyengebene oyo ebebisami, bomoni, boyengebene oyo ebebisami. Sikawa, zabolo akoki kokela te, kasi abebisaka oyo Nzambe asilá kokela.

²²⁸ Lokuta ezali nini? Ezali solo oyo ebebisami. Moto moko alobaki: “Oh, tala, ezalaki na mokolo ya póso na mpokwa, na ngonga ya libwa, iyo, Bill Branham azalaki na Jeffersonville,” ya solo. “Na ekalá ya Antz, alángwé,” lokuta. Ezalaki nini? Nazalaki na Jeffersonville. Ya solo. Ezalaki boyengebene ebalolami na lokuta. Bomoni likambo nini nalingi koloba? Bomoni, lokuta ebebisaka solo. Ezali likambo moko oyo elobeli esika oyo ngai nazalaki. Sikawa, soki balobaki: “Na losambo, azali koteya,” ya solo. Wana ezali boyengebene. Alobaki solo. “Na nganda, azali komela masanga,” lokuta. Ebebisami; bomoni, solo oyo ebebisami. Bomoni eloko nini nalingi koloba? Bozangi boyengebene nyonso ezali boyengebene oyo ebebisami.

²²⁹ Kufa, ezali nini? Bomoi, oyo ebebisami. Bokono? Bokólongono, oyo ebebisami. Osengeli nde kozala moto malamú, nzoto makasi. Malamú. Soki obelaka mingi, ezali nini? Bokólongono na yo ebebisami. Bomoni? Nde nyonso yango wana. Ezali nini? Bozaláká bilenge basi kitoko; pe mibali kitoko pe makasi. Sikawa, bokómi na maniúniúkú na lopo, bokómi konuna. Ezali nini? Bomoi, ebebisami, bomoni, ezali kozonga lisusu. Bomoni? Pe esengeli kozonga. Nkombo na Nkolo épambolama! Nzambe alakaki ete akozongisa yango. Pe kaka ndenge yango—ndenge yango ezali (toyebi ete ezali awa), boye kaka ndenge yango ezali, Nzambe akozongisa yango lisusu. Ye alakaki pe akataki ndai ete Akosala yango. Yango nde ebotaka yango.

²³⁰ Sikawa, ndenge nini, bato ya ndenge nini biso tosengelaki kozala? Sikawa, bótala ndenge makambo yango esalemaka. Sikawa, baoyo Ye ayebáki liboso, Abengaki; baoyo Abengaki, Alongisaki bango. Na ntango nini? Liboso ya kozalisama ya mokili, liboso mokili ébanda. Sikawa, soki tokokaki kozua Likomi oyo pe kotalisa yango polele mpenza, tokozua ngonga ebele mpo na yango, kasi to—tolingi kosala yango te. Kasi bozangi boyengebene nyonso oyo, ezali boyengebene oyo ebaluki na bozángi boyengebene. Wana nde likambo oyo zabolo asalaka.

Sikawa, soki okómi na mibu ya kososola makambo, pe oyebi oyo mabe ná malamú ezali, osengeli kopesa mokongo na mabe na yo. Mpamba te obótamí na lisumu, osalemí na lisumu na

nkó, oyei na mokili ná lokuta na monoko. Bongo, o—obótami mpenza na mposa ya nzoto, na bongo osengeli kobotama mbala ya mibale, mpo ózua Mbótama ya sika, mpo na kokota na Lola. Mpamba te, lolenge ya mbótámá oyo ozali na yango awa . . .

²³¹ Bomoni esika oyo ba-Temoín de Jehovah bakozala na libunga mpenza na likambo yango, ya kokanisa ete Mbótama ya sika ezali lisekwa ya nzoto? Bomoni, ekoki kozala bongo te. Bomoni? Esengeli kozala eloko moko . . .

²³² Bino, bozali na kati ya ntango. Pe eloko bobele moko oyo ezali Seko ezali eloko oyo ezali na ebandeli te pe na suka te. Eloko nyonso oyo ezali Seko etikálá kozala na ebandeli te, to ekozaláká na suka te. Bomoni? Na bongo, soki ozali eteni ya Nzambe, Molimo oyo ezali na kati na yo etikálá kozala na ebandeli te pe ekozaláká na suka te, pe ozali moto ya Seko, elongo na Molimo oyo ezali na kati na yo. Bomoni? Lokola bo—bo—bolingo *Agapao*, boye yango ekokita na bolingo *phileo*, pe na sima ekiti na bolingo ya mposa ya nzoto. Ekokoba bobele kokita, kokita, kokita na kobebáká, kino ekomi bobele eboke ya bosoto. Ee, nzela bobele moko, Yesu akitaki na ebuteli yango moko, awa na nse, mpo na kokamata pe komata lisusu téé na lolenge ya likolo koleka, longwa na lolenge ya nse koleka; longwa na kufa kino na Bomi, longwa na bokono kino na bokólongono, longwa na kozanga boyengebene kino na boyengebene. Bomoni? Autaki longwa na Likolo koleka kino na nse koleka, mpo Ákoka komema na Likolo koleka, moto oyo azalaki na nse koleka. Akómaki ngai, mpo ngai, na ngolu na Ye, nákoka kokóma Ye, mosangoli ya Ngwende, kati na Nkembo. Bomoni oyo nalingi koloba? Makambo wana.

Sikawa, bótala. Kala-kala mosika mpenza, liboso ete mokili oyo ébanda, na ba—atóme na sima kuna, ntango Nzambe amonaki oyo elingaki kosalema, na ntango yango nde Amonaki bino, Amonaki ngai, Amonaki nsili moko moko, nzinzi moko moko, ligbolodo moko moko, epimbwela moke moko moko. Nyonso oyo elingaki kozala na mokili, Amonaki yango, na ntango wana. Ya solo mpenza, Amonaki yango.

²³³ Sikawa Atikálá koloba te: “Nakotinda Mwana na Ngai na nse mpo Ákufa, pe ntango mosusu moto moko akoyokela Ye mawa. Pe ekozala likambo moko ya mawa mingi, ntango mosusu moto moko akoki kobikisama.”

²³⁴ Ayebaki liboso nani akobikisama! Iyo, misie. Alobaki: “Nayiní Esau, pe Nalingi Yakobo,” liboso ete moko na bango mibale ázua makoki ya kotalisa oyo bango bazalaki, mpo Ayebaki oyo bango bazalaki. Ayebaki yango. Ayebi makambo nyonso. Ayebaki makambo oyo okosala, liboso ete óbótama, to ntango mokili ebandaki.

²³⁵ Sikawa, bótala. Ndenge boyebi, na—na—nayebi kobeta bondóki. Na—nalingaka mandóki. Pe mwasi moko na Texas,

nabanzi ezalaki na Texas, amemelaki ngai bondóki moko ya Swift, Swift ya motango nkama mibale na ntuku mibale. Nazaláká ntango nyonso na mposa na yango. Nalingaki koyekola yango. Ezali bondóki ya moke pe ya nguya mpenza koleka. Ezali lisasi ya mbuma ntuku mibale na mibale, lisasi ya mbuma ntuku minei na mwambe. Pe okoki kotóndisa yango na maboko. Kasi, kompani oyo esalaka yango elobi: “Bósala bongo te; ezali na likama monene mpenza.” Kasi okoki kotóndisa lisasi yango na maboko, mpo ébetama na mbangu ya métre nkóto moko na nkama mitano na sekónde moko, pe etikali bobele na nzela na yango. Métre nkóto moko na nkama mitano na sekónde moko, wana esali kilométre moko na ndambo na sekónde moko. Na elobeli mosusu, soki nzéngó moko azali na ntaka ya métre nkama mibale. Soki obeti nzéngó yango masasi, okomona nsala kopumbwa liboso ete óyoka ndenge bondóki ezongi sima. Bomoni? Bongo, kasi soki ozindisi eteni ya suka ya mbanzi ya míno na balúti, pe obakisi bobele mwa ndambo *wana* kuna na kati, bobele mwa ndambo oyo okoki kokamata yango likolo na mbanzi ya míno; pe obeti simbiliki masasi, oyo azali na suka ya ndako oyo awa, akozala kaka wana pe azali kotala yo. Likambo nini esalemi? Lisasi epanzani, ezali nde kokende na lombangu moko ya makasi, pe . . . Pe okoki kotanda drap na katikati ya awa ná kuna, kasi okomona ata mwa eteni na yango ya moke ekwei likolo na drap yango ata moke te. Ezongi; na—na putulú te, na putulú ya volcan te, kasi ezongi mosika, koleka yango. Ezongi na ba-acíde ya ebandeli, oyo esalaka cuivre ná plomb oyo ezali na kati na yango. Ezongi ndenge yango ezalaki eleki mibu ba-milliard nkama. Sikawa, lisasi ya moke yango oyo, lisasi ya mbuma ntuku minei na mwambe, oyo nasimbi na loboko na ngai, pe sima na sekónde moko, ezongi ndenge oyo yango ezalaki eleki mibu milió mokáma. Pe, ntango mosusu, soki mokili ekobi kozala sima na mibu milió mokáma, ekobóngwana lisusu lisasi, ekoki kopesama lisusu lolenge yango, mpamba te ekokóma cuivre.

²³⁶ Sikawa, bótala likambo oyo Nzambe asalaki, na bongo bokolinga Ye. Na sima, bokozonga na ba-ndako, pe na ntongo bokolala mwa ntango molai. Pe—pe boko—bokolinga Ye mingi koleka liboso. Nzokande, Nzambe azali Motongi. Bato boni bayebi yango? Azali Motongi ndako. Malamu. Bóyoka na bokebi mpenza. Boye Nzambe, kala-kala mpenza, to, balobaka. . . Sikawa, tokokamata likanisi ya bato oyo bayekolaka ntango ya makambo eleká. Nzambe, eleki mibu ba-milliard nkáma, ntango Alingaki kosala mokili, ee, Abandaki kaka. Nzokande, Azuaki . . . Azalaki na likanisi moko na motó na Ye.

²³⁷ Sikawa bokoloba: “Ndeko Branham, soki Azali monene ndenge wana, mpo na nini Atikaki ete zabolo ásala lisumu?” Ee, Ayebaki, liboso ete zabolo átikala kokelama, ete ye akozala zabolo. Nkembo! Sikawa, namiyoki mosambeli. Oh! la la!

Ayebaki, liboso ete zabolo ákelama, ete akozala zabolo. Sikawa bokotuna: “Ndenge nini?” Bokoloba: “Mpo na nini Atikaki ye ázala zabolo?” Mpo na kotalisa polele ete Azali Nzambe. Yango nde ntina oyo Asalaki yango. “Mpo na nini mabe etikalá kozala? Mpo na nini?”

²³⁸ Nani azalaki liboso, Mobikisi to mosumuki? Nani azalaki liboso? Mobikisi. Nani azalaki liboso: Mobikisi na bokono to moto na bokono? Mpo na nini esalemaki ete mosumuki ázala? Mpo misala na Ye, ezali ya kozala Mobikisi. Soki mosumuki ázalaka te, Alingaki pe koyebana lokola Mobikisi makolo moko te. Aleluya! Azali na makoki ya kotámbwisa makambo nyonso mpo na nkembo na Ye. “Mosali na mbeki akoki koloba na . . . To, mbeki ekoki koloba na mosali mbeki: ‘Osalá ngai boye?’” Nani abalolaka masíni? Nani azali na potopóto? Ezali na maboko ya nani? Polo alobaki: “E elémá, Alobaki te ete Atelemisaki Falo na ntina oyo mpenza?” Ya solo. Ayebaki yango. Liboso ete mokili ézala, Ayebaki eloko nini ekozala eloko nini. Pe Atikaki ete lisumu ézala, mpo Ákoka kozala Mobikisi. Atikaki ete bokono ézala, mpo Ákoka kozala Mobikisi na nzoto. Atikaki ete koyina ézala, mpo Ákoka kozala Bolingo. Ya solo, Ayebaki. Azali Nzambe, pe yango nde misala na Ye. Pe esengeli ete Ázala na eloko moko mpo na kotalisa misala na Ye.

²³⁹ Ndenge nini bolingaki koyeba ete butu ezalaka, ndenge nini bolingaki koyeba ete ezalaka? Soki ezalaki bobele pole ya mokolo, ndenge nini bolingaki koyeba ete butu ezalaka? Butu ezali, mpo na kotalisa ete pole ya mokolo ezali. Ezali mpenza ya solo. Amen. Bomoni eloko nini oyo Asalaki?

²⁴⁰ Kasi ntango azalaki mosika kuna, liboso ya kozalisama ya mokili, liboso ete Ázua mobange na moi oyo pe Ábalola yango zongazonga na mobange na monzóto oyo tozali kobika likolo na yango, mabelé oyo, oyo Apesaki yango lolenge awa na nzela na moi, pe Atiaki yango pembeni na moi. Tóloba, moi yango *oyo*. Bongo, Apesaki yango lolenge na ngámbo *oyo*, pe Atelemisaki yango wana, mpo na mibu ba-milliard nkáma. Azalaki kosala nini? Ba-gaz. Abalukaki na ngámbo *oyo*, Asalaki eloko mosusu. Azalaki kosala nini kuna? Potáse. Abalukaki na ngámbo *oyo*, bongo Azalaki kosala nini awa? Azalaki kosala calcium. Azalaki kosala nini? Azalaki kosala ngai ná yo. Azalaki kosala nini? Lokola motongi oyo azali na mabaya na ye nyonso ya kotongela, ya mibale likolo na minei, pe ya mibale likolo na mwambe, mabaya na ye ya minene, biloko na ye mpo na bitutu ya libanda, ayebaki mpenza ba-ndako boni alingaki kotonga. Pe biso tosalemi na biloko zomi na motoba ya mabelé, pe Azalaki kosala biso nyonso, kotia biso wana, liboso mokili étikala kokelama. Pe Ye. . . Na ntango wana, ezalaki ntango mosusu moke pe molai; nayebi ndenge ezalaki te. Mpo na nini Azalaki kosala wólo, cuivre, motáko, mai ná biloko nyonso wana? Azali Motongi. Akoki ko. . . Motongi ndako, Azalaki koléngela

biloko nyonso, kuna, nyonso esilaki kokatama pe kopesama lolenge. Ntango Asilisaki kosala yango nyonso, ezalaki bobele kolamuka ya volká monene. Atikaki ba-volká yango épunja-punja kati na mibu milió mokáma, mpo na kosala calcium. Ezali nini? Ezali eteni ya yo.

²⁴¹ Bongo, liboso ete bomoi ya moke mpenza ézala na mokili oyo, banzoto na biso ezalaki awa. Aleluya! Liboso ete litangá ya liboso ya mai éya ata na mokili, biso tozuamaki awa. Ntango Adama azalaki kotambola, komata kokita na Elanga ya Edene, nazuamaki awa. Amen. Iyo, misie. Oh, nkembo! Ntango Bakelúba, minzoto ya ntongo ezalaki koyemba elongo pe bana na Nzambe bazalaki kogánga na esengo, nazuamaki awa kozeláká bobele péma ya bomoi éya. Nazalaki awa. Ye asalaki ngai awa, asilaki kotia nzoto na ngai awa. Iyo, misie. Soki ezalaki bongo te, boye, eútaki wapi? Hein? Ekómaki awa ndenge nini? Nzambe moto atiaki yango awa. Nzambe nde asalaki yango. Tosalémá na biloko zomi na motoba: petróle, potáse, pole ya minzoto, pe nyonso mosusu wana. Bomoni, tozuamaki awa.

²⁴² Bongo, likambo nini esalemaki? Na sima, Nzambe alobaki na Molimo Mosantu, tokotalisa yango na bilembo: “Sikawa, Yo kende pe Ótalisa bolingo na mokili. Lokola Ngai nazali bolingo, pé Yo outi epai na Ngai, na bongo, Yo kende sikawa kotalisa bolingo na mokili.” Pe Molimo Mosantu monene yango, tómkánisela, eyaki kuna; sikawa, ezali bobele lolenge ya kotalisa likambo. Esalemaki bongo te. Na ntembe te, Molimo Mosantu ná Nzambe, ezali kaka ntina moko, ndenge moko, ntina moko, Moto. Bólimbisa ngai. Pe tóloba, Azipaki mabelé na mapapu na Ye, Abandaki kofandela yango. Kofandela yango ezali nini? Ezali lokola mama soso ná bana na ye, kolela na nse, kotalisa bolingo: “Ke, ke, ke.” Oh!

²⁴³ “E bomoi, yaka!” Agángaki. Atalaki zongazonga. “Nalingi kitoko ézala na mokili oyo. Pole, yaka!” Molimo Mosantu azali kosala mosala. Pe ntango Asalaki bongo, natali; namoni lokola etímá moko ya mai ezali kotiola, kokita longwa kuna na ngomba, kuna mosika tala calcium ezali kosopana, ékosangana ná potáse. Esangani mpo na kopesa nini? “Bomoi, yaka!” Pe mwa felele moko ya Pasika ebimisi motó longwa na nse ya libanga. “Yaka awa, Tata, tala yango.”

²⁴⁴ “Emonani kitoko. Koba bobele kofandela yango.” Na kofandela, Abimisaki bafolólo. Abimisaki ba-nzete nyonso. Abimisaki bomoi ya banyama. Bandeke ebimaki na putulú pe epumbwaki. Sima na mwa ntango, mobali ná mwasi bayaki; moto moko ayaki, pe moto yango azalaki mobali pe mwasi nyonso mibale. Kasi mwasi-mobali te. Ezalaki bobele nde na kati na ye, ezalaki na molimo ya mwasi.

²⁴⁵ Soki ozui mobali oyo azali mpenza lokola mwasi, akoki na ye kozala malamú, kotongama malamú, kasi eloko moko

ezali kotambola malamumu te. Pe soki ozui mwasi oyo alingaka kokata suki na ye pe kolata ba-salopéte, kobima kuna pe koloba: “Nzambe ápambolama, bóyoka!” Eloko moko ezali kotambola malamumu te. Mwasi azalaka na molimo ya mwasi, pe mobali azali mobali. Toyebi yango. Pe boyebi yango. Bomonaka ete ezali malamumu mpo mwasi áluka kozala, kosala makambo lokola mobali?

²⁴⁶ Ee, mokolo moko, nafandaki, nazalaki kosala mosala ya mobateli ya zamba awa, pe nafandaki na bísi, nazalaki kokende kuna, pe nazalaki kobeta lokolo ya mwasi wana, na loboko na ngai, wana nazalaki kosolola na ye, nayebaki te ete ezalaki nde mwasi. Alataki ekoti ya ba-soudeur ná matalatala ya mosala, ya minene *boye*, nafandaki na ngai wana na sima, pe azalaki kobeta lisolo ya likambo moko eutaki kosalema. Alobaki: “Oyebi,” pe alobaki, “pe lobi na mpokwa,” azalaki lokola moto ya makasi mpenza, pe azalaki komela likaya. Alobaki: “Lobi na mpokwa, nalobi na yo, elenge mobali wana aselumukaki, likolo na eloko wana. Mobali yango alobaki: ‘Oh!’ Aselumukaki pe abambanaki na nse.” Alobaki: “Naseká naino ndenge wana te na bomoi na ngai.”

²⁴⁷ Ngai pe nazalaki koseka, boyebi, ndenge *wana*. [Ndeko Branham asali lokola babetani maboko—N.D.E.] Nalobaki: “Moninga, lisolo kitoko, boye te?” Tofandaki wana pe tozalaki kobeta masolo ndenge wana. Pe soki álongolaka eloko wana te pe soki áningisaka motó na ye te, azalaki pe na nuani ya suki, okoyeba te ete azalaki mwasi. Namiyóká naino moke ndenge wana te na bomoi na ngai. Na—nalobaki: “Ozali nde mwasi?”

Alobaki: “Iyo kó!”

²⁴⁸ Nalobaki: “Limbisa ngai.” Namóná naino likambo ya ndenge wana te. Sikawa, wana, wana ezali ya solo.

²⁴⁹ Namonaki etánda moko, mokolo mosusu, esepelisaki ngai mingi mpenza. Etánda ya monene ezalaki wana, elobaki: “Bilamba ya basi, osombi olati.” Namilobelaki: “Nkembo na Nzambe mpo na yango.” Bomoni? Kasi, nayaki komona na sima, ete ezalaki bobele lolenge moko boye ya bilamba oyo basilaki kotonga, boyebi. Na—nakanisaki ete balingaki kolata mpenza bilamba. Nakanisaki mpenza bongo. Bakomaki: “Bilamba ya basi, osombi olati.” Nalobaki: “Nkembo na Nzambe mpo na bango. Ezali malamumu. Natondi mpenza Nkolo mpo na yango.” Kasi, bomoni, ezalaki bobele bilamba moko boye, oyo basilaki kotonga, eloko moko ya ndenge wana. Esengelaki kozala likambo ya kokamwa, na ekólo oyo, boye te? Malamumu.

²⁵⁰ Bongo, ntango Adama ayaki. Pe, emonanaki lokola Adama azalaki ye moko mpenza, boye Azuaki mokúwa moko na mopanzi na ye, pe Asalaki Eva, autaki na mobali. Asalaki. . . Alongolaki molimo ya mwasi epai na Adama, pe Atiaki yango na kati ya mwasi: molimo ya bolingo, bomwasi, bolamumu, bopolo.

Pe Atikaki molimo ya mobali na kati ya Adama. Boye, soki ezali na eloko moko ya bokeseni, libanda na yango, boye libebi ezali epai moko. Kasi, bango mibale bazalaki eloko moko.

²⁵¹ Sikawa, tótalisa likambo moko awa lokola lisolo, liboso ete tósukisa. Tala . . . Tala, Adama asimbi Eva na loboko, pe bazali kotambola. Nalingaka lisolo yango mingi. Pe bazali kotambola, boyebi. Eva alobi: “Oh, cheri, yo mpenza moto osalaki bongo?”

“Iyo, ngai moto napesaki yango nkombo.”

“Kasi obengaka yango nkombo nini?”

“Nkombo na yango mpunda. Iyo.”

“Oyo wana nde nini?”

“Oyo wana ezali ngombe. Iyo.”

“Yo moto opesaki yango nkombo wana?”

“Iyo. Ah-ah.”

²⁵² “Oyo kuna obengaka yango nkombo nini, baoyo mibale oyo bafandi kuna, ná mitó na bango ekutani?”

“Wana bazali batshaku balingáná.”

²⁵³ “Oh, namoni. Namoni.” Pe bakobi ndenge wana. “Bongo oyo awa nde nani?”

“Oyo nabengaka yango nkombo *boye*, ná oyo pe.”

²⁵⁴ Pe: “Oh, namoni. Ah-ah. Ezali kitoko.” Pe nkosi angulúmi. “Oyo wana obengi ye nkombo nini?”

“Oyo wana ezali nkosi.”

“*Oyo* nini?”

“Tígre.”

²⁵⁵ Pe, oh, lokola . . . “Oh, namoni.” Lokola bana ya nyáwu, boyebi, ndenge batambolaka pe balelaka.

²⁵⁶ Boye, sima na mwa ntango, ye mwasi atali pembeni. Alobi: “Cheri, tala kuna, mói ezali kolala. Ntango ya kokende na losambo ekoki.”

Boyebi, ntango mói ekitaka, ezalaka na eloko moko boye oyo esalaka ete óyoka mposa ya kokúbamela. Soki okei na losambo te na mpokwa wana, okolinga kokota na esika moko, pe kotánga Biblia. Bato boni balingaka kosala bongo, kozua mwa ntango ná yo moko? Bomoni? Yango ezalaka na kati ya moto, kosala bongo. Bosengeli kosala bongo.

“Ntango ya kokende na losambo ekoki.”

²⁵⁷ Sikawa batikálá koloba te: “Sikoyo, zela naino mwa moke, Jones asambelaka na ba-Assemblé, pe biso tosambelaka na . . .” Te, ezalaki eloko moko ya ndenge wana te na ntango yango, boye bakendeki na bango kuna. Bazalaki na losambo te, esika moko ya kofanda ya malamú ndenge wana. Bakendeki bobele na nsé ya katedrále monene ya ba-nzete, pe bafukamaki.

258 Pe Zolongano ya pole wana etelemaki kuna, likolo na banzete ya mike. Bomoni? Nakoki koyoka Mongongo moko, longwa na likolo, koloba: “Lelo, bana na Ngai basepeli na mokili oyo Nkolo, Nzambe na bino, apesi bino?”

259 “Iyo, Nkolo, tosepeli mpenza lelo.” “Boye te, cherie?”

260 “Iyo. Iyo, cheri, ya solo.” “Nkolo, tosepelaka na Yo solo mpenza. Sikawa namitandi mpo na kolala.” Bomoni? Mobali asemboli loboko na ye monene, pe ye mwasi alali, na loboko ya mobali na ye, alalisi tígre, ná nkosi, pe banyama mosusu nyonso balali; na kimia mpenza.

261 Bongo Nzambe akiti pe Ayei ná, oh, etonga ya Banje, Gabriel, bikelamu na Ye ya Likolo. Bongo bakiti pe bakoti na esika ya kolala na sónge ya misapi, bomoni, pe batali zingazinga. Gabriel alobi: “Yaka awa, Tata. Yaka awa. Tala awa. Ye oyo. Tala, bana na Yo, balali awa.”

262 Bato boni basílá kokende na motó ya mbeto, bamosusu na kati na bino bamama, yo elongo ná papa, mpo na kotala mwana na bino ya mobali to ya mwasi, pe bozosolola moko na moninga: “O—omoni te ete azali lokola yo, alandá yo na eloko *oyo* boye na *oyo wana* boye?” Bosílá kosala yango? Ee, ngai nasalaka yango mbala mingi, pe nalobaka na Meda, mpo na Joseph. Akoloba: “Bill, elongi na ye ezali na mbunzu lokola ya yo.”

263 “Iyo. Kasi, Meda, azali na miso minene, lokola yo.” Mpo na nini? Azali eteni ya mbum- . . . Azali mbuma ya—ya bosangani na biso.

264 Bongo pe Tata alobaki, akoki koloba boye mpo na yango. Alobi: “Oyebi. . .” Gabriel alobi: “Oyebi, azali mpenza lokola Yo.” Lolenge wana nde Nzambe azali; mítala yo moko. Lolenge wana nde Nzambe azali. Azali komonana lokola bino. Bozali bana na Ye. Bato boni bayebi yango? Bomoni?

265 Sikawa, bótala malamumu. Lolenge nini ya bomoi ezali ya nse koleka mpenza? Ligbólodo. Lolenge nini ya bomoi ezali ya likolo koleka mpenza? Moto. Ya solo. Pe lolenge nini ezali ya likolo koleka mpenza? Eutaki na lolenge ya nse mpenza koleka, ekobi komata, longwa na ligbólodo kino na *oyo*, pe na *oyo wana*, pe na ndeke, bongo na bongo, kino na ndenge ya bomoi oyo ezali kokoba komata, kino na lolenge oyo eleki likolo mpenza, bongo esalemaki na elilingi ya Nzambe. Yango mpenza. Mwasi asalémá na elilingi ya Nzambe te, kasi na elilingi ya mobali. Bomoni?

Bongo, sikawa, bango wana. Nzambe atali bango, Alobaki: “Iyo, bazali—bazali kitoko.”

266 Wana ezalaki nini, ndeko? Basengelaki kokufa ata moke te. Oyo wana ezalaki bobele eteni moke mpenza ya calcium ya liboso, ya potáse ya liboso, nyonso ebandaki ndenge wana. Kitoko, boye te? Kasi lisumu eyaki pe ebebisaki makambo nyonso. Sikawa Nzambe a . . . Mpo na nini Nzambe atikaki yango

ésalema? Mpo na nini Atikaki ete ézala ndenge tozalaki kolobela yango eleki mwa ntango? Atikaki yango ésalema mpo Ákoka kotalisa ete Azalaki Mobikisi. Asalaki yango. Atikaki ete bokono ékoma, mpo Ákoka kotalisa ete Azali Mobikisi na nzoto. Atikaki ete kufa ékoma, mpo na kotalisa ete Azali Bomoi. Bomoni? Atikaki ete makambo mabe nyonso oyo ékoma, mpo na kotalisa ete Azali malamú, oyo Ye azalaki. Toko . . .

267 Tólobela likambo ya koyemba lisolo ya lisiko! Ee, ndeko, ntango Yesu akoya, li—Lingomba oyo ekozala kuna, na suka ya mokili oyo, mpo na koyemba masolo ya lisiko, wana Banje bakogumba mitó, bakoyeba te likambo oyo biso tozali kolobela. Ee, bango batikálá kobunga te. Bayebi makambo oyo biso toleki kati na yango te. Bisó toyebi eloko nini kobúnga pe kozuama sima. Oh, tokoki kosanzola Ye na mongongo makasi! Azali Mobikisi mpo na bango te. Batikálá kozala na ntina ya lisiko moko te. Azalaki Mobikisi mpo na bango te. Te. Nkembo! [Ndeko Branham abeti maboko mbala mitano—N.D.E.] Azali te—Azali Bomoi mpo na bango te. Ata moke te. Bango batikálá kokufa na lisumu pe na mabe te. Bisó tokufaki, pe topesameli bomoi. Tala biso oyo. Tokoloba nini, sima na kolongola mitóle na biso: “Oh, yo nde reverend *Songolo-pakala*”? Te, te, te, te, te. Nkembo nyonso epai na Ye! Ezali bongo. Yango mpenza. Bongo, tokobeta lisolo ndenge tolongi. Tokososola yango malamú koleka wana tokokoba.

268 Bongo, na ntango wana, boye likambo nini esalemaki? Boye Nzambe alobaki bobele: “Ee, malamú Nábebisa bobele potáse pe calcium na Ngai nyonso. Makambo nyonso ebebi”? Te, te. Ayebaki ete elingaki kosalema ndenge wana.

Nzokande, sikawa, soki Molimo Mosantu asalaki ngai oyo ngai nazali, pe naliaka bilei, naleisaka nzoto na ngai mpo ékóla, pe étongama na oyo ngai nazali sikawa. Kasi, ata bongo, nasalémá na lolenge moko boye. Bililingi nyonso oyo Nzambe amonaki liboso na kozalisama ya mokili, ekoméli, ezali kokokisama. Bomoni? Eutaki na mwasi, ndenge Alobáká yango; na mbala oyo elandi, ekouta na Nzambe. Na mbala wana, eyaki na nzela ya mwasi; na mbala oyo, eyei na nzela na Mobali. Bomoni? Na mbala wana, eyaki na nzela na mposa ya nzoto; na mbala oyo, eyei na nzela na Liloba lilibami ya Nzambe. Bomoni?

269 Wana, sikawa, eloko moko ekoki kosala ngai mabe? Te, misie. Ezali na eloko moko te oyo ekoki kosala biso mabe. Polo alobaki: “Ata makambo ya lelo, makambo oyo ekoya, bokono, kufa; eloko moko te ekoki kokabola biso na bolingo na Nzambe, oyo ezali kati na Klisto.” Elokó moko te ekoki kokabola biso na yango.

270 Lokola mwa lisolo oyo nabetaka. Natikali bobele na suki soko mitano liboso ete libandi étonda na motó mobimba mpenza. Pe eleki mwa ntango, nazalaki kosanola mwa suki yango, mwasi

na ngai alobaki: “Billy, etikali moke libandi étonda na motó mobimba.”

Nalobaki: “Kasi nabungisi ata suki moko te.”

Alobaki: “Ezali wapi?”

²⁷¹ Nalobaki: “Ezalaki wapi liboso ete názua yango? Omoni? Ezali epai ezalaki liboso ete názua yango.”

Sikawa, na ntango moko boye, eleki mibu nkama, suki yango ezalaki awa ata moke te, kasi ezalaki awa na putulú. Boye te? Bongo, eleki mibu penepene ntuku mitano, ebandaki kobima na motó na ngai. Eutaki wapi? Na putulú. Pe sikawa ezali kozonga epai yango eutaki. Boye te? Ezalaki te, na sima, ezalaki, sikawa ezali lisusu te. Ezali nini? Nini yango esalaki ete ézala ndenge ezali? Nzambe! Ye wana. Ayemaki liyemi moko, Alobaki: “Nalingi ete ázala ndenge wana.”

²⁷² “E kufa, wapi esweli na yo? Nkunda, wapi elonga na yo?” Bokoki kokunda ngai moko na mikolo oyo awa. Nayebi te. Kasi, ndeko, nakozala mokufi te. Nakoyebisa bino yango. Te, misie. Oh!

Tokosekwa! Aleluya! Tokosekwa!

Na ntongo wana ya lisekwa, ntango bibende ya kufa ekobukana,

Tokosekwa! Aleluya! Tokosekwa!

Eloko moko te ekopekisa ngai ete násekwa. Milimo mabe ezali ya kokoka te na lífelo mobimba oyo ekoki kopekisa ngai ete násekwa. Eloko ata moko te ezali, esika moko te, oyo ekopekisa ngai ete násekwa. Nazali na elaka ya Nzambe. Nazali na Molimo Mosantu. Nazali na Zoe, Bomoi na Seko ya Nzambe, efandi na kati awa. Mobange ya nzoto oyo euté kuna, Nzambe afandelaki mabelé mpo na kobimisa ngai. Pe soki Ye Oyo afandelaki mabelé mpo na kobimisa ngai. . .

²⁷³ Ntango nakómaki na mibu ya koyeba mabe ná malamumu, sikawa, ntango nyonso oyo nazalaki koyoka ngonga ya losambo kobeta, Eloko moko ezalaki koloba na ngai, nazalaki mwana moke mpenza. Mwanje moko alobelaki ngai, na nzete moke, alobaki: “Komela masanga te pe komela makaya ata moke te. Nazali na mosala moko mpo na yo ya kosala. Koyeisa nzoto na yo mbindo te, to kobima na basi pe nyonso wana. Yo, Nazali na eloko moko mpo na yo ya kosala ntango okokóma mokolo.”

“Yo nani? Yo nani?”

²⁷⁴ “Okoyeba mingi koleka na ntina na likambo yango na sima mpenza.” Sima na mwa ntango, Ayaki. Atelemi wana na ntango ya kobatisa. Amilakisi. Amitalisi. Ayanoli. Namoni Ye ndenge Atelemi wana, na bisika nyonso, na ngámbo nyonso.

²⁷⁵ Okosala ndenge nini, soki Ye nde asalaki ngai názala oyo ngai nazali, kozanga ete ngai nápona yango. . .? Ngai natikálá kokende kuna te pe koloba: “Sikawa, Charlie Branham, bála

Ella Harvey pe bóbota ngai na mokili.” Te, misie. Ngai natikálá kopona yango te. Nzambe nde asalaki yango.

Pe soki Asalaki ngai oyo ngai nazali, kozanga été nápona; koleka boni, ntango Molimo Mosantu abandi kofanda likolo na ngai, pe ngai nalobi: “Iyo, Nkolo, Ozali Mokeli na ngai. Nalingi Yo, pe nayambi Yo lokola Mobikisi na ngai!” Okokanga ngai kati na putulú ndenge nini? Okokoka kosala yango te, ndeko. Okokoka kosala yango te.

²⁷⁶ Nzambe atikálá kosala eteni moko ya calcium oyo te, to ya potáse, to ya eloko mosusu, oyo e—etikálá kobúnga. “Baoyo nyonso Tata apésá Ngai liboso na kozalisama ya mokili, bakoya epai na Ngai.” Fiuu! Nayoki mposa ya kogánga; ya solo mpenza. “Baoyo nyonso Tata apésá Ngai bakoya epai na Ngai, pe moko te na kati na bango akobunga, kasi Nakosekwisa yango na mokolo ya lisekwa.” Nayokaki Ye kobenga, wana nayaki epai na Ye. Ndenge nini bakoki kokanga ngai kati na putulú ya mabelé? Bakompani ya kokunda bibembe na mokili ezali ya kokoka kutu te, mpo na kobwakela ngai zelo ya páwu na elongi, bakokoka ata moke te kokanga ngai kati na putulú ya mabelé. Mokolo moko nakosekwa, pe nakokóma lokola Ye, nasukolami na Makila na Ye, nabotami na Molimo na Ye! Aleluya! Bózua na bino badenomination nyonso oyo bolingi; ngai nakozua Yesu. Amen!

²⁷⁷ Mobali moko oyo asalaka na kompani ya assurance ayaki epai na ngai. Wilmer Snyder, moninga na ngai moko ya malamumu. Alobaki: “Billy, nakosepela kotekela yo assurance.”

²⁷⁸ Nalobaki: “Nasila kozala na yango.” (Mwasi na ngai atalaki ngai, lokola moto alingi koloba: “Mpo na nini ozali kokosa, mobali oyo?”)

Alobaki: “Ozali na assurance?”

Nalobaki: “Iyo, misie.”

Alobaki: “Ezali ya kompani nini? Oyo wapi?”

²⁷⁹ Nalobaki: “Assurance oyo epambolámá, Yesu azali ya ngai, oh, oyo nde ndangá ya nkembo ya Nzambe! Mosangoli ya lobiko, nasombami na Nzambe, nabotami na Molimo na Ye, nasukolami na Makila na Ye.”

²⁸⁰ Alobaki: “Ezali malamumu, Billy, kasi ekokotisa yo na nkunda te.”

²⁸¹ Nalobaki: “Ekobimisa ngai.” Aleluya! Nazomitungisa te mpo na kokota kuna; likambo ezali nde ya kobima.

²⁸² Na bongo, nazali na assurance oyo elobi na ngai: “Nakosekwisa. Baoyo nyonso Tata apésá Ngai bazali ya Ngai.” Etali ngai te nini tata na ngai asalá, nini mama na ngai asalá, soko likambo nini esalemá. “Baoyo nyonso Tata apesi Ngai bakoya epai na Ngai, pe moto moko te akoki koya soki Tata na Ngai abendi ye te.” Aleluya! Abendaki bango mpo na nini? “Nayebaki bango liboso, liboso na kozalisama ya mokili. Ntango

Nabomaki Mwana Mpate, Nabomaki ye elongo na Ye.” Amen. “Nabongisaki Lingomba liboso.” Nini ezali na Kobongisama liboso? Lingomba. Bakotaka na Lingomba ndenge nini? “Na Molimo moko, biso nyonso tobatisami kati na Nzoto moko.” Ayebaki, liboso na kozalisama ya mokili, ete tokozala kuna. “Pe baoyo Ayebaki bango liboso, Abengi bango. Baoyo Abengi, Alongisi bango. Baoyo Alongisi, Asíli kopesa bango nkembo.”

²⁸³ Na ba-Buku ya Nzambe, Asílá koloba ete Akokutana na ngai kuna. Milimo mabe nyonso ya lífelo ekoki kokanga bango esika moko te, ekoki kopekisa bango te mpo na kokóma mpenza na esika wana, mpamba te Nzambe asílá koloba yango, pe yango ekati likambo. Soki mibu ya ba-milliard nkáma liboso mokili ésalema, minzoto ya ntongo ezalaki koyemba elongo pe bana na Nzambe bazalaki kogánga na esengo, liboso ya kozalisama ya mokili, bomoni, liboso ya kozalis- . . . , ná Banje, ná nyonso wana, bazalaki kosepela, bazalaki kogánga mpo na yango, liboso ya kozalisama ya mokili, ndenge nini zabolo akoki kokanga ngai kati na putulú ya mabelé? Akokoka kosala yango te. Bolóngi.

²⁸⁴ Sikawa, tótala. Awa, nazali na ngonga ya ba-democrate. Etikali miniti ntuku mibale mpo tókoma na ngonga ya zomi na moko. Etikali bobele miniti ntuku mibale mpo tókoma na ngonga ya zomi. Boye te, Ndeko Wood? Ya solo, miniti ntuku mibale kino ngonga ya zomi. Moto nyonso asepele?

Oh, motema na ngai esili kokóma kuna,
Motema na ngai esili kokóma kuna;
Ndako na ngai ya Lola ezali kitoko mingi,
Pe motema na ngai esili kokóma kuna.

Oh, motema na ngai esili kokóma kuna,
Motema na ngai esili kokóma kuna;
Ndako na ngai ya Lola ezali kitoko mingi,
Pe motema na ngai esili kokóma kuna.

²⁸⁵ Bolingaka ba-nzembo ya kala ya ndenge wana? Ezaláká na moko ya kala tozaláká koyemba, eloko moko na ntina na: “Ngolu pe mawa ezuaki ngai. Kuna Monzoto ya Ntongo engengaki.” Ezali nini, Ndeko mwasi Gertie? Tótala naino. Ndenge nini. . . Ezali nini, Ndeko Neville? Bomoni, eloko moko lokola: “Ngolu pe mawa ezuaki ngai. Monzoto Mokongengaka na Ntongo engengisi oyo ya Ye. . . ? . . . zongazonga na ngai.” Ah. Iyo. “Na Ekulusu.” Pesa biso ndenge ya koyemba yango, ndeko mwasi, *Pene Na Ekulusu*. Púsana awa, Ndeko Neville. Oh, nalingaka ba-nzembo oyo. Bato boni balingaka ba-nzembo ya kala wana, oyo epemelámá? Bózua na bino makambo ya kopumbwa-pumbwa pe ba-boogie-woogie nyonso oyo bolingi. Bópesa ngai oyo: “Tala esika ngolu pe mawa ezuaki ngai.” Ezali yango. Malamu, sikawa, na bopolo.

Yesu, batela ngai pene na ekulusu,
 Kuna liziba kitoko,
 Ofelé mpo na moto nyonso, mai ya lobiko,
 Ezali kotiólá longwa na ngomba ya Kalvari.

Na ekulusu, na ekulusu,
 Zala nkembo na ngai mpo na libela;
 Kino ntango molimo na ngai ekonetolama pe
 ekozua
 Kimia na ngámbo ya ebale.

²⁸⁶ [Ndeko Branham abandi koyemba na nse ya mongongo *Pene Na Ekulusu*—N.D.E.] Oh, kitoko mpenza! Bókanisa naino! Bongo soki Mobikisi azalaki te? Bongo soki tozalaki na Liloba oyo te? Bongo soki Abengaki bino te? Bongo soki Ayebaki bino liboso te, pe bozalaki kuna, elongo na bato mosusu wana ya mokili na mpokwa oyo? Bolingi Ye? Oh! la la! Sikawa, bóbosana liyangani ya lobi na ntongo te, na ngonga ya libwa na ndambo.

Na ekulusu, na ekulusu,
 Zala nkembo na ngai mpo na libela;
 Kino molimo na ngai ekonetolama pe ekozua
 Kimia na ngámbo ya ebale.

²⁸⁷ Sikawa tindela biso loyembo oyo *Esika Ezali Na Liziba*. Loyembo kitoko oyo, ya kala: “Esika ezali na Liziba.” Bato boni bayebi yango? “Esika, esika, iyo, esika ezali, esika na Liziba.” Sikawa, wana bozali koyemba yango, baluka malembe pe pesa mbote ya loboko na ndeko oyo azali pembeni na yo. Boyebi, esika ezali sikawa mpo na ba-Methodiste nyonso. Esika ezali mpo na ba-Batiste. Esika ezali mpo na ba-Pantekotiste. Esika ezali mpo na biso nyonso sikawa, na Liziba. Bato boni bayebi loyembo yango ya kala? Oh, na ntembe te, boyebi yango. Bamosusu kati na bino, bato ya kala, ezali loyembo kitoko ya kala na Kentucky.

Esika, esika, (bópesana mbote ya loboko), iyo,
 esika ezali,
 Esika ezali na Liziba mpo na yo;
 Esika, esika, iyo, esika ezali,
 Esika ezali na Liziba mpo na yo.

Oh, esika, esika, esika ezali monene,
 Esika ezali na Liziba mpo na yo;
 Oh, esika, esika, iyo, esika ezali,
 Esika ezali na Liziba mpo na yo.

²⁸⁸ Sikawa, nabombelaki bino mwa likambo moko ya malamumu. Mateya nyonso ya suka, ná ba-buku pe nyonso wana, ekotekama na suka ya ngámbo mosusu ya losambo, na mpóso ekoya, na mayangani; ba-bande pe biloko nyonso wana, esalemi ná mikanda ya malamumu. Mésá moko ekozala na sima kuna, na kati ya moko na bisika yango. Pe mikanda yango, mateya ya suka, ná makomi mosusu ya malamumu oyo esílá kobima, na lolenge ya ba-

buku ya sika, oyo babimisi lisusu, nyonso ekotiamama wana, na—na suka ya ndako, mokolo ya misato oyo ekoya, na mpokwa.

Pe tozolikya ete tokolekisa nta—ntango ya malamamu kati na Nkolo. Boye, bóya na molimo ya mabondeli. Sikawa, bóbenga bato na bino ya bokono pe ya mawa, bókómela bango mikanda. Bómema bango awa. Toko . . . Nzambe akosala na nguya mpenza. Pe toyebi ete Akosala yango.

²⁸⁹ Sikawa, nakendeki epai na bato nyonso oyo nayebaki ete bazalaki na mwa mindondo. Sikawa, soki likambo moko ezali, oyo elongobani te, bóbosana te, nayebisaki bino yango banda kala, ete tokosembola nyonso wana. Pe nayebi ete bino boyebi ete molimo moko ya ndenge mosusu ezali awa, oyo ekeseni na oyo ezalaki. Bomoni? Bomoni? Bomoni? Ya solo. Sikawa, bótika yango ékende lisusu te. Nalobeli bino polele liboso na Yesu Klisto, bótika yango ékende te. Bóbatela yango ntango nyonso awa, bomoni, bóbatela nyonso malamamu pe bókoba kokende liboso. Bozali bandeko. Ezali ndeko na yo ya mobali to ya mwasi te nde asalaka makambo ya mabe; ezali molimo wana ya zabolo nde emikotisaka wana. Bomoni, atambolaka bipai na bipai. Yokela nde ndeko yango mawa, ázala mobali to mwasi, pe yeba ete Satana nde ayei kokota katikati na bino. Soki oyoki mwa koyina mpo na yango, bimisa yango nokinoki, bomoni, mpo ekolia yo moke moke. Iyo, ekosala yango. Na bongo, zala mosika na yango. Kobosana yango te.

Esika ezali, esika, esika monene,

Esika ezali mpo na ba-Metodiste, esika mpo na ba-Batiste, esika mpo na ba-Presbiterien. Esika ezali mpo na bato nyonso.

Esika, esika, iyo, esika ezali,
Esika ezali na Liziba mpo na yo.

²⁹⁰ Bato boni bayebi lisusu loyembo tozaláká koyemba wana tozali kokabwana?

Mema Nkombo na Yesu elongo ná yo
Mwana na mawa pe ya bolozí;
Ekopesa yo esengo pe libondisi,
Mema Yango bisika nyonso okokende.

Nakosepela ete bókoka kotikala elongo na biso, Ndeko Jeffreys, yo ná Ndeko mwasi Jeffreys, ná bana na bino nyonso ya mibali.

Na bongo tokogúmbama liboso na Nkombo na
Yesu,
Tokofukama na makolo na Ye; (Oh! la la!)
Tokolatisa Ye motóle ya Mokonzi na bakonzi na
Lola,
Na suka ya mobembo na biso.

Mema Nkombo na Yesu elongo ná yo,
 Mema yango lokola Nguba lelo;
 Oh, wana masenginia makozinga yo,
 Loba Nkombo Mosantu wana na libondeli.

Oh, nalingaka yango. Ná bino? Nkombo kitoko wana ya Yesu! Sikawa, tótelema, wana tozali koyemba. Malamu.

Mema Nkombo na Yesu elongo ná yo,
 Mwana na mawa pe bolozi;
 Eko . . .
 [Ndeko Branham asololi ná Ndeko Neville—
 N.D.E.]

O ya boboto!
 Elikya ya mokili pe esengo ya Lola;
 Nkombo kitoko (O Nkombo kitoko), O ya
 boboto!
 Elikia ya mokili pe esengo ya Lola.

²⁹¹ Sikawa oyo, ekeseni mwa moke. Tógúmba mitó na biso sikawa, pe, na kimia mpenza, tótombola loboko moko. Tóloba:

Tokogúmbama liboso na Nkombo na Yesu,
 Tokofukama na makolo na Ye,
 Tokolatisa Ye motóle ya Mokonzi na bakonzi na
 Lola,
 Na suka ya mobembo na biso.
 Nkombo kitoko, O ya boboto!
 Elikia ya mokili pe esengo ya Lola;
 Iyo, Nkombo kitoko, O ya boboto!
 Elikia ya mokili pe esengo ya Lola.

²⁹² Wana tokobi kogúmba mitó na biso, tolobi . . . [Ndeko Branham abandi koyemba *Mema Nkombo Na Yesu* na nse ya mongongo—N.D.E.]



MPO NA NINI BISO TOZALI DENOMINATION TE? LIN58-0927
(Why Are We Not A Denomination?)

Liteya ya Ndeko William Marrion Branham oyo, eteyamaki liboso na Anglais na mokolo mwa mpóso na mpokwa, mokolo mwa 27, sanza ya libwa, na mobu 1958, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org